

NKONKO NÈ MANDAMUNA

PA EBÈLÙ CITUPÀ I

🦋 Mmunyi mùdiyekù mufwànyine kucyènza kabùyi bwà Nzambi? Aci's ncifwànyine kwikala cyà cilelèlà, kí mmwômò anyi? Kí ncifwànyine kwenjiibwa kabùyi bwà Mukalenge nànsha.

Ncyàkuyiisha pa byònsò abi to. Kàdi mvwa mwelè meeji ne mvwakù mufwànyine kutwà cyanza pa cintu kampàndà cyà bujitu, nudi bamanyè's, pa nàнку mbimpè ngùikalè mudilongolòle. Kàdi, kaa, cìvwa cipeepèle, pèèpèlèè. Pa nàнку pàmwàpa kakwèna nkonko yàbùngì menemene munkaci mwà bantu díbà adi to, bìdi ànu bipeepèle menemene ne nkonko mipeepèle. Èè, ndi ne disànkà dya kuteeta kuyàndamunakù ne mwànyì pàànyì mwònsò, ku dikwàcisha dya Mukalenge.

² Nèнку Mwanèètu wa bakàji Arganbright yèyèpu dílòòlò edi... Mwanèètu wa bakàji Ruth. Udipù anyi Mwanèètu wa bakàji Ruth? Lwà apa nùnkù. Ndi ne... Kaa, èyowà, ndi ne mwaba wùdiyè musòmbèle kaaba aka, ne... To, ncyèna naawù to. Èè, ndi mwà kuwùpetela ne lùkàsà lwònsò kaaba aka. Mvwa naawù mu mpùntùmùnyì wanyì, kàdi ndi mushiye mpùtùmùnyì wanyì awu kumbèlu. Mpindyewu, mpùlushì yèyè munkwàte mu dyalukila dya kwànyì kumbèlu, Mwanèètu Fleeman, wàlwakù bwà kungaakwila. Wàmbilè Billy ne ndi... ndi mushiye mpùtùmùnyì wanyì kumbèlu, ndi ngendesha kàshinyì ncìyi ne mukàndà wà bwendeshi dílòòlò edi to. Pàànyì's mvwa ngeela meeji ne mvwa nendè mu mpaayà mwanyì emu; ndi mushintulùle ànu bilàmbà cyanààna's. Mvwa mubwelè lubilu, mu mapingaja emu, mvwa nkòsa mashìndè lùkàsàlùkàsà ne kukèngelabi bwà mèmè kuumuka ne kulwijakaja bwà kubwela, kushintulula bilàmbà ne kwasa lubilu mutàngile kaaba aka. Nèнку ndi—ndi mulwe ne nkòngamyakù, kàdi nudi mwà kumupeta ànu paanyimà pàà bamanè kupàtuka mwômò amu.

³ Kanùdyùmvù bibi bwà mukàndà mumfùndila awu to. Byòbì ne kacya ncitukù mwanji kupeta mubi kutàmba wòwò awu to, awu mmufwànyine kwikala mukàndà mwimpè. Awu wùvwa mwimpè. Awu wùvwa mulenga, mulenga wà dikèma. Mvwa munwàmbilè ne ncìvwa mwà kuwùbala to, kàdi ndi mukawùtwe cyanza, nudi bamanyè's, ncìyikù ànu mufwànyine kukwata kàbìdì mwoyi to. Mvwa ànu ndikonka cyùvwa wamba's. Kàdi wùvwa mulenga be, be, mufunde menemene ànu mùvwàbì bìkèngela bwà mulongeshì wa kàlaasà kufundayè. Wùvwa mwimpè, ne mèmè ndi muwànyishe. Ne cìdì—cìdì cikupèèsha... . . .

4 Nudi numòna's, mèmè ntu munangè mikàndà mimfùndila kùdì muntu kampànda udi mufwànyine—mufwànyine kubènganganakù neebè ndambù. Nwamònu's, wèwè wenda ànu uya dībà dyònsò, muntu nànsha umwe kàyi ubènganganakù neebè to, s'udi ushààla musaapùke. Bikèngela ùpetèku tuntu ndambù twà bàbèngangana neebè bwà wamònakù mwà kuumvwa ne kumbula mu ndòndò. Ne—ne udi ukabwela ànu mu biibidilu ànu bìmwèbìmwè abi wèwè kùyi mutàngile bìmpè; dībà adi udi—dībà adi udi upeta lutàtù paùdi wenza nànkù awu. Bikèngelakù ànu utùngunuka ne kuya kàdi kupetakù muntu kampànda wa ùbèngangana neebè ne ùkubìndululakù ku musangu ne ku musangu.

5 Mu Àfrikè mwàmwa mvwa musangàne tuntambwe túbìdì tukesè, ne tùvwa twà tukesè menemene, twipacila bunène *ebu*. Kantambwe kàà makejimateji, kakesè, kakesè menemene; kantambwe kalùme kakesè, kantambwe kakàji kakesè. Nènku mpindyewu, tùvwa tùmweka bu twànà twà mpuusù, tùvwa tukesè be mùshindù awu, tukesè...tuntu tukesè tutàmbe bulenga mu mùshindù wà ne, tùvwa ànu tùnàya cyanààna. Ne mèmè mvwa muswè kwalukila naatù mu Àmèrikè, mvwa mutwélè mu nsànji wa tunyuunyi. Mvwa muswè kwalukila naatù, kàdi ncìvwa mwà kupeta cintu nànsha cimwè—nànsha cimwè bwà kutùsàla to, bwanga kampànda. Ne kabàvwakù bafwànyine kungaanyishila bwà mèmè kulwa naatù mu Ètats-Unis katùyi dyàmbedi twanji kutwibwa cisàlù to, pàànyi ncìyikù mwà kucipeta mu Àfrikè mujimà amu to. Kàdi bu wèwè muswè kumanya ne kàvwa nkànà kàà ntambwe anyi kì nkòkò, kàtuute ànu tuumapì ndambù cyanààna. Kàvwa kafwànyine kujuukila kuulu bwà mvità bwà kukuleeja ne nkànà kàà ntambwe, bwà—bwà mu mùshindù awu kàkuleeja mwaba wùvwàku kiimànyine.

6 Ki mùdìbì bikèngelà wèwè kwenza ku musangu ne ku musangu, udi mumanyè's, kubìndulula, bwà kujandulakù. Kàdi, mpindyewu, katwèna tufiika munda bu kànà kàà ntambwe to; tudi ànu—tudi ànu tunanga aci cyanààna, bwà...bwà bantu kwelabò nkonko. Ne nkonko yà mùshindù awu ayi, Mwanèetu wa bakàji Ruth, mmìmpè be, bwànyi mèmè. Yìdì...Ntu—ntu munangè nànkù, wamònu's. Yà mùshindù wà lwonji ayi nyìdì yìngenza bibì. Kadi ayi yìdì...alu lùvwa lulenga.

7 Mpindyewu tudi ne ndambu wa nkonko mìmpè, yà yìsàngulujangana, miikàle ànu ya kwètù kumbèlu. Kùdì muiishi paanyimà pààpa mu cibambalu cyà paanyimà cyàcyà mpindyewu mene, uvwa munkonkè, wàmba ne: “Bapròfeta bàbìdì bàà mu Bwàkabuulwibwà 11 abu, mbafwànyine kulwa kumpàla kwà Dyambwibwa anyi? Anyi pabwìpì menemene ne kuumusha kwà Izàlèlèla mu cyalu? Ne ncinyì...” Mpindyewu, nkonko yà mùshindù awu nyìdì—nyìdì—nyìdì yìkutàcisha mu meeji. Kàdi nkonko mipèpèle yà mùshindù ewu yòyi kayèna ne bwalu to.

Kàdi mpindyewu, kumpàlà kwà twétù kubanga, twinyikàayi mitù yètù bwà disambila.

⁸ Taatù, mbimanya ne paÚvwà ne bidimu dikùmi ne bìbìdì, bààkaKusangana mu Ntempèlù ne bafùndi ne beena meeji, uyiikilangana naabò pa Mifùndu. Ne bôbò—bôbò bààkakèma bikolè bwà... bantu bàà kale, ne balongeshiibwe bimpè mu Mifùndu, kàdi bàmona Mwàna wa balùme mukesè wa bidimu bitwè ku dikùmi ne bìbìdì mufwànyine ànu—ànu kubwejakajangana lungènyi, mu dyumvwija dyà Mifùndu. Wèwè uwva mudifile ku maalu a Taatù Webè. Wákambila mamw'Èbè ne: “Kwèna mumanyè ne Ndi ne cyà kwikala mudifile ku maalu a Taatù Wanyì anyì?” bwà kuumvwija Mifùndu ne dyumvwija dyàyi dyà mu nyumà.

⁹ Nènku mpindyewu nyewù tulòmba, Mukalenge, ne—ne bu mùdì Wèwè mumanyè mutùdi ne mateketa ne bapuuyle, ne mutùdi twenza bilèma, bwà Úlwekù ànu neetù dilòlò edi mu mmwènekèlu wa Nyumà Mwimpè, ne utùmvwijèku Mifùndu. Ndi mèmè mwindile ne muKweyèmène Wèwè. Ne byòbì bifwànyine kwenzeka ne, pa dîbà kanà dyònsò, mèmè nteetè kwela meeji àanyi sungasunga anyì dyumvwija anyì cintu kampàndà cyà budisu, bwà kuteeta kucifikisha ku dimwèka ne mùshindù wùndi mèmè nyùmvwija awu ngùdi mufwànyine kwikala wà cyà bushùwà, ùmbwikidjèku mukana, Mukalenge, m'Ùdi mufwànyine... muWàkabwikidijà nyama yà ntambwe, pààkalwilayi Danyèlè apu amu. Wèwè ucìdi ànu Nzambì umwèumwè awu.

¹⁰ Nènku biikalèku byònsò... Bu mutùdi beeyèmène Nyumà Mwimpè, swàku bwà Yèyè àtùbuulwilè ànu bintu ebi cyanààna. Ne dîbà adi pàdiYe ùbyàmba apu, bivwijèku bitòoke tòò mu mùshindù wà ne ewu udi mwelè lukonko awu àpetè mwà kuCyàkidila. Ne cyòci cyandàmùne bibèngàngàne ne cìntù mèmè misangu yònsò mwitàbùùje, dîbà adi mwoyi wànyi wùsankè pààwù, Mukalenge, bwà kumanya ne ngàapeci cintu kampàndà cyà cipyacipyà, ne mùshindù kampàndà mwimpè wà Mukalenge. Bwalu Wèwè wákamba ne: “Kenkètaayi Mifùndu, bwalu mu Yòyi nudi nwela meeji ne nudi ne Mwoyi wà Cyendèlèlè, kàdi pàabi Yòyi ayi n'Yidi yiMfidilà bujaadiki.”

¹¹ Mpindyewu, paanyimà pàà dilongesha dyà Mifùndu edi, ndifwànyine cyà bushùwà kujuula meeji àbùngì ne bikwàbò. Nènku ndi ndòmba, Nzambì, mpindyewu udi nkonko yònsò eyi mimwèke bu ne mmyela ne kalolo ne musàngèelu wònsò ewu, swàku bwà Nyumà Mwimpè ayàndàmùnè ne musàngèelu ne kalolo kònsò. Bwalu tudì tulòmba nùnkù mu Dîna dyà Yesù, ne bwà butùmbi bwà Nzambi, ne bwà diibaka dyà Èkéleeziyà Wendè. Amen.

¹² Kùdi misangu yàbùngì kùkaadi tubingilà twà citù twà ní ncinyi cyònsò, twikale ànu tùnyangakaja bulenga bwàci bwinè. Nènku mpindyewu, nkonko mmyediibwe pa Mufùndu ewu.

13 Mpindyewu, mèmè ngaakula byèla kashibà dilòòlò edi, ndi ne dínù ditùùla. Kàdi pândi ndyàluja, ncyênà mpeta mwà kuyiisha to, ndi ntekesha lubilu pândi nyiisha; pândi ndyùmusha, ndi bu udi wela kashibà.

14 Mândàmù Billy Graham ùvwa ùlonda bwalu bwa bàyendè ne, musangu wùkaadiyekù mumumòne mutàmbe kubinduluka, wùvwa, mpàvwàye ne dínù dyumusha lwà kumpàla eku. Kàdi kudijimijayè, pèndè ne ndongamu wa ku télévision ànu piinè apu, nènku—nènku kàyi mufwànyine. . . . Dìvwa pa dilòngù pàmwè ne mènù makwàbò a ku binyànyàngà mateekapù. Nènku pàdiye ùbanga kwakula, ùvwa wèla tushibà ne “hwi, hwi” wèlela pa dínù adi. Nènku mukàjì awu ùvwa ùlonda ne bàyendè ùvwa mutwè binù, ùsambila ne ùkòpakana, tusunsa dikùmi kumpàla kwà tudyòmbà twà ku télévision atu, ne ndekeelu wa byònsò kusanganabò mwaba wùvwadi dimacile mu cibelu cyà mùpanù wèndè diya mu mwánankàsà wa bisàbaatà byèndè. Umwe wa ku beena mudimu bàà ku cilààla-beenyi nguvwa mudyàngùle, dínù dyà cyamù adi. Ki Mândàmù Graham kulondayè bwalu abu bwà bàyendè, ciinè aci ng’apa’s. Kàdi mèmè ndi naadi mu kapesè kakesè kàà dibèji, ngeela meeji ne ndi naakù mu Bible wanyì ewu emu.

15 Nènku cidi bu. . . patùdì tukùlakaja ndambù ne tulwa bakòòke, nudi bamanyè’s, ne bikèngela bwà twètù kujimija òwò aa, s’bidi byènza bibi. Nènku ewu ndi. . . . pàmvwà mupàtùke ne Mwanèètù Roberson udi paanyimà pààpa wàwa, ne bakwàbò, mvwa ndisukula ne bùloosù mu dindà kampànda kàdi kudyàpula kapesè, ne kukèngelabi bwà nye naadi kùdì ngàngàbukà, bwà kudyàkajayè. Nènku Nzambi àsakidileku mabènesha Èndè.

16 Mpindyewu netwikalè, mpindyewu, nênteetè bwà kujikija lwònsò lwà ku yòyi, mèmè ne mùshindù. Nènku, Mwanèètù Tony, ku ngàsà wa Nzambi, ndi mupetè dyumvwija dyà cilòòtà cyèbè, ne cívwa cìmpè be. Ndi ne disànkà dyàbùngì dyà kumòna cyòci aci. Ne ndyumvwija dìmpè, mu mùshindù wà ne ndi ngeela meeji ne kabìvwa bikèngela kucyamba bantu bónsò batèèleje kaaba aka to, pa nàнку nènкупèèshèci pàà nkààyeetù bu wèwè—bu wèwè kùyi mwà. . . . wèwè muswè bwà kwikalaci mùshindù awu. Yèyè ùvwa munkonkè dilòòlò adi, ùvwa ne cilòòtà, kàdi ncívwa mwà kumwambila cívwàci menemene to pàmvwà nciyi muyè kùdì Mukalenge ne mucisambidile. Pashiishe Mukalenge kucimbuulwilaYè ne kungambileYe cívwa dyumvwija. Mbilenga be, ne mmukenji mulenga bwèbè wèwè, Mwanèètù Tony.

17 Mpindyewu, mu lukonko lwà kumpàla. Mpindyewu, ncyênà ànu mumanyè pàà kwanji kubangila to, bwalu yònsò mmìmpè. Kàdi, mpindyewu, tudi tuteeta bwà kubènga kwangata mukùngùlù mupitèpìte bule, kàdi pàmwàpa tudi mwà kuyijikija mu dyàlumingu, twètù katùyi bayijikije.

51. Umvwijaku cidi “dinyooka dyà kashidi” dyùmvwija, mu Maatàayi 25.46. “Kàdi. . .” Ki lukonko ndwòlò alu.

52. Pashiishe, lukonko lwibìdi : “**Kàdi bânà bàà bukalenge nebhèdiibwè mu mîdimà ya pambèlu,**” aci cidi bu mwomùmwè ne kubèèla pambèlù pàà meeji a Nzambì anyi?

¹⁸ Èè, mpindyewu, angàtà lukonko lwèbè lwà kumpàla alu, lùdi lùsanganyiibwà mu Maatàayi Munsàntu, nshapità wa makùmi abìdi ne. . . wa 25 awu alu. Mpindyewu netwìkalè. . . Mpindyewu, ncyènàku mulongè yòyi eyi to, ndi mutàpeku ànu disù cyanaàna paanyimà pààpa, ne muteetè ànu ne mwànyì mwònsò bwà kuyitàngila mwònsò mùmvwàku pàànyì—mùmvwàku pàànyì mumanyè amu. Ne wànyì. . . Buulùlaayikù pàmwè naanyì mu Bibles yènu amu, patùdi tuCilonga apa. Mpindyewu, mvwa muswè kupàtwila cyòci eci mu nkòngamyakù wa cyena-Ngelikà kabìdi, bwà nùpetèku cyà—cyà ku cibangidilu cyà cyòci aci. Ne mèmè ntu—ntu munangè nàнку awu. Pa nàнку dîbà adi netùCìpetèle ne mu—ne mu—mu cyena-Ngelikà ne mu cikwàbò. Ne mpindyewu eci necìikalè—necìikalè ne lujòòkò ndambù, ne kulonga, bwalu bidì bikèngela bwà mèmè kwolola cyanza kukwàta Mifùndu ànu mwaba wùndi mwà kuyipetela awu, ne kuyitèeka mu kaaba kàayi. Èyo.

¹⁹ Mpindyewu, kùdi muntu ùkeba Bible wa kulonga nendè anyi? Wèwè nendè dijinga, ela cyanza muulu. Nèнку tudi. . . Ngeela meeji ne tudi naayi yisàtù anyi yinaayi kaaba aka. Wèwè muswè kulongela ku Mifùndu, èyo. Mwanèetu Cox, udikù mwà kulwa kaaba aka bwà kumpeteshakù Bibles eyi anyi? Ne bidì—bidì bîmpè bwèbè wèwè, bu wèwè mwà kucyèenza, bwà. . . (umwèpelè nyèyè awu, nèнку yǎngàte ànu—ànu cyanaàna wèwè muswè, bùngi abu). Nèнку kwòkò muntu muswè umwe, lamà ànu cyanza cyèbè aci muulu, nsongàalumè awu neàkutwàdìlèye buludì, wamònu’s. Nèнку tudi baswè kulonga eyi pàmwè, ne ànu. . .

²⁰ Mpindyewu, pa kubala eku ne nshapità yà ndekeelu eyi. . . nshapità mwandamutekètè yà kumpàla yà Mukàndà wa Ebèlù. Paanyimà pàà dilongesha, mu bushùwà bwà bwalu, nsongàalumè udi mubifunde ewu, byena-bwalu ebi, Mwanèetu Mercier ne Mwanèetu Goad, bàdi naabi ne bàdi mpindyewu munkaci mwà kubìlongolola bwà kubìpàtula bu mukàndà. Nèнку bòbò bàdi naabi. Mpindyewu. . . ne katwèna ne cintu nànsha cìmwè citùdiku basaasulùle bafikè pankaci to, tudi bakoonyè ànu pamutùpamutù. Ne ndi ngeela meeji ne mbayicincike. . . ne bapàtùle bi—bimpokoto abi mu. . . ne biikale ànu bàpelula bimpokoto abi, ànu ndambù wa bimpokoto byà dilongesha dyà Ebèlù. Mwanèetu Mercier neikalè naabi àdi panshì aa, bituuta ku cyamù, bwà muntu yònsò udi naabi dijinga awu.

²¹ Mpindyewu eci mwòmò emu, cidi citwàla. . . Kwènà anu mwà kulonga. . . mu èkèleeziyà wa butangadiki, bwalu ewu

ng'èkèleeziyà wa butangadiki. Kwènà mwà kwenza di—dilongesha kùyi ujuula minunganyi ne meeji byà bantu bààbungi to. Nebikebè ànu mwà kwenza nàнку awu. Mpindyewu, mémè ndi kule be ne kwikala mulongeshi, ncyèna muumvwiji wa Bible to nànsha kakesè. Kàdi ncutukù nteeta bwà—bwà kwamba nî ncinyi nî ncinyi, anyi mene kwenza nî ncinyi nî ncinyi, nciyi mwanji—mwanji kukonkoloja anyi kujandula cintu cyanyi cyà citàmbe bwimpè bwàci to.

22 Bàvwa bangeelè lukonko kùdi mwanèètù wa balùme munanga kampànda, makèèlèlà dilòòlò awu, wàmba ne: “Mwanèètù Branham, Mwanèètù Seward wàkamba musangu kampànda ne wèwè—wèwè kabèèna ànu mwà kukubàmbidikilakù panshi mwaba nànshà wùmwe to. Wamònu's, udi misangu yònsò ànu upeta mùshindù kampànda wà kupàtukamù anyi wà kufinukilapù.”

23 Mémè kwamba ne: “Èè, kabingilà kàà aci kàdi ne, ntu misangu yònsò ànu nteeta kwela meeji kumpàlà kwà kwenza nî ncinyi cyònsò. Wamònu anyi? Ne pashiishe pàkaadi bantu bànkona, dîbà adi ndikù mwà kubàmbila cìvwa meeji àanyi. Wamònu anyi?” Kàdi ngwèwè wela meeji majaalàme's. Ne kumpàlà kwà wèwè kwenza cintu kanà cyònsò, teetaku bwà kwangata luseke lùvwa Nzambi mufwànyine kwikala muswè bwà wèwè kwangata alu, dîbà adi mbifwànyine cyà bushùwà kwikala bikolè bwà kukubàmbidikilabò panshi.

24 Kanwèna bafwànyine kudifwànyikijila musangu wùvwa—wùvwa Aakàbà úteeta bwà kubàmbidikila Eliyà panshi awu to. Nudikù mwà kudifwànyikijila musangu wùvwa Bàfaalèsà bàteeta bwà kubàmbidikila Yesù panshi awu anyi? Nwamònu's, Yèyè úvwa—Yèyè úvwa úpeta dyandamuna ne lukàsà lwònsò, bwalu cyònsò cìvwaYe wènza, Úvwa úcyèna ku diswa dyà Nzambi, ne Yèyè...ki mùshindù úvwaYe—úvwaYe mwà kucipeta ngwòwò awu. Mpindyewu, mùshindù awu ngutùdi baswè ku cyòci eci.

Mpindyewu lukonko ndwedibwe, netùshaalè balamàte ku lukonko alu:

Umvwijàku cidi “dinyooka dyà kashidi” dyùmvwija, mu Maatàayi 25.46.

25 Mpindyewu tèèlejàayi ne ntèmà yònsò. Bantu bònsò mpindyewu, Maatàayi 25.46:

Nenku aba bóbò nebàbwelè mu dinyooka dyà kashidi...

26 Mpindyewu, lukonko ludi ne: “Ncinyi...Umvwijàku...” Mpindyewu mwakù *dyà kashidi* wùdi wùfùma ku mwakù “kashidi ne kashidi,” ne *kashidi* mbwena kwamba ne “cipòdòlò cyà cikondo.” Cidi ànu cyùmvwija ne “cikondo bule kampànda,” bu mùdi *kashidi*. Mpindyewu bu nwènù ànu mwà kubala... Ncyèna mumanyè ne udi mufunde nkonko eyi nganyi to, bwalu

muntu kî mmufündepù dîna dyèndè to; kabìwva bikèngela bwà kudifûnda to, ncyèna naabi bwalu to, nwamònu's.

Kàdi aba bôbò nebàbwelè mu dinyooka dya kashidi: . . . (Mpindyewu tàngilàayi, ki beena lwonji mbôbò abu.)

²⁷ Mpindyewu, wêwè mukwètù munanga—munanga udi mwelè lukonko elu awu, balàku ànu bìdì bìCilondà abi:

. . . kàdi baakàne mu mwoyi wà cyendèlèèle.

²⁸ Beena lwonji nebàbwelè mu dinyooka dya kashidi (cipòòlò kampàndà cyà cikondo's), kàdi baakàne bôbò bàdi ne Mwoyi wà Cyendèlèèle. Kwàkupetakù dinyooka dya Cyendèlèèlè to, kî ndifwànyine kwikalakù to. Nwamònu's, bôbò bapetè dinyooka dya Cyendèlèèlè, nànkù's bàdi ne Mwoyi wà Cyendèlèèlè; bôbò ne Mwoyi wà Cyendèlèèlè, s'mbasùngidìibwe. Nwamònu's, kadyèna mwà kwikalakù to. Mpindyewu bu nwènù mwà kutàngila, lu—lukonko lwòlò lwinè lùdi lwediibwe. . . s'lùdi ludyàndamuna lwòlò lwinè. Nwamònu anyi?

Nènku aba bôbò . . .

Mpindyewu tàngilàayi, nêngàngatè kumpàla kaaba aka:

. . . nènku bôbò . . .

²⁹ Mu mvensà wa 20 . . . wa 44:

. . . nènku bôbò pààbò bàakandamuna, e kuMwambila ne : Mukalenge, ndìbà kaayi ditwikalà ne nzala, mwikàle ne nyòdà, ne mwenyi, ne butakà, . . . ne mu bùlokò, kàdi katùyi bakukwàcishe?

Dìbà adi—dìbà adi yèyè neàbàndàmùnè, wàmba ne: Bulelèlè ndi nwavambila ne: Mu mùshindù wunùdì nwènù bacyènzèle . . . umwe wa ku bàdì batàmbe bukesè bàà ku bôbò aba awu, nudi bacìngenzèle . . . mèmè.

Nènku aba bôbò nebàbwelè mu dinyooka dya kashidi (dya kashidi): (ki beena lwonji mbwòbò abu) . . . kàdi baakàne mu Mwoyi wà Cyendèlèèlè.

³⁰ Nudi bamòne dishìilangana adi anyi? Beena lwonji bàdi ne dinyooka dya kashidi, kàdi *dya kashidi* mbwena kwamba ne “cipòòlò kampàndà cyà cikondo.” Mpindyewu, bu ne bìwva cintu cìmwècìmwè aci, nùnkù ncifùndìibwe ne: “Nènku aba nebàbwelè mu dinyooka dya kashidi, bakwàbò aba nebàbwelè mu mwoyi wà kashidi.” Nwamònu anyi? Anyi ne: “Nebàbwelè mu dinyooka dya Cyendèlèèlè, ne bakwàbò abu mu mwoyi wà Cyendèlèèlè.” Nwamònu's, kwokù kwikàle dinyooka dya Cyendèlèèlè, bwà kunyookiibwa kashidi ne kashidi, dìbà adi's kùdì dya Cyendèlèèle . . . yèyè ùdì ne Mwoyi wà Cyendèlèèlè; ne Mwoyi wà Cyendèlèèle wùmwepelè ngùdì wùfùma kùdì Nzambì. Cyònsò cìdì kacìyi ne ntwàdijilu kacyèna ne ndekeelu to, ne cyònsò cìdì ne ntwàdijilu cìdì ne ndekeelu. Nudi bamòne cìdì njinga kwamba aci anyi?

³¹ Mpindyewu, Mufùndu Wòwù mwinè wùdi mu—mukwètù munanga ewu mwandàmùne. . . Mpindyewu nwènù bacyängàte mu nkòngamyâkù ne: “Nènku aba bôbò nebàkabwelè mu ainion, buumusha, ne mu dyà kashid-. . .ne ku kapyà, dijiba dyà kapyà.” Mpindyewu, mwakù *a-i-n-i-o-n* wùdi wùmvwija “cipòòlò kampàndà cyà dinyooka.” Mu nkòngamyâkù wà cyena-Ngelikà, apa mene, “cipòòlò cyà dinyooka,” anyì, “cikondo cyà dinyooka.” Nwamònu’s: “Nebàkabwelè mu cikondo kampàndà cyà dinyooka.” Mwakù wùdi mwangata, *a-i-n-i-o-n*. *Ainion*, udi umvwija ne “bikondo, cikondo kampànda, cikondo kampànda cikòsa.” Dìbà adi wängätùlùlaayi mu—mu nkùdimwinu ewu kaaba aka, mu Anglais, *dyà kashidi* mbwena kwamba ne “cikondo kampànda cikòsa.” Nwamònu’s, cìdi cìfùma ku cyena-Ngelikà, “cikondo kampànda cikòsa.” Mwakù *ainion*, anyì *a-i-n-i-o-n*, *ainion* mbwena kwamba ne “cikondo kampànda cikòsa cyà dinyooka.”

³² Kàdi dìbà adi balàayi bikwàbò abi ne: “Kàdi abà nebàbwelè mu dyà Cyendèlèlè.” S’ncishiiàngàne. Nwamònu’s, Mwoyi wà Cyendèlèlè. *Dyà Cyendèlèlè* ùdi ufùma ku mwakù “Cyendèlèlè,” ne Cyendèlèlè kacìvwakù ne ntwàdijilu anyì ne ndekeelu to. Cìdi nkashidi *ne* kashidi. Mpindyewu’s bìvwa bikèngela aci kwandamunaci lukonko alu, nwamònu’s, bwalu nwènu ànu babalè Mufùndu awu ne ntèmà yònsò, s’nenùmonè.

³³ “Nènku aba nebàye kabwela mu dinyooka dyà kashidi, kadi baakàne. . .” Beena lwonji nebàbwelè mu dinyooka dya kashidi, banyookiibwa bwà cipòòlò kampàndà cyà cikondo; pàmwàpa bidimu mùliyaalà mujimà, ncyèna mumanyè to, kàdi ncyà bushùwà ne neunyookiibwè bwà mpèkaatu yèbè. Kàdi bu mùdìbi cyà bushùwà ne mpèkaatu ùvwa ne ntwàdijilu, mpèkaatu ùdi ne ndekeelu. Dinyooka divwa ne ntwàdijilu, ne dinyooka didi ne ndekeelu. Ne ifernò wàkafùkiibwa bwà dyabùlu ne banjèlò bèndè. Nwamònu anyì? Eyo. Mpindyewu, ndi ne lukwàbò kwìnshì eku lwà kwandamuna mu cyôci aci, katanci kakesè cyanààna, lwikàle lulenga lwà dikèma, lùswikakana naalu.

Mpindyewu, kàdi eyi nùnkù kaaba aka: “**Kàdi bânà bàà bukalenge nebèèdiibwè pambèlu mu mîdimà,**” aci ncyenzè bu cyà mwomùmwe ne kwimanshiibwa pambèlu pàà meeji a Nzambi anyì?

³⁴ To, kî ncifwànyine kwikala cimwècimwè aci to. Mpindyewu, apa wèwè udi uleedila ku Didya dyà Dibanji. Mpindyewu: “Nènku bânà bàà bukalenge,” mùvwàbò beelè lukonko kaaba aka. Bânà bàà bukalenge abu mbeena Yudà, ne bôbò mbààkeediibwà mu mîdimà yà pambèlu. Ne bôbò—bôbò mbàdi beediibwe mu mîdimà yà pambèlu, ne mbapicile mu cikondo cyà myadi ne kutwà kwà mikèmù ne disùmakaja dyà ménù. Bààkeediibwa mu mîdimà yà pambèlu bwalu ncìvwa cìfwànyine kutùpèeshakù wèwè ne mèmè cikondo cyà kunyingalala, kàdi kabàvwakù beediibwè pambèlu pàà meeji a Nzambi nànsa. Yèye

kàadyàkupwàku Izalèèlà mwoyi to. Ne Izalèèlà awu, ànu mùdi mubadi kanà yònsò wa Bible mumanyè, ngudi ubikidiibwa ne “bànà bàà bukalenge.” Nwamònu’s, mbukalenge, mulayi awu. Mu ngaakwilù mukwàbò, Nzambì úkwàta mudimu ne ditunga adi, pàvwàYe ukwàta mudimu ne Izalèèlà apu, bàdi biikàle bànà bàà bukalenge.

³⁵ Mpindyewu, vùlukàayi ne, Yèyè mmwambè mwaba awu ne: “Ne Abraham ne Izàkà ne Yakòbò,” mu mwaba kampànda ne, “bàvwa mwà kulwa ne kusòmba mu bukalenge ku cikondo cyà ku nshìikidilu.” Nwamònu’s, ne Abraham, Izàkà ne Yakòbò bàvwa mwà kwikalenge amu; bòbò mbàvwà, mbàvwà cisàmbà cyà dibènesha cyà bukalenge. Kàdi bànà bàà bukalenge nebèediibwè mu mîdimà yà pambèlu.

³⁶ Mpindyewu, mwaba wùdi dileedila adi difùmina apa awu wùdi—wùdi m’Mubàki. Pàakalwà Mubàki, pàcìvwàbo. . . Bâtaanu bàà ku bàavirgò abu bàakayà bwà kutwilangana ne Mukalenge, kàdi—kàdi kabàyi bangàte maanyi mu myèndù yàbò to. Kàdi ba—bakwàbò bâtaanu bòbò bàakangata maanyi mu myèndù yàbò. Mpindyewu, bu nwènu mwà kumòna, ncimfwànyì cilenga be, ne bwà beena Yudà ne bwà bàà Bisàmbà byà bendè, bu babèngiibwe. Lamàayi bwalu abu mu meeji ne, kùtu bitùpà bisàtù byà bantu dîbà dyònsò: beena Yudà, bàà Bisàmbà byà bendè (bàà mmwènekèlu wa kwîsùkwîsù abu), . . . ; beena Yudà, bàà Bisàmbà byà bendè, ne Èkèleeziyà. Nwènu babàbwejàkàje, ncyà bushùwà ne nenùpetè lutàtù panùdi nukafika mu Bwàkabuulwibwà. Bwalu nwènu kanùyi. . .

³⁷ Mwàkangambilà Mukalenge Bohanon mungà musangu, ne: “Billy, muntu kanà yònsò wàteeta kubala Bwàkabuulwibwà awu mmufwànyine kupeta bilòòtàlòòtà. Mòna’s,” mwàkambàye, “ki Mukàji-musèla nyewù panshi pa buloba apa, ne—ne dragon ùpwidija màyi a mukana mwèndè bwà kuMulwisha mvità.” Ki Yèyè ne: “Pashìishe pa dîbà dimwèdimwè adi Mukàji-musèla mmwimàne bu binunu lukàmà ne makùmi ànaayi ne binaayi” (dìlongesha dyà Bantèmu bàà Yèhowàh’s) “pa Mukùna wà Sinaayi. Ne pa dîbà dimwèdimwè adi Mukàji-musèla ùdi mu Dyulu.” To, to, wèwè ngudi mutùpàkàne.

³⁸ Kùdi bitùpà bisàtù byà bantu. Nwamònu’s, mbwena kwamba ne, beena Yudà babèngiibwe abu, ne kùdi virgo udi mukùtākàne udi màyi. . . Kì n’Dimiinu dyà mukàji adi nànsha, mbàshàadilè bàà ku Dimiinu dyà mukàji bàvwà dragon mupwidijile màyi a mukana mwèndè awu. . . Bwàkabuulwibwà 11. Ne pashìishe, mu bushùwà bwà bwalu, kakùyi mpatà to binunu lukàmà ne makùmi ànaayi ne binaayi bàà beena Yudà abu kabàvwa Mukàji-musèla to, mbàshàadilè bàà ku èkèleeziyà wa beena Yudà. Kàdi dìlongesha dyà Bantèmu bàà Yèhowàh dîdì dibàtèèka bu ne m’Mukàji-musèla adi, mèmè ncyèna mmòna mùdiku mufwànyine kwenza nànkù to, bwalu, kì m’Mukàji-musèla to.

³⁹ Bu nwênù mwà kumòna mu Bwàkabuulwibwà amu, nCyambè ne: “Ne bôbò mbaavirgò.” Ne bôbò mbatungula. Kàdi mutungula ùvwa nganyi? Bàvwa . . . Batungula bàvwa mbalami bàà ku ntempèlù bàvwa bàlamà mukalenge-mukàji, bwalu bàvwa . . . bwal- . . . Bàvwa bantu balùmè bàvwàbo bavwijè batungu. Bàvwa ne . . . Nuvwakù bamòne ne, mbambè ne: “Bôbò kabààkanyangukakù ne bakàji” anyi? Bàvwa mbatungula bàà ku ntempèlù. Ne cìvwa mbùngi busòbola bùvwà Nzambi mwàngate mu basungula bàà beena Yudà. Mpindyewu, bu nwênù mwà kumòna . . . Bu twètù ànu mwà kwangata cyôci aci katanci kakesè cyanààna, bwà cyàmònakù mwà kucisòmbesha mu meeji ènù amu, munùdiku bulelèlè mwà . . .

⁴⁰ Twàngatàayi Bwàkabuulwibwà nshàpità wa 7, nènku netùjandulè kaaba aka mpindyewu, mwaba wùdi . . . cidiCi cyambè. Ncintu cilenga be:

Nènku paanyimà pàà bwalu ebu . . . ngàkamòna banjèlò bànaayi biimàne ku ntengu yinaayi yà buloba . . . (mpindyewu, eci cidi cyènda pàmwè ne Yèhezèkèlè 9, mwàkamònàye dibùtudiibwa dyà beena Yudà. Kàdi apa ùdi ùmòna dibùtudiibwa dyà bàà Bisàmbà byà bendè, Bwàkabuulwibwà, nshapità wa 7) . . . Nènku *ngàkamòna banjèlò bànaayi biimàne ku ntengu yinaayi yà buloba, bakwàte mpeepèle yinaayi (mpeepoèle mbwena kwamba ne “mvità ne dikòkangana”)* . . . *bwà lupeepèle kalùtuutu pa buloba, anyi pa mbù, . . . anyi mucì kanà wònsò to. (nènku aci mmvità, “bakwàte”)*

⁴¹ Kaa, bu ne tuvwakù ne dîbà dyà kubwela mu disùnsula dyà lukonko elu's wè. Aci ncyenzèke . . . Mwaba awu ki wùvwà Russell mupepetèle cibwejàkàji. Russell wàkamba cipròfetà, pa kumòna cyôci eci cilwa. Wàkamba cipròfetà ne “cìvwa mwà kwikala Dilwa dyà Mukalenge Yesù,” kàyi mumanyè ne cìvwa ndi—nditwibwà dyà citampì dyà Èkèleeziyà to. Nwamònu anyi?

⁴² Ne bàdi bàdikonka mùvwà mvità yà buloba bujimà . . . Mvità yà Kumpàlà yà Buloba bujimà. Tàngilàayi, yàkiimana mu matùkù dikùmì ne òmwè dyà ngondo wa dikùmì ne umwe, pa dîbà dikùmì ne umwe dyà ditùkù adi; ngondo wa dikùmì ne umwe, ditùkù dyà dikùmì ne òmwè, pa dîbà dyà dikùmì ne umwe. Ne dyàkàmwè paanyimà pàà cyôci aci, dibàtiiza dyà mu màyi mu Dîna dyà Yesù dyàkabuuludiibwa ne Dibàtiiza dyà Nyumà Mwimpè kùdi Èkèleeziyà. Menemene, dyàkàmwè paanyimà pàà cyôci aci.

⁴³ Nwênù bacyàngàcile mu Bwàkabuulwibwà amu, mùshindù wutùdi baCitwàngàje pàmwè, ne pankaci pàà Cikondo cyà Filàdèlèfiyà ne cyà Laòdikiyà. Nènku ba-Méthodistes mbàvwà beena Cikondo cyà Filàdèlèfiyà aci, dinanga dyà bwànà bwètù. Ne cikondo cyà ndekeelu, cikondo cyà èkèleeziyà, cìvwa n'Cikondo cyà Laòdikiyà, cìvwa cikondo cyà civùmvù aci. Ne

Yêyè mmwambè mwômò amu ne: “Ndi mutèeke ciibi (ciibi cyunzulula) kumpàlà kwèbè.” Ciibi cyunzulula! Nènku nwènù baleedile ku yôyi Mifundu ayi, necitwangajè Mukenji mujimà buludì mu kaaba kàmwè mwômò amu, bwà kunùleeja anu menemene.

44 Tàngilàayi! Apa byònsò bivwa ànu Taatù, Mwànà, Nyumà Mwímpè, mu dibàtiiza, (netwikalè mwà kubwelamù buludì) cìvwà kakùyi mpatà to twitabàayi wa beena Kàtòlikè ne kaciyi dilongesha dyà beena Kìlistò to. To, mukalenge. Ndi mfùma ku . . . Tudi naaci mwaba ewu mene, dilòlòlò edi, bwà kubwelamù; pàmwè ne nkòngamyakù kabidì. Nwamònu anyi? Eyowà’s, mukalenge, kabidì ne maalu-malonda. Kacya kakùvwakù kwanjì kwikala muntu nànsha umwe mubàtìjijibwe mùshindù awu mu Bible to, anyì nànsha bidimu nkàmà yisambòmbò paanyimà pàà Bible. Ne ndi mwà kunùjadikilaci mwab’ewu mene ku dilongesha dyà beena Kàtòlikè sungasunga ne, bòbò mbàkacitwàdijà, ne dimyaminangana ne dipòngolwelangana dyà màyi.

45 Kupàtukabì mwômò amu e kuya kabwela mu èkèleeziyà wa beena Wesley, ne mu èkèleeziyà wa ba-Méthodistes, ba-Méthodistes kuyabò naabi mu ba-Baptistes, ba-Baptistes kuyabò naabi, kàdi dicidi ànu dilongesha dyà mashimi! Kàdi mèmè ndi mwà kwalukila mu Bible ne kunùjaadikila ne Bible mmwambè ne “wèwè udi ne dìnà dyà ne udi ne mwoyi, kàdi udi mufwè.” Ncyà bushùwà menemene. Ne bòbò bàvwa . . .

46 Ndi mwà kujaadika ne Bible mmulongèshe ne bàvwa mwà kukwàta mudimu ne Dìnà Dyèndè mu dibàtiiza too ne mu cikondo cyà mfidimà, bilondèshile ci—cikondo ciinayi. . . cyà—cyà cikondo cyà èkèleeziyà, Cikondo cyà Èkèleeziyà wa Peegàmò. Ne Yêyè mmwambè, mu, munda mwà bidimu cinunu ne nkàmà yitaanu byà bikondo byà mfidimà abi, cyònsò cyà kùdibi, mmwambè ne: “Nkukushàadile kaabukènkè kakesè, bwalu kwèna muvilè Dìnà Dyànyi to.”

47 Pààkafikàbi bwà cikondo cikwàbò aci, cikondo cyà Kàtòlikè aci, Yêyè kwamba ne: “Wèwè udi ne dìnà dyà ne udi ‘ne mwoyi,’ kàdi udi mufwè! Ne udi muvilè Dìnà Dyànyi.” Ki bwalu mbwòbù abu’s. Nwamònu anyi? Cyònsò aci cidi ànu citwàngaja cimfwànyi cilenga cinène, Bible mujimà.

48 Mpindyewu mònayai eci:

. . . bakwàte mpeepèle yinaayi. . .

Nènku ngákamòna mwanjèlo mukwàbò ùbànda ùfùmina mu Dyulu, mwikàle ne citampì cyà Nzambì udi ne mwoyi: . . . (Citampì)

49 Mpindyewu, citampì cyà Nzambì udi ne mwoyi ncinyi? Mpindyewu, nwènù bàna bèetu ba-Adventistes nenwàmbè ne: “Kuneemekela kwà ditùkù dyà nsabatu.” Ndi muswè

nùndeejèku aci mu Mifùndu. Kacyènamù to. Kakwènakù mwaba nànsha wùmwe wùkaadici . . . wùdici—wùdici ciikàle citampì.

⁵⁰ Bu nwènu mwà kubala Efèsò 4.30, ànu lukàsàlùkàsà, nenùsanganè cidi Citampì cyà Nzambi udi ne mwoyi. Efèsò 4.30 ùdi wàmba ne: “Kanùbungamiji Nyumà Mwîmpè wa Nzambi unùdi batwibwe nendè citampì too ne ku ditùkù dyà bupikudi bwènu.” Kì ntoo ne ku ditàbuluja didi dilondà to, kàdi nudi ne dikùbiibwa dyà Cyendèlèlè (uh-huh). “Kanùbungamiji Nyuma Mwîmpè wa Nzambi unùdi batwibwe nendè citampì too ne ku ditùkù dyà bupikudi bwènu.” Mònaayi Efèsò 4.30 nì kèna wàmba nànkù, pashìishè wàngatè mèyi a kumpengà kwà dibèji awu bwà ùcilondèshè mu Mifùndù mwònsò amu, bwà ùjandùle. Mpindyewu: “Batwibwe citampì too ne ku ditùkù dyà bupikudi bwènu. Biikàle ne citampì cyà Nzambi udi ne mwoyi.”

⁵¹ Mpindyewu, vùlukàayi ne, Nyumà Mwîmpè kàvwakù mulongèshìibwe bu Dibàtiiza dyà Nyumà Mwîmpè to ànu paanyimà pàà Mvità yà Kumpàlà yà Buloba bujimà. Tudi tufùma ku ditwà cyanga cyètù—cyètù cyà ngòlò, bidimu makumi ànaayi, anyi cidimu cyà makumi ànaayi cyà cyanga.

. . . ne yéye wàkeela lubilà lukolè kùdi banjèlò bànaayi abu, bàvwà bapèèshìibwe bwà kunyanga buloba anyi mbù,

Wàmba ne: Kanùnyangi buloba, anyi mbù to, anyi mucì kanà wònsò, too ne patwikalà batwè citampì basadidi . . . (mpindyewu ukàadi upweka ku lukonko lwèbè alu lwà ne, “bànà,” wamònu’s) . . . basadidi bàà Nzambi wetù pa mpàla, (kanùnyangi, kanùbùtulu buloba, bómbe bwà mushindà kabùtaayikikù to, kanùbùtudi cintu mu kaabujimà to too ne piikalà basadidi bàà Nzambi wetù batwibwe citampì)

⁵² Mpindyewu, bu twètù mwà kwaluja aci ne kwalukakù paanyimà pààpa, mùvwàbi ne—ne nànsha mene mu mukàndà wà *Diimana dyà Mvità yà Buloba Bujimà*, mu mupimbu mwibìdi, pààkalwanganà Kalààla kàà mäsàlaayi Allenby mvità too ne pàakadyatàye ku mikàlù yà Yelusàlèma, ki kwelayè nshinga paanyimà kùdi Mfùmù wa Angleterre, kwamba ne: “Ncyèna muswè kutuuta cingoma pa cimenga eci to, bwà ngiikàdilù waci musantu.” Kwambayè ne: “Cìndi ne cyà kwenza ncinyi?”

⁵³ Awu ne: “Sambilà.”

⁵⁴ Ki kubùukayè cyàkàbìdi ne ndèkè kuulu kwàci, ne pààkenzàbo nànkù, kwambabò ne: “Allenby nya’ wìya.” Kàdi kùvwa Baamùzùlùmanyi muntwamu, kwelàbò meeji ne yéye wàkamba ne: “Allah nya’ wìya.” Ki kubàndishabò dibèndelà ditòòke ne kùdìfilabò ne Allenby kubwelayè mu Yelusàlèma wènda wènda ne kumukwàtayè kàyi mutuutè cingoma nànsha cimwè to, bilondèshìle bipròfetà, ncyà bushùwà, ne kumwalujilayè beena Yudà.

55 Pashiishe kujuulabò Hitler bwà kukèngeshayè beena Yudà, ne pa buloba bujimà, ne kubàsakayè bwà kwalukilabò muntwamu.

56 Ne Bible mmwambè ne Yèyè ùvwa mwà “kubààlujila pa mapwâpwà a nyuunyi wa mukankù.” Nènku pàakabangàbo kwalukila...Cikàndàkàndà cyà *Life* ne bikwàbò mbipàtùle bwalu abu kùkaadi ndambù wa mbingu, mùdìbo babùmùshe babàlùje binunu ne binunu, bwà kulwabò naabò mu Yelusàlèmà, ne kubangabò kwambula bàà bakùlàkàjì abu paanyimà. Bààkabèèla nkonko. Mémè ndi naabì byònsò pa mukàbà wà bindidimbì ne mu maafòtò. Ki kwambayè...Ki dibèndelà dyà mìtootò yinaayi dyà Davidì adi, dibàndisha mwaba awu, dibèndelà dyà ditàmbe kwikala dyà kale pa buloba, musangu wà nzànzànzà wàkapepàdi kacya kùkaavwa bidimu binunu bibidì.

57 Yesù wàkamba ne: “Pèèlà mucì wà mfigì ntòngà, lukòngò elu kalwàkupita nànsha.”

58 Nènku’s ki bóbò bàvwà bàlwa ne bàkùlàkàjì abu abu, ne kwambabò ne: “Cinyì? Nudi nwalukila bwà kufwila mu buloba bwenù anyì?”

59 Bóbò ne: “To, tudi balwe bwà kumòna Maasiyà.”

60 Nènku, mwanèètù, ndi nkwambila ne, tukàadi ku ciibi! S’ki basadidi abu, bàdì bindile kuntu kwàka abu. Kì mmusùmbà wà beena Yudà bàdì bafwànyine kunwiba ne ménù ènù a byamù bu bóbò ne mùshindù aba to, abu kì mbeena Yudà bàdìYè wàmba aba to. Kàdì mbàdì kuntu kwàka bàdì balamè mi—mikenji ne bikwàbò abu, cibì kacya kabàyikù nànsha banji kumanya ne kùtukù Maasiyà kampànda to.

61 Nènku Mwanèètù...ku Stockholm, Mwanèètù Petrus, mmubàtùmine mùliyò mujimà wà tukàndà twà Dipungila Dipyadìpyà, ne pàyipecìbo bàvwà munkacì mwà kuyìbalà. Kwambabò ne: “Èè, ewu yèyè mwikàle Maasiyà awu, tùmumònebì wènza cimanyinu cyà mupròfetà, nènku netùmwitàbùùjè.”

62 Cyalu cilongola kaayìpu bwà mudimu wànyì wà bwambi’s we! Kùkaavwa kunshàadile ànu mèbà àbidì bwà mfikè ku biibi byà Yelusàlèmà, bwa kubwelamù, ne mvwa mu Caire, mu Èjiipitù. Nènku mvwa ngenda muntwamu, ki Nyumà Mwimpè kwambaYè ne: “Kùyì mpindyewu to.”

63 Mémè kudyàmbila ne: “Cìvwa ànu ndidifwànyikijila cyanàànà. Ticket wanyì mmumana kusumba, pàanyì mu njila. Muntu awu’s ùkaadi kuntwaku bwà kutwilangana naanyì, musùmbà mujimà, bilongelu ne bikwàbò byònsò.”

64 Mémè kuya kumpàla ndambù, ki Nyumà kwambaYè ne: “Kùyì to! Kùyikù to!”

65 Mémè kwalukila kùdì musùmbishi wa maatickets, kwamba ne: “Ngààlekèdì ewu ticket. Ndi muswè kuya ku Athène, mu Grèce, ku Mukùnà wà Mars.

66 Ki yêyè ne: “Èè, ticket webè’s mbwà kuya ku Yelusàlèrà, mukalenge.”

67 Mémè ne: “Ndi muswè kuya ku Athène pamutù pàà kuya ku Yelusàlèrà.” Nyumà Mwimpè mwindile, adi dībà kī ndyanji kulwa to. Kabyèna ànu mùdibi bìkèngela kwikalabì to.

68 Tàngilààyi:

...batwè citampì pa mpàlà pàà basadidi bàà Nzambì wetù,

Wamba ne: Kanwènzèdi buloba bibì, ...too ne patwikalà...batwè citampì pa mpàlà pàà basadidi bàà Nzambì wetù. (muntu kanà yònsò mmumanyè ne aci n’Citampì cyà Nyumà Mwimpè; tàngilààyi)

Ne ngákumvwa búngì bwà aba bààkatwìbwà citampì: ... (mpindyewu, bóbò kabàyi beena Yudà to, tàngilààyi eci) ...ne bààkatwìbwà citampì bàvwa binunu lukàmà ne makùmi ànaayi ne binaayi bàà bisàmbà byònsò byà bàà Izàlèlè. (kamùyi wa bàà Bisàmbà byà bendè mu bóbò abu to. Aci nku ndekeelu kwà cikondo)

69 Tàngilààyi! Cisàmbà cyà Yudà, binunu dikùmi ne bibìdì; cisàmbà cyà Luubènà, binunu dikùmi ne bibìdì; too ne kwinshì, Gaadà, binunu dikùmi ne bibìdì; Nefàtàlimà, ne—ne—ne kwinshì too ne ku Azèlè, ne—ne Zaabùlònà, ne bisàmbà byònsò dikùmi ne bibìdì byà Izàlèlè ebi. Nènku dikùmi ne ibìdì kuvudija ku dikùmi ne ibìdì nyìngà? Binunu lukàmà ne makùmi ànaayi ne binaayi. S’ki binunu lukàmà ne makùmi ànaayi ne binaayi abi, beena Yudà! Kí mbàà Bisàmbà byà bendè to, beena Yudà! Aci kacýèna ne cyà dýenza ne Mukàji—musèla nànsha. Nànku Bantèmù bàà Yèhowàh mbatùpàkàne mu dilongesha dyàbò adi. Bible ùdì wamba ànu patòòke tòò ne “mbeena Yudà,” ne kí mbàà Bisàmbà byà bendè nànsha. Bóbò mbasadidi bàà Nzambì, ne bàà Bisàmbà byà bendè kacýa kabàtukù bangàciìbwe bu basadidi to. Twètù tudì bàà bàà balùme ne bàà bakàji, katwèna basadidi to.

70 Mpindyewu balààyi ntùngunukilu waCì awu. Byenzè bu muntu uvwa udyà cibimbi awu, kwambayè ne: “Ncìmpè, kàdì tudyekù cikwàbò.” Èyo, Nzambì ùdì naaBì búngì cyakaa mwab’ewu. Mpindyewu, mònaayi ànu cyanààna. Mpindyewu, mpindyewu tudì ku mvensà wa 8:

Ne bàà cisàmbà cyà Zaabùlònà...kutwà citampì binunu dikùmi ne bibìdì. Bònsò bàà mu cisàmbà cijimà cyà Yòzefù bààkatwìbwà citampì bàvwa binunu dikùmi ne bibìdì. Bàà mu cisàmbà cyà Beenyàminà bààkaatwìbwà citampì bàvwa binunu dikùmi ne bibìdì.

71 Nwamònu's, Yone, bu mùvwàye mwena Yudà, wàkajingulula cyònsò cyà ku byòbi, wàkamòna bisàmbà abi dikùmi ne bibìdi byà Izalèlèlà; binunu dikùmi ne bibìdi mu cisàmbà cyònsò, dikùmi ne ibìdi kuvudija ku dikùmi ne ibìdi biikalè byenza binunu lukàmà ne makùmi ànaayi ne binaayi. Ki bôbò abu, kàyi Èkèleeziyà to, beena Yudà. Bible mmwambè kaaba aka ne, bàvwa bònsò “bànà bàà Izalèlèlà,” cisàmbà ne cisàmbà cyònsò citèèla mu dìnà.

72 Mpindyewu tàngilàayi, mvensà wa 9:

Paanyimà pàà maalu aa (mpindyewu ki Mukàji-musèla ulwàlwa ewu) . . .

Paanyimà pàà maalu aa ngàkatàngila, . . . mònaayi, musùmbà munène, wùvwà muntu kàyi mwà kubala, . . .

73 Ki batungula bèènù bàà ku ntempèlù mbôbò abu, bàdi ànu binunu lukàmà ne makùmi ànaayi ne binaayi cyanàànà, ànu kamòtò kakesè cyanàànà, ànu balami bakesè bàà ku tempèlù biikalà ne Mukàji-musèla abu; ànu bashindikiji Bèndè cyanàànà—Bèndè cyanàànà. Ki binunu lukàmà ne makùmi ànaayi ne binaayi mbyòbi abi, mbashindikiji bàà Mukàji-musèla; batungula bàà ku ntempèlù.

74 Tàngilàayi! Mu bushùwà bwà bwalu, ndi mumanyè ne nwènù nudi nwalukila ku mvensà wa 14 eku, nwamba ne: “Mòna's, s'nyawù bàdi ne Mukàji-musèla kwònsò kùdìbo. . .” Kakùyì mpatà to! Batungula's bàvwa bènda ne mukalenge-mukàji kwònsò kùvwàye ùya. Bulelèlà's! Kàdi bàvwa banganyi? Bôbò bàvwa ànu bashindikiji cyanàànà, ne ki cìdì ànu menemene Mufùndù wàmba ne ncyôci kaaba aka.

75 Mònaayi:

Nènku *paanyimà pàà maalu aa . . . ne, mònaayi, musùmbà munène, wùvwà muntu kàyi mwà kubala, bàà matùngà ónsò, . . . bifuku, . . . bisàmbà, ne mwakulu, . . .* (s'ki Mukàji-musèla wenù wa bàà Bisàmbà byà bèndè udi umwènèka awu, èyo) . . . bôbò aba *biimàne . . . kumpàlà kwà Mwànà wa mùkòòkò, (s'ki Musùngidi wabò awu, Mwànà wa mùkòòkò, kaciyi mikenji to; Mwànà wa mùkòòkò, Ngàsà) . . . bavwàdika mizàbì mitòòke, . . .* (tàngilàayi, mu katanci kakesè emu, nùmonèbi mizàbì mitòòke ayi ní kî mbwakànè bwà bansantu) . . . *ne malala mu cyanza;*

Ne bôbò bàakeela dîyi dyà lubilà lukolè, . . . (eci cyôci kaciyi ditàbuluja dyà beena Mpenta to, kacya ncitukù mèmè mwanji kuumvwa ditàbuluja to) . . . *bàmba ne: Lapàndù kùdì Nzambi wetù udi musòmbe pa nkwasà wa butùmbi, ne kùdì Mwànà wa mùkòòkò,*

Ne banjèlò bònsò bàvwa biimàne banyùngùlùkile nkwasà wa butùmbi, ne bakùlù ne nyama yinaayi, . . .

bàkapòna pa . . . kumpàlà kwà nkwaswa wa butùmbi aku batwè mpàlà panshi, ne bàakakuukwila Nzambi,

Bàmba ne: Amen! Dibènesha, . . . butùmbi, . . . lungènyi, . . . disàkidila, . . . luumu, . . . ngulu, bukòlè, bìikalè kùdi Nzambi wetù kashidi ne kashidi! Amen!

⁷⁶ Aci's ncyumvwike ànu bu cikondo cyà disangisha dyà cituùdilu's, kî mmwômò anyi? S'ncyènzekè's! Bàvwa mbanganyi biinè abu? Mbinunu lukàmà ne makùmi ànaayi ne binaayi abi anyi? Nànsha kakesè! Ewu musùmbà munènè wùvwà muntu kàyì. . . bàà cifuku cyònsò, myakulu yònsò, ne matùnga ònsò aba. Kwènàku mwà kumòna anyi, mulundà wanyi munanga?

⁷⁷ Mpindyewu tàngilàayi, Cibalàayi ànu cyanààna. Mpindyewu:

Ne umwe wa ku bakùlù wàkandamuna, ùngambila ne: Aba mbanganyi ne . . . bàdi bavwàdika mìzàbì mitòòke aba? ne bàdi bàfùmina penyi?

⁷⁸ Mukùlù awu wàkambila Yone, yèyè uvwa mwena Yudà wàkajingulula binunu lukàmà ne makùmi ànaayi ne binaayi abi awu, ne: "Mpindyewu, udi mubàmanyè, bònsò abu mbeena Yudà. Kàdi aba mbanganyi? Ne mbafùmine penyi?" Nudi bamòne cìdì mukùlù awu mwambè aci anyi? "Umwe wa ku bakùlù wàkandamuna," (abu mbakùlù bàvwà kumpàlà kwà Nkwasa wa butùmbi) "wàkangadamuna, wàmba ne: 'Aba mbanganyi bàdi bavwàdika mìzàbì mitòòke aba? Ne bàdi bàfùmina penyi? Mpindyewu, twètù bònsò tudi bamanyè beena Yudà ne cipungidi cyàbò ne bikwàbò byònsò, kàdi aba nùku bàakalwà díbà kaayi?" Mpindyewu tàngilàayaaku:

Ki mèmè kumwambila ne: Mukalenge, wèwè's udi mumanyè. ("Ncyè—ncyè—ncyèna mumanyè to," mwàkambà Yone, "aci cìdì ànu cimpicìle's. Ncyèna mumanyè to.") Ki yèyè kungambila ne: Aba mbàdi bàfùmine mu makènga makolè, "Mu mateeta ne njiwù yàbùngì eyi, midimu mikolè ne matèyi, mmùndì mupicìle." (Nwamònu anyi?) . . . aba mbapàtùkile mu makènga makolè, ne mbasukùle mìzàbì yàbò, . . . (mu èkèleeziyà anyi? Aci cìdì cyùmvwika cijaalàme anyi?) . . . mbasukùle mìzàbì yàbò, ne bayitòòkèshe mu mashi a Mwànà wa mùkòòkò.

. . . bàdi kumpàlà kwà nkwaswa wa butùmbi wa Nzambi, ne bàdi bàMukwàcila mudimu muunya ne bufuku, . . . (udi unkwàcila mèmè mudimu mu nzùbù mwànyi nganyi? Mukàjàanyi. Mmwômò anyi?) . . . ne mu ntempèlù Wendè: . . . (yèyè ngudi ushààla naanyi mu nzùbù mwànyi ne mu cibùcìlu cyànyi, mmukàjàanyi. Yèyè ngudi usòmba pàmwè naanyi, ne ùnsukwila bilàmbà, ne ùdongolwela bintu) . . . ne yèyè udi

musòmbe pa *nkwasa wa butumbi awu neàsombelè munkaci mwàbò*. (Ekèlekèle, tèelejàayi!)

Ne *kabààkwikalakù kabìdì ne nzala to*, . . . (mmùmwe ne bàvwa bapangilekù byàkudyà yimwè misangu mu lwendu amu's) . . . *anyi kabààkwikala kabìdì ne nyòòtà to; anyi muunyà kawàkubòòshakù kabìdì to, nànsha luuyà lukolè*.

Bwalu Mwànà wa mùkòòkò udi munkaci mwà nkwasa wa butumbi awu neàbàdìshè, ne neàbàlombòlè ku mpokolo yà màyi àdì ne mwoyi, ne Nzambì neàkupulè . . . binsònjì byònsò ku mèsù kwàbò. (s'ki Yèyè awu, s'ki Mukàjì-musèla wenù awu)

⁷⁹ Ki binunu byènù lukàmà ne makùmi ànaayi ne binaayi mbyòbì abi, ki basadidi bèenù abu mbòbò abu. Pa nànkù “bànà bàà Bukalenge” abu mwaba ewu, wèwè mukwètù munanga udi mwelè lukonko elu awu, bìdì . . . udi mwelè lukonko lwà musinga mukolè elu awu. Ndi ngeela meeji ne ndi mufwànyine kwikala mulùshiyè paanyimà apa mu . . . mwaba kampànda, kàdì “pèèdiibwàbo pambèlu,” kî mbwena kwamba ne nebèèdiibwè pambèlù pàà meeji a Nzambì nànsha. Mbeediibwe pambèlù pàà bintu byà dyàkalenga byà nyumà bwà ntàntà wa cikondo. Nwamònu's, ànu bwà ntàntà mukesè cyanàànà wa cikondo.

⁸⁰ Bwalu, mupròfeta pààkamònaye Izalèlèlà mu ditùku edi òwàye ùlwa adi, wàkamba ne: “Èè, Izalèlèlà neikalèku pùumushiihwà Nsabatu, ne—ne pùikalàbo bàkaadi bàsùmbisha dyà Nsabatu mùdì ditùkù dikwàbò kanà dyònsò edi, ne bintu byònsò ebi anyi?” Kwambayè ne: “Èè, neWikalè—neWikalèku . . . Izalèlèlà neàpwibwè mwoyi kashidi kashidi anyi?”

⁸¹ Yèyè ne: “Mu dyulu mùdì bule kaayi ne apa? Buloba bùdì ndòndò kaayi? Bipimèbì tũng ne mulangala wùdì kumpàlà kwèbè awu.”

Yèyè ne: “Ncyèna mwà kupima to!”

⁸² Yèyè ne: “Nànsha Mémè pàànyì ncyèna mwà kupwà Izalèlèlà mwoyi to.” Nànsha kakesè! Izalèlèlà kààdyakupwibwakù mwoyi to.

⁸³ Pa nànkù, nudi numòna's, *dyà kashidi ne dyà Cyendèlèlè* mbintu bibidi bishiilàngàne. Izalèlèlà ùvwa mwediibwe pambèlu, kàdì kî mpambèlù pàà meeji a Nzambì to. Ne Pòlò ùdì ùcyàmba kaaba aka, bu ne mvwakù ne . . . bu ne mvwakù ne dībà dyà kulonga, mu mùshindù wà mufwànyineku kufika lùkàsà ku Mufundù wùdì . . . nùnkù mvwa mwà kukùleedila bwènù nwènù, nwamònu's, bìdì bìmvwilà mu meeji abi.

⁸⁴ Pòlò wàkulapù, wàkamba cyòcì aci bwà twètù bàà Bisàmbà byà bendè tùmukè, mùshindù wutùdì twenda ne bitùdì twenza. Nwamònu anyi? Pùikalà Nzambì kàyi mulaminyine ditàmbà dyà kumpàla, nwamònu's, ne twètù biikàle ànu basomeka

cyanààná, nwamònu's, . . . Ne Izalèèlà uvwa mufofomija bwà cikondo kampànda awu, mùdiye mwambè. Ànu bwà cikondo kampànda, mbùvwà Izalèèlà mufofòmìjiiibwe. Ncyà bushùwà, kàdi cibwikilu aci necyùmushiibwè pa mèsù pààbò. Ne apu mpààlediibwà muntu wa ndekeelu wa Bisàmbà byà bendè mu Bukalenge bwà Nzambì, pashùshe cibwikilu necyùmushiibwè pa mèsù pàà Izalèèlà. Nénku nebàmbè ne: “Ewu ki Maasiyà utùvwà tukèba bwà kumòna awu.” Ncyà bushùwà, kàdi ciibi cyà bàà Bisàmbà byà bendè ncikànga (bwàtù mbu—mbukànga), kakùcyèna kushààle kàbìdì—kàbìdì ngàsà bwà bàà Bisàmbà byà bendè cikondo aci to.

⁸⁵ Mpindyewu, ndi ngangata dībā dyàbùngì be pa lukonko lùmwèpelè. Ne muntu kampànda neàmbè ne: “Mpindyewu kwàkufika ku lwànyì mèmè to.” Èè, netùlwijakajè kàdi tùmone ní katwàkukùfika.

⁸⁶ Èyo, lwà—lwà luleepa ndwòlò elu. Ne katùpà kààlù kònsò kàdi mukàjì awu mukonkè anyì mulùme awu mukonkè, anyì nì nganyì awu, nkìmpè.

53. Kì mbulelèlà ne Mukalenge Yesù kààkafwila bàà pa buloba bujimà, mbwena kwamba ne muntu yònsò pa buloba, kàdi ànu . . . (mpindyewu, ndi mufwànyìne kuumvwija aci, kàdi yèyè . . . mukàjì anyì mulùme, nì nganyì awu . . . Mbimwèke ànu bu cyanza cyà muntu mukàjì) . . . kàdi ànu bwà aba—kadi bwà aba bàà mu citùpà cyònsò cyà buloba, bàvwà Taatù muMupèèshe abu anyì? Aba bàvwà kumpàlà kwà difùkà dyà dyulu ne buloba, bàvwà Nzambì mulongòlwèle Mwoyi wà Cyendèlèlè, mwikàle mubàsungùle bilondèshile disànkà Dyèndè dìmpe Sungasunga anyì?

⁸⁷ Kakùyi mpatà to, mmwòmò! Aci ncyà bushùwà menemene. Yesù wàkafwila . . . kabìyi ànu bwà . . . Mmudipàngàdikileci.

⁸⁸ Tùmonebi, ngeela meeji ne . . . Ngee—ngeela meeji ne mbabalè . . . lukonko kampànda lùdi lùvwilamù pa cyòci eci:

54. Kakùyi mpatà to Mifùndù yìdi yìtwàmbila ne aba mbùikalà kabàyi mwà kusùngidiibwa—mbùikalà kabàyi mwà kusùngidiibwa. Ki bwà cinyi . . .

⁸⁹ Ncyà bushùwà menemene. Mifùndù yìdi yìtwàmbila ne kùdi bantu bàvwà badyànjila kulongolola kùdi Nzambì bwà kupùshiibwabò.

⁹⁰ Nudikù baswè bwà kubala aci, bwà cyàmònakù mwà kunuumuka kashidi mu mitù anyì? Èyo, tùbuululààyaaku mpindyewu mu Mukànda wà—wà Yudà, Yudà ngudi wakula kaaba aka ewu.

Yudà, musadidi wa Yesù Kilistò, udi mwanààbò wa balùme wa Yakòbò, kùdi aba bàdi bajidùbwe kùdi Nzambì Taatù, ne balamùbwe mu Yesù Kilistò, ne babùkidiibwe:

91 Nudi numòna bàdiye ùCyàmbila anyi? Kí nngènzàmpèkààtu to, kí ng'ànu beena mudimu wà butangadiki to, kàdi bajidiibwe ne babiikidiibwe. Nwamònu's, aba bàkaadi mu Bukalenge.

Luse kunùdì, ne ditalala, ne dinanga, bìvudijii bwè.

Bananga, . . . ndi mudifile ne disùminyina dyònsò bwà kunùfùndila bwà lupàndù lwètù lutùdì naalù poopàmwè ne, bìwà bikèngediibwa bwà mèmè kunùfùndila, ne bwà kunùkànkamika. . . bìwà bikèngela bwà nwènù kulwangana mvità ne mwènù mwònsò bwà diitabuujà dyàkafidiibwà kùdì bansantu musangu wùm wè cyendèlèlè.

Bwalu kùdì bàmwè bantu bàdì badifindè mu musokoko, bàkaavwà kumpàlà kwà kale wàwa bamana kufùndila dipùla edi, . . . (bìshi?) . . . bàkùdimuna ngàsà wa Nzambì wetù mu masandi makolè. . .

92 Bafùndila kale wàwa! Kí nnè Nzambì wàkasòmba pa nkwa na butùmbi, e kwamba ne: “Nènsungilè muntu kampànda, Nènjimijè muntu kansanga” to. Kabivwa nàнку to! Nzambì wàkafwà, ne pààkafwà Yesù apu, difuta dyà cibawu dyàkabwikila buloba bujimà bwà muntu ne muntu. Kàdi Nzambì, ku didyànjila-kumanya. . . Kí nnè Yèyè mmuswè. . . Kí mmuswè bwà muntu nànsha umwe àfwe to. Úvwa muswè bwà muntu ne muntu kusùngidiibwayè. Ki cìvwà kiipàcìlà Kèndè—ki cìvwà kiipàcìlà Kèndè kàà Cyendèlèlè ncyòci aci. Kàdi piikalàbi ne Yèyè úvwa Nzambì, Úvwa mumanyè ne nganyi uvwa usùngidiibwa ne nganyi uvwa kàyì usùngidiibwa. Yèyè kàyì mumanyè to, nàнку Kàvwa Nzambì udi kàyì ne mikàlu awu to. Pa nàнку aci ncìdì Bible ùlongesha. Bwà ne twètù tuvwa mwà. . .

93 Bu ne tuvwakù ne dîbà dya kubuulula mu Loomò emu, mu nshapità wa 8, nwènù biine's nudi bafwànyine kucibala. Loomò, nshapità wa 9, ne myaba mikwàbò yàbùngì mu Bible. Efèsò, nshapità wa kumpàla. Nèнку nudi mwà kumòna ne disungula dyà Nzambì, bwà kushàaladì dyà cyà bushùwà, Nzambì wàkafila cipungidi cyà kakùyì musingà mwenza to. Wàkatùma Yesù bwà kufwìlaYè aba bàkaavwàYe mudyànjile kumanya. Nwamònu anyi?

94 Kabiya ànu kwamba cyanàànà ne: “Èè, mùdì wamba ne Nzambì kàvwa mumanyè ne mukàjì awu úvwa anyi kàvwa mwà kusùngidiibwa anyi?” Nzambì úvwa mumanyè ne wèwè awu uvwa mwà kusùngidiibwa, anyi wèwè ní uvwa mwà kusùngidiibwa anyi to, kumpàlà mene kwà dyulu ne buloba kubangabi, bwà cyanàànà Kàvwa Nzambì to.

95 Nudi bamanyè cìdì mwakù kàyì ne mikàlu wùmvwija anyi? Tàngilààyi. . . tàngilààyi mu nkòngamyakù nùsanganè cìdì mwakù kàyì ne mikàlu wùmvwija. Mòna's, Yèyè's úvwa mumanyè nkùpà yònsò uvwakù mwà kwikala pa buloba apa,

lujiiji lwônsò, kajijijijiji kônsò, kîshì kônsò. Ûvwa mukàmanyè kumpalà mene kwà kôkò kufika ku diikalakù, bwà cyanààna Kàvwa Nzambi to. Ncyà bushùwà ne, Ûvwa mukàmanyè. Èyo.

⁹⁶ Dìbà adi, mwómò amu, Nzambi kàvwakù—kàvwakù mufwànyine kwamba ne: “Nênkwangàtè *wèwè*, nkutùmè mu ìfernò; ne Nênkwangàtè *wèwè*, nkutùmè mu Dyulu” to. Nzambi ùvwa muswè bwà nwênù bônsò bàbìdì nùye mu Dyulu. Kàdi ku didyànjila-kumanya Yèyè ùvwa mumanyè ne umwe neikalè mwenji wa maalu makònyàngàlè, ne mukwàbò neikalè muntu mukàlàngà ne mwena Kìlistò. Nwamònu anyi? Ki bwà cinyi byàkakèngela Àtumè Yesù bwà àfwe, bwà àsungile muntu uvwaYè mudyànjile kumanya ne ùvwa muswè kusungidiibwa awu. Nwacyùmù anyi?

Mpindyewu tàngilàayi apa:

Kakùyì mpatà to Mifùndù yìdì yìtwàmbìla ne aba mbìikalà kabàyi mwà kusungidiibwa.

55. Pa nànkù pìikalàbì ne difùta dyà cibawu òvwa dibwikilè bônsò bàà . . . bônsò bàà ndelàngànyì yà Adàmà, ne bamwè bàakajìmina bwalu kabàvwa bòbò bìinè bakwàtè mudimu ne mulayi, anyì civwà cidyànjila kulongolola aci, kabìvwakù bifwànyine . . . bukòl- . . . budìshikaminyi . . . nebwikalè mwà . . . neciikalè bukòlè butàmbe mpàngù yà Cyendèlèèlè ne twipàcìlà twà Nzambi wa Bukòlè bwònsò ku bukòlè anyi? Ncìfwànyine kwikala . . . (Muntu ewu mpindyewu, mu lukonko lwibìdì elu, ngudi ukonka ewu.) Didìsungwila dyà muntu kadyàkwikala dikòlè kutàmbe mpàngù yà Cyendèlèèlè ne kiipàcìlà kàà Nzambi wa Bukòlè bwònsò ku bukòlè anyi?

⁹⁷ To, mwanèètù wa balùme anyì wa bakàjì. Nànsha kakesè! Kakwènakù cintu nànsha cimwè citàmbe bukòlè . . . Diswa dyà muntu kî ndìfwànyìnekù kufwànyikijiiibwa ne—ne kiipàcìlà kàà Cyendèlèèlè kàà dipàngadika dyà Nzambi to. Nànsha bìshi, nwamònu’s.

⁹⁸ Mpindyewu, lukonko lwèbè lwà kumpàla lùvwa mu lwòlò. Lukonko lwèbè lwibìdì kî ndufwànyìne kwikala mu lwòlò to, mulundà wanyì. Bwalu tàngilà, tàngilà mùshindù wùdilu lufùndiibwe mwab’ewu, wamònu’s: “Didìsungwila dyà muntu kadyàkwikala dikòlè kutàmbe mpàngù yà Cyendèlèèlè ne kiipàcìlà kàà Nzambi wa Bukòlè bwònsò ku bukòlè anyi?” Mòna’s, nànsha kakesè. Mmunyi mùdiku diswa dyà muntu difwànyìne kwikala dikòlè kutàmbe mpàngù yà Cyendèlèèlè ne kiipàcìlà kàà Nzambi wa Bukòlè bwònsò ku bukòlè? Ne muntu mu ngiikàdilù wendè wa musunya awu bwà kuswa cìdiye muswè, ciikàlè ne bukòlè kutàmbe cìdì Nzambi wa Cyendèlèèlè, mupwàngàne awu cìfwànyìne kwikala anyi? Nànsha kakesè! Kacyèna mwà kwenzekakù to, wamònu’s. Nzambi wa Cyendèlèèlè, Mwena kiipàcìlà kàdi kapwàngàne

awu, mmunyi mùdikù mwà kwamba ne muntu wetù wa—wa musunya ewu pànwapa apa, nànsha mwikàle mwakàne (ne yêyè mmufwànyine kwikala mwakàne bishi), twèndè twipàcìlà kî ntufwànyinekù kufwànyikijiibwa ne eci: kii—kiipàcìlà kàà Nzambi wa Cyendèlèèlè ne wa Bukolè bwònsò to.

⁹⁹ [Mwanèètu wa bakàjì kampàndà ùdi wàkwila mu disangisha amu—Muf.] Èyowà. [“Mfwilèku luse. Mwva muswè ànu kwelakù lukonko cyanààna, kàdi—kàdi wèwè ngudi umvwa bibi cìndi njinga kwamba mwaba awu.”] Èyowà, èyo, mwanèètu wa bakàjì. [“Mémè ncyèna ngiitabuujakù aci to nànsha kakesè, mwva njinga kwamba ne ‘kiipàcìlà kàà Cyendèlèèlè kàà Nzambi kàdi kàdyatakaja didisungwila dyà muntu.”]

¹⁰⁰ Aci ncyà bushùwà. Kaa, èè, nàнку mèmè—mèmè ngudi mucibalè bibi, wamònu’s. Èyo. Èyowà, nàнку wèwè udi mubingè ànu menemene, mwanèètu wa bakàjì. Ncivwa mumanyè ne lukonko lùvwa lwèbè—lwèbè wèwè to. Èyo. Kàdi, wamònu’s, mwaba wùngàlwàngàcìdi kaaba aka, wamònu’s, . . . Mpindyewu lekèlèbi ngánjì mmonè: “Kubwikila ndelànganyi yònsò yà Adàmà, ne bàmwè bàakajìmina bwalu bóbò biinè—bóbò biinè kabàakakwàta mudimu ne cìvwà cidyànjila kulongolola to, didisungwila dyà muntu kî ndifwànyine kwikala dikolè kutàmba mpàngù yà Cyendèlèèlè ne kiipàcìlà kàà Nzambi wa Bukolè bwònsò ku bukolè anyi?” Wamònu’s, mèmè—mèmè nguvwa muumvwije meeji èbè bibi mwab’awu. Èyowà, kiipàcìlà kàà Cyendèlèèlè kàà Nzambi wa Bukolè bwònsò. Èè, aci’s ncikòse bwalu.

¹⁰¹ Ngeela meeji ne bantu bònsò mbuumvwè aci. Panwikalà buumvwè, elàayi byanza muulu. Cìdi—cìdi nkiipàcìlà kàà Cyendèlèèlè kàà Nzambi wa Bukolè bwònsò, kàdi cyà bushùwà kafwànyine kutàmba kule ne kule—kule ne kule cìdi muntu mufwànyine kwenza.

Mpindyewu:

56. Ncyèna ngumvwa bukènkè pa dibàtiiza dyà mu màyi to, mu nshapità wa 28 wa . . . mvensà wa 19, wa Maatàayi. Nciswè kwamba cinyi?

¹⁰² Èè, mpindyewu, pàmwàpa necìngangàtè ànu kasunsa kàmwè cyanààna. Nèнку muntu àbuululèku pàmwè naanyi bu nwènu mwà kuswà, mu Maatàayi, nshapità wa 28, ku mvensà wa 19. Nèнку netùjandùlè, ànu cìdi muntu ewu . . . makùmi àbìdi ne itaanu . . . Mpindyewu, Eci necinùpèèshè dikàndà bu nwènu mwà kushàala naaCì. Cìdi—Cìdi cìmpè, nudi numòna’s. Kì nCyà butangadiki to, kàdi Cìdi . . .

¹⁰³ Mpindyewu tudi . . . Mpindyewu apu ki pàdi bantu bàteeta kwamba ne: “Kùdi dibèngangana dyà mēyi mu Bible.” Mpindyewu, ndi muswèku bwà muntu àbuululè mu . . . ne Maatàayi 28.19. Anyi, to, ndi muswè bwà muntu . . . Maatàayi

28.19. Ndi muswèku bwà muntu àbuululè mu Byenzedi 2.38. Udi ne Bible webè mwaba awu anyi, Mwanèètù Neville?

¹⁰⁴ Nènku ndi muswè bwà nùdibadilè nwènù biinè mpindyewu. “Kàdi mèmè nènkuleejè dibèngangana dyà mèyì dyà pyòpyopyò mu Bible. Ne cìdì—cìdì Bible. . . Bantu bàtu bàmba ne ‘Bible kèna ne Mèyì àbèngangana to.’ Ndi muswè bwà wàngatè eci ne mushinga.”

¹⁰⁵ Nènku eci ncìdì cìtòlweshà balongeshi mvya. Kàdi nCi—nCipeepele’s. Mpindyewu nèmbalè Maatàayi 28.19, nwènù ndondàayi. Ne bàmwè bàà kunùdì ne Byenzedi 2.38, bìikalè nendè pabwipi. Nèmbangilè ku mvensà wa 18, ewu nnshapità wa ndekeelu wa Maatàayi:

Nènku Yesù wàkalwa ne wàkaakula ne bayiidi bènd-. . . wàkaakula naabò, wàmba ne: Bukòokeshi bwònsò mbumpèèsha mu dyulu ne pa buloba. (bukòokeshi bwà Taatù bùdi penyì?)

¹⁰⁶ Piikalàbi ne bukòokeshi bwònsò mu Dyulu ne pa buloba mbupèèsha Yesù, dîbà adi Nzambi’s mmushààle kàyi ne bukòokeshi, kî mmwòmò anyi? Anyi cidi ànu mashimi Yèyè mwambè? Cìvwa mbilèlè Wèla anyi? Úvwa ùCyàmbilamù! Kanwènaayikù nwitabuuja ne Úvwa ùCyàmbilamù anyi? Èè, piikalàbi ne bukòokeshi bwònsò mbuMupèèsha Yèyè, bukòokeshi bwà Nzambi bùdi penyì dîbà adi? Yèyè’s nguvwa Nzambi! Mmwòmò. Ki cintu cimwèpelè cidiku pa bwalu abu ncyòci aci. Ki cyònsò cìvwàku ncyòci aci. Nwamònu’s, Yèyè nguvwa Nzambi; anyi kùvwa muntu kampànda musòmbe mwaba awu, uvwa ne bukòokeshi cyà bushùwà, kàdi kàciyi kàbidì naabù to. Nwamònu anyi? Pa nànkù kwèna mwà—kwèna mwà kuCìbwejakaja nànsha. Netùbwejè aci buludì pa cintu cimwècimwè eci. Èyo:

. . . Bukòokeshi bwònsò mu dyulu ne pa buloba bùdi . . . mu dyulu ne pa buloba.

Ndààyaaku, . . . nùkalongèshè bàà matùnga ònsò, nubàbàtìza mu dîna dyà Taatù, ne dyà Mwànà, ne dyà Nyumà Mwìmpè,

nubàlongesha bwà kuneemekela bintu byònsò bìndì munùtùmìne dîyì abi; . . . mònaayi, Ndi neenu misangu yònsò, nànsha too ne ku ndekeelu kwà buloba mene.

¹⁰⁷ Byenzedi 2.38, mpindyewu muntu àbalè. Anjì indilàayi kakesè. Byenzedi, nshapità mwi2, mvensà wa 38. Mpindyewu, tèelejàayi ne ntèmà yònsò mpindyewu, ne ikàlaayi ànu ne lutùlùlù, nènku netùmònè mpindyewu. Mpindyewu, apa mmatùkù dikùmì paanyimà pàà Yesù mumanè kubàmbila mpindyewu, Maatàayi 28.19 ne: “Ndààyaaku, nùkalongèshè bàà mu matùnga ònsò, nubàbàtìiza mu dîna dyà Taatù, dyà Mwànà, ne dyà Nyumà Mwìmpè.”

108 Mpindyewu, Peetèlò, matùkù dikùmi paanyimà... Bòbò kabàakayiishakù dikwàbò diyiisha to. Bàakabànda mu cibambalu cyà kuulu cyà mu Yèlusàlèmà, ne bàakindilamù (munda mwà matùkù dikùmi) bwà Nyumà Mwímpè kulwaYè. Mbanganyi bàdi bamanyè nànkù? Mu kaaba aka. Ki Peetèlò nyéyè ewu, Peetèlò ngudi ne nsapì yà Bukalenge. Èyo, netùmonè cidíye wènza. Maataàyi, anyi ndi njinga kwamba Byenzedi 2, twàngatàayi mvensà wa 36.

Ki bwà cinyi nzùbu mujimà wa Izàlèlèlè àmanyè ne ditwishiibwa dyònsò ne, Nzambi wàmanyi kuvwiya Yesù umwèumuè ewu, unùdi nwnènù... bapoopèle ku nkùrusè awu, byònsò bìbìdì Mukalenge ne Kilistò.

“Byònsò bìbìdì Mukalenge ne Kilistò.” Kabyèna bìkèmesha to, mùvwà bukòòkeshi bwònsò mu maulu ne pa buloba buMupèesha Yèyè.

Mpindyewu pàakumvwàbo cyòci eci, bàakalengiibwa bikolè mu myoyi yàbò, ne bàakambila Peetèlò ne... bapostòlò bakwàbò abu ne: Balumyànà ne bânà bèètù, netwènzè cinyi?

Peetèlò wàkandamuna... Peetèlò wàkabàmbila ne: Nyingàlàlaayi, yònsò wa kunùdi, ne bàtijiibwàyi mu dìnà dyà Yesù Kilistò bwà dilekelediibwa dyà mpèkaatù yènù, nènku nenùpetè kupà kwà Nyumà Mwímpè.

109 Mpindewu, kùdi dibèngangana dyà mèyi, Maataàyi mwambè ne: “Nùbatiiizè mu Dìnà: Taatù, Mwànà, Nyumà Mwímpè,” kàdi Peetèlò mwambè mu Byenzedi 2.38, matùkù dikùmi paanyimà ne: “Nyingàlàlaayi, nùbatijiibwè mu Dìnà dyà Yesù Kilistò.”

110 Pashiishe musangu wàkalondà wùvwà kanyinganyinga katèèdiibwe—katèèdiibwe, anyi, dibàtiiza, mu Bible, mmu Byenzedi nshapità wa—wa 8, pàakayà Filipò kayiisha kùdì... kùdì—kùdì beena Sàmaalèyà. Ne bòbò bàakapeta Nyumà Mwímpè, ne bàakabàtijiibwa mu Dìnà dyà Yesù Kilistò.

111 Musangu wàkalondà wàkatèèdiibwàci, mpàakaMupetà bàà Bisàmbà byà bendè, mu Byenzedi 10.49:

Ne pàcìvwà ànu Peetèlò... wàmba mèyi aa, mònayyi, Nyumà Mwímpè wàkatùluka pambidi... pààbò... ne bàakabùmvwà.

Bwalu bàakabùmvwà bàakula mu myakulu, ne bàtumbisha Nzambi. Pashiishe Peetèlò kwambayè ne:

Muntu ùdikù mwà kukàndika màyi, pa kumòna ne aba... bààpeci Nyumà Mwímpè mutwàkapetà twètù ku cibangidilu amu anyi?

Nènku wàkabàtùmina dîyi bwà kubàtijiibwàbò mu dìnà dyà Mukalenge Yesù Kilistò.

112 Mpindyewu ngànji kwangatakù cintu kampànda kaaba aka, nnùleejè ànu kantu kakesè cyanàànà bwà kanùlu kicipwa

mwoyi to; nêngiikalè mwà kwenza kaacifwànyikijilu kakesè. Nêngiikalè mwà kutèeka...Mbúngi kaayi bwà nkòng-... bisàmbà byà bantu bìdi pa buloba? Bìdikù bisàtù: Beena Ham, beena Sem, ne beena Yafètè. Mbanganyi bàdi bamanyè nàнку awu? Tudi bafùmine ku bânà bàsàtù bàà Noà abu. Beena Ham, beena Sem...Beena Yafètè mba-Anglo-Saxons, beena Sem mba-...Nkòngo yisàtù ayi, yidi: Beena Yudà, bàà Bisàmbà byà bendè, ne bàdi ndambù beena Yudà ne ndambù bàà Bisàmbà byà bendè. Mpindyewu, mōnaayi, pàvwàku...ne ewu n'Ham... Sem, Ham, ne Yafètè.

¹¹³ Mpindyewu, musangu wà kumpàlà wùvwàku dibàtiiza ditèèdiibwe, dyàkatèèdiibwa kùdi Yone Mubàtiji. Mbanganyi bàdi bamanyè ne aci ncilelèlà? Èyo, nêngiikalè mwà kucitèeka apa nùku, lwà apa nùku, Yone Mubàtiji. Nèku Yone wàkabàtiiza bantu mu musùlù wà Yadènè, ùbàtùmina dìyi bwà ne bìvwa bikèngela bànyingalalè ne bàdilongòlòlè kumpàlà kwà Nzambi, ne bàsumbishè bintu byàbò, ne bàdiishè bapèlè, ne bwà bàsàlaayi bìikalè ne disànkà bwà difutu dyàbò, ne bàdilongòlòlè kumpàlà kwà Nzambi. Mbanganyi bàdi bamanyè nàнку awu? Ne wàkabàtiiza mu musùlù wà Yadènè, kàyi ùbàmyamina, kàyi ùbàpòngolwela màyi mu mutù to, kàdi ùbiiinyijamù! Wèwè kùyi uCìitabuuja to, nkòngamyakù nyèyè ewu, ùjandulèbi ní kacyèna *baptizo*, cidi cyùmviwjà ne, “kubàtiiza, mwinyijibwe, mwela mwinshì, mujjiika.” Mpindyewu, musangu wà kumpàlà wàkatèèdiibwà dibàtiiza, pàvwa mpòpò apu.

¹¹⁴ Musangu mwibìdi wàkatèèdiibwàku dibàtiiza, Yesù wàkatùmangana ne mudimu wà kudyèna, mu Maatàayi 28.19.

¹¹⁵ Musangu wàkalondà wàkatèèdiibwà dibàtiiza, mùvwa mmu Byenzedi 2.38.

¹¹⁶ Musangu wàkalondà wàkatèèdiibwà dibàtiiza, mùvwa mmu nshapità wa 8 wa Byenzedi.

¹¹⁷ Musangu wàkalondà wàkatèèdiibwà dibàtiiza, mùvwa mmu nshapità wa—wa 10 wa Byenzedi.

¹¹⁸ Nèku dîbà adi tudi buumùkile ku cikondo cyàkambà Yesù, kaaba aka ne: “Ndààyaaku, nukayiishè bàà mu matùngà ònsò, nubàtiiza mu Dîna dyà Taatù, ne Mwànà, Nyumà Mwimpè.”

¹¹⁹ Mpindyewu, dyàmbedi twànjàayi kwolola Mufundu ewu. Mémè ngánwàmbidi ne “kakwèna Mufundù nànsha wùmwe mu Bible wikalà mwà kubèngangana ne mukwàbò to.” Ndi muswè nùwùntwàdilè. Nkàadi mulòmbèlòmbe cyòci aci kùkaadi bidimu makùmi àbidi ne bisambòmbò, kàdi nyèna mwanji kuwùpeta to. Kakwènakù Mufundù wùdi wùbèngangan-... Wòwò wùbèngangana naaWù, dîbà adi ncintu cyà muntu mudifundile. To, mukalengè, kakwèna dibèngangana dyà mèyi mu Bible to!

¹²⁰ Nèku wèwè wamba eci ne: “Bishi bwà aci?”

121 Ki Yesù nyewù mwimàne wàmba ne: “Ndàayaaku, nukayiishè bàà mu matungà ònsò, nubàbàtiiza mu Dìná dyà Taatù, Mwànà, Nyumà Mwímpè.”

122 Dyà Petèèlò ùkùdimuka, kàdi kwambayè ne: “Nyingàlàlaayi, yònsò wa kunùdi, nùbatiijibwè mu Dìná dyà Yesù Kilistò.”

123 “Dibèngangana dyènù dyà mèyi’s ki dyòdi adi.” Ndyenzè ànu bu dyòdi’s. Mpindyewu pawíkala ubala ne meeji a musunya, kùyi ubala ne mwoyi muunzulula to, necìikalè dibèngangana dyà mèyi.

124 Kàdi wèwè uCibala ne meeji muunzulula: “Nyumà Mwímpè mmusokòke eci ku mèsù a beena meeji ne batàlame,” ki mwàkambà Yesù, ne kusàkidila Nzambi bwà bwalu abu, “ne muCibuulwile bânà bàà mu mabòkò bu mùdi bàdi baswè kuyiila.” Wèwè ne meeji kampànda, kaayi meeji a budisu to, kàdi mwoyi wà muswè kuyiila, Nyumà Mwímpè neàkulongeshè bintu ebi.

125 Mpindyewu cyòci kaciyi cìpetangana...Wèwè wambi ne: “Wàmanyi wèwè mùdi mu bulelèlà munyi?” Èè, s’cidi cìpetangana ne Mifundu mìkwàbò yònsò. Kabiyi nàнку to, udi ne dibèngangana dyà mèyi dyà buludi mwab’ewu.

126 Mpindyewu ndi muswè nkwelèku lukonko. Ewu nnshapità wa ndekeelu wa Maatàayi. Nèncyàngatè mu mùshindù wà mukesè, bwà yònsò wa kunùdi...bânà bààmòna mwà kuCyùmvwà.

127 Cileejilu, wèwè ubala bwalu-bulonda bwà mananga, ne nkomeni wabù wàmba ne: “Nènku Màriyà ne Yone bàakashààla mu disànka kashidi pashiishe.” Èè, udi udìkonka ne Màriyà ne Yone bàakashààla mu disànka kashidi pashiishe abu bàvwa mbanganyi. Mpindyewu, wèwè muswè kumanya ne Yone ne Màriyà abu mbanganyi, s’bìvwa bitàmbe bwímpè bu wèwè mwà kwalukila ku ntwàdijilu kwà mukànda awu bwà kujandula ne Yone ne Màriyà abu bàvwa mbanganyi. Dìbà adi kwalukila apa ne kujandula ne Màriyà awu ùvwa nganyi, ne ùvwa mufùmìne mu fàmiyè kaayi; ne Yone awu ùvwa nganyi, ne ùvwa mufùmìne mu fàmiyè kaayi, ne cìvwà dìnà dyèndè adi, ne mwàkasèlanganàbo, ne byònsò abi. Mmwòmò anyi?

128 Èè, ncintu ànu cìmwècìmwè aci mu kubala kwà Bible ewu. Pàvwà...Tàngilàayi, kacya Yesù kàvwaakù mwambè ne: “Ndàayi nùkabàtiizè bantu mu dìnà dyà Taatù, mu dìnà dyà Mwànà, mu dìnà dyà Nyumà Mwímpè,” mùshindù wùdi ba-trinitaires bàbàtiiza awu to. Kakwènakù Mufundù nànsha wùmwe bwa aci mu Bible to. Yèyè kàakambakù ne: “Mu mènà (m-è-n-à), mènà” dyà Taatù, Mwànà, ne Nyumà Mwímpè to.

129 Yèyè wàkamba ne: “Mu (d-î-n-à) dìnà,” ku bùmwe. Tàngilàbi mu Bible webè amu ní kwàkusangana ne ncyà bushùwà, Maatàayi 28 ne: “Mu *Dìnà*.”

¹³⁰ Kí m’“mu dínà dyà Taatù, mu dínà dyà Mwânà, . . .” to, awu mmùshindù wùdì muyiishi wa nzambi yisàtù ùbàtiiza. “Mu dínà dyà Taatù, mu dínà dyà Mwânà, ne mu dínà dyà Nyumà Mwímpè.” Aci kacýèna nànsha mene mu Bible to.

¹³¹ “Dìbà adi mu dínà. . .” Udi wêwè wamba ne: “Èè, dìbà adi mu dínà dyà ‘Taatu, Mwânà, ne Nyumà Mwímpè.’” Dìbà adi’s kùdì Dínà kampànda muntwamu.

¹³² Èè, *taatu* ndínà anyì? Mbanganyi bàdì bamanyè ne *taatu* kí ndínà? *Taatu* mmwânzù. *Mwânà* kí ndínà to. Mbanganyi bàdì bamanyè ne *mwânà* kí ndínà? Mbanganyi bàdì baataatù kaaba aka? Elàayi byanza muulu. Mbanganyi bàdì bânà kaaba aka? Elàayi byanza muulu. Èè, nganyi wa kunùdì udikù mwinyikiibwe dínà ne “Mwânà”? Nganyi wa kunùdì udikù mwinyikiibwe dínà ne “Taatu”? Èyo, *Nyumà Mwímpè* kí ndínà to, *Nyumà Mwímpè* ncìdìYe. Mbanganyi bàdì bantu kaaba aka? Elàayi cyanza muulu. Nwamònu anyì? Kí bwalu mbwòbù abu’s, *Nyumà Mwímpè* ncìdìYe. *Taatu*, *Mwânà*, ne *Nyumà Mwímpè*, nànsha cìmwè cyà ku byòbi abi kacýèna dínà to, kamwèna dínà to.

¹³³ Èè, dìbà adi, pùikalàbi ne Yèyè mmwambè ne: “Nùbatiizè mu dínà dyà Taatù, Mwânà ne Nyumà Mwímpè,” s’bivwa bímpè twètù kwalukila bwà kujandula ne Taatù, Mwânà, ne Nyumà Mwímpè Nganyi. Dìbà adi túbuululàayaaku mu nshapità wa kumpàla wa Maataayi, bwà tùmònè ne Muntu mwinè mwena Dínà ditùdì ne cyà kubàtiizanganamù ewu Nganyi. Nènku tudi tubanga ne Maataayi mpindyewu, nshapità wa kumpàla, ku mvensà wa 18. Balàayi ne ntèmà, nwènù bònso.

¹³⁴ Mpindyewu, wêwè udi mwelè lukonko elu awu, ndi muswè kufila kaacifwànyikijilu kakesè kaaba aka. Mpindyewu nènteekè bintu bisàtù kaaba aka bwà wamòna mwà kuumvwa bitòoke tòò, (kufila kaacifwànyikijilu) Bibles eyi ne mikànda, bwà kufila kaacifwànyikijilu.

¹³⁵ Èyo, ndi muswè nùntàngilè ne ntèmà, ne muntu yònsò àndondè mpindyewu. Mpindyewu, *eci* nùnku n’Nzambi Taatù. *Eci* nùnku n’Nzambi Mwânà. *Eci* nùnku n’Nzambi Nyumà Mwímpè. Mpindyewu, mbanganyi bàdì búmvwè? Cyàmbàayi paanyimà pàanyi. Nganyi udi kwinshì *eku* ewu? [Disangisha didi dyamba ne: “Nyumà Mwímpè.”—Muf.] Nyumà Mwímpè. Nganyi udi lwà kuulu *eku* ewu? [“Taatu.”] Nganyi udi *apa* ewu? [“Mwânà.”] Mpindyewu, mùshindù awu ki wùdì ba-trinitaires bàcìitabuuja. Nwamònu’s, aci cìdì cìtùvwija bampàngaanù, ànu bajimà ne bujimà bwònso.

¹³⁶ Mwena Yudà; ki bwà cinyi kwèna mwà kwenza cintu nànsha cìmwè ne mwena Yudà to. Wàkamba ne: “Kanwèna mwà kukòsolola Nzambi mu bitùpà bisàtù kàdì kuMupèèsha mwena Yudà to.” Kàdì, nànsha kakesè, nànsha mèmè pàanyi kwèna mwà kucingenzela to. Nwamònu anyì? To, mukalenge. Yèyè ùdì Nzambi umwèpelè. Aci ki menemene. Kí n’Nzambi yisàtù to. Mpindyewu mónaayi mùdì—mùdì—mùdìCi cipeepèle.

137 Mpindyewu netùjandulè. Mpindyewu, nganyì udi... *Ewu* Nganyì? Muntu àmbèku ne díyì dikolè mpindyewu. Nzambi Mwânà. Mmwômò anyì? *Ewu* m’Mwânà. Èè, pashiishe Tatw’Èndè n’Nzambi. Mmwômò anyì? Mbanganyì bàdì bìitabuujà ne Tatw’Èndè n’Nzambi? Elàayi cyanza muulu. Mbanganyì bàdì bìitabuuja ne Nzambi n’Tatw’Èndè wa Yesù Kilstò? Eyo.

Mpindyewu dilediibwa dyà Yesù Kilstò dyàkenzeka mùshindù ewu: . . .

138 Mpindyewu tudi twalukila bwà kujandula ne Taatù, Mwânà, ne Nyumà Mwîmpè Nganyì, udi Maataayi mwambè ne “nùbatiizè mu Dîna dyà” awu. Nwamònu’s, Dîna; mpindyewu kí mmènà to, bwalu kaèna mwà kwikala mènà to, bwalu kapèèna dîna nànsha òmwè mwaba awu to.

Mpindyewu dilediibwa dyà Yesù Kilstò dyàkenzeka mùshindù ewu: Pàvwà . . . mamwèndè Màriyà mubangila kùdì Yòzefù, kumpàlà kwà kabayi banji kuluwa kaaba kàmwè, yéyè wàkasanganyibwa ne difù dyà kùdì Nzambi Taatù. (Aci ki cidì Bible wàmba anyì? Cidì Bible wàmba ncinyì?) . . . wàkasanganyibwa ne difù dyà kùdì Nyumà Mwîmpè.

139 Dìbà adi ngwepì wa ku bóbò aba udi Tatw’Èndè? Mpindyewu, Bible nyawù mwambè ne *ewu* n’Tatw’Èndè, kàdi Yesù nyuwà *ewu* nguwà Tatw’Èndè. Mpindyewu, udi Tatw’Èndè mwab’awu kí Wepì? Mpindyewu, piikalàbi ne Yéyè ùvwa ne baataatù bàbidì, mpindyewu bwalu bùdì cinyì? Piikalàbi ne Yéyè ùvwa ne baataatù bàbidì, Yéyè’s mmwânà mulela mu masandi.

140 Mpindyewu twànjàayi kutungunuka ne kubala kumpàlà aku ndambù:

Pashiishe bayèndè Yòzefù, bu mùvwàye muntu mululàme, kàvwà muswè kumufwisha bundù kumpàlà kwà bantu to, kàdi wàkela meeji bwà kumubènga mu musokoko.

Kàdi pàcìvwàye wèlangana meeji pa maalu aa, mònaayi, mwanjèlò wa Mukalenge wàkamumwènekela mu cilòtá, wàmba ne: Yòzefù, wèwè mwánà wa Davidì, kùcìnyì bwà kwangata Màriyà mukajèèbè pàmwè neebè to, bwalu cidiye mwimite munda mwèndè aci ncyà kùdì. . . [Disangisha didi dyàmba ne: “Nyumà Mwîmpè.”—Muf.]

141 *Cinyì* aci? Nyumà Mwîmpè? Èè, mmunyì mùdì Taatù mwà kwikala tatw’Èndè, ne Nyumà Mwîmpè mwà kwikala Tatw’Èndè musangu wùmwèwùmwè awu? Mpindyewu, Yéyè’s ùvwa ne baataatù bàbidì dìbà adi, piikalàbi ne aci ncyà bushùwà. To, mukalenge! Nyumà Mwîmpè ÛDI Nzambi. Nyumà Mwîmpè ÛDI NZAMBI. Pa nàнку Nzambi ne Nyumà Mwîmpè

bàdi Mupèrsonà umwèumwè awu, bwà cyaààà Yèyè ùvwa ne baataatù bàbìdì.

¹⁴² Nwamònu's, twàjandùlù ne *Yone ne Màriyà* mbanganyi, paanyimà pàà katanci. Èyo, twàjandùlù Peetèlò ne Maatàayi ní bàvwa bàteeta kwamba mèyi àbèngangana anyi to, kumòna Mifùndù ní Yidi yàmba mèyi àbèngangana. Ndi-panga dyà luumvu lwà nyumà. Ncyà bushùwà.

Kàdi pàcìvwàye wèlangana meeji pa maalu aa . . .

¹⁴³ Nkàadi mubalè awu, mvensà wa 20 awu. Mpindyewu wa 21:

Ne yèyè neàlèlè mwànà wa balùme, . . . (Mupèrsonà ewu, ùvwa ngwèpi ku bóbò aba? Mupèrsonà umwèpelè, Nzambì.) . . . *ne wèwè newikalè mwà kubùkila dìnà dyèndè ne . . .* (Nganyì?) [Disangisha didi dyàndamuna ne: “YESÙ”—Muf.] . . . *bwalu yèyè ki wasungila bantu bèndè ku mpèkaatù yàbò.*

. . . byònsò ebi byàkenzeka, bwà . . . cyàkambilà Mukalenge ku mupròfetà cyàmòna mwà kuula, wàmba ne:

Mònaayi, nsongàakàjì virgò neimìtè difù, ne neàlèlè mwànà wa balùme, ne nebàbùkile dìnà Dyèndè ne Èmanùwèlè, . . . ku dyumvwija ne, Nzambì neetù.

¹⁴⁴ Pa nàнку *Yone ne Màriyà* bàvwa mbanganyi bààkasòmba kashidi ne disànka pashìishe? Nganyì Uvwa mwambè ne: “Ndààyaaku, nùkalongèshè bàà mu matungà ònsò, nùbàbàtiiza mu dìnà dyà Taatù, Mwànà, Nyumà Mwìmpè” awu? Taatù ùvwa nganyì? Dìnà dyà Taatù, Mwànà, Nyumà Mwìmpè òvwa ndìnà kaayi? [Muntu ùdi wàmba ne: “Yesù.”—Muf.] Cyà bushùwà, òvwa nDyòdì. Bushùwà, kakwèna dibèngangana dyà mèyi apu to. Nànsha dikesè. Cidi ànu cyòlola Mufùndu awu's. Yèyè ngùvwa Taatù, Mwànà, ne Nyumà Mwìmpè. Nzambì ùvwa (Èmanùwèlè) musòmbèlè munkaci mwètù, mwelè ntentà mu mubidi wà wùbùkidiibwa ne “Yesù.”

¹⁴⁵ Mpindyewu, dilongesha dyà bùmwe dyà èkèleeziyà wa beena Bùmwe, ncyà bushùwà ne mèmè ndi mbèngangana ne naadi, bèèla meeji ne Yesù ùdi umwe ànu mùdi munu wèbè wùmwe amu. Ùvwa ne cyà kwikala ne taatù. Yèyè kàyi nendè to, mmunyi mùvwàYè mwà kwikala taatù Wendè Yèyè mwìnè? Ne piikalàbì ne Tatw'Èndè ùvwa muntu mùdi ba-Trinitaires bàmba amu, dibà adi Yèyè's wàkalediibwa ku dilediibwa dyà mu masandi mwikàle ne baataatù bàbìdì. Pa nàнку, nudi numòna's, bubidì bwènù nudi bapìile pa kukòkangana. Nwamònu anyi?

¹⁴⁶ Kàdi Bulelèlè bwà bwalu bùdi ne, bònsò abu Taatù, Mwànà, ne Nyumà Mwìmpè, bàdi Mupèrsonà umwèpelè. [Katùpà kàà mukàbà wà mèyi munda mutupù—Muf.] . . . wa musòmbèlè mu ntentà wa mubidi, bwà kuumusha mpèkaatù wa bàà pa buloba. Aci ncyà bushùwà menemene ne: “Nzambì neetù.” Mpindyewu, ki bwà cinyi, pàvwà Maatàayi 28.19 . . .

147 Mpindyewu, kenkètaayi Mifùndu, ne panwikalà mwà kupeta mwaba wùdi muntu nànsha umwèpelè mu Bible. . . (Mpindyewu elàngànaayi meeji ku bwalu abu, mpindyewu kanùlekedì eci cinùpicila pamutù to.) . . .mwaba wùdiku muntu nànsha umwèpelè mu Bible kacya mubàtìijìibwe mu dìnà dyà “Taatù,” ne “Mwànà,” ne “Nyumà Mwîmpè,” alùkìlà kùndì ùngambìla mùndì mwena lubombo, nènku nénditèèkè cimanyinu paanyimà apa ngèndè ntwà eku ne eku mu cimenga emu. Kacyèna mu Mifùndu to, kuumukila ànu ku Genèsè too ne ku Bwàkabuulwibwà. Kàdi muntu yònsò mu Bible wàkabàtìijìibwa mu Dìnà dyà Yesù Kilistò!

148 Wèwè udi wamba ne: “Indilà kakesè, muyiishi. Kàdi bishi bwà Yone? Kààkabàtìizakù mu dìnà nànsha dimwè to!”

149 Èyo, s’tudi tujandula cyàkenzekà; tùbuululàayi mu—mu—mu Byenzedi, nshapità wa 19. Amu mmutùdi tusangana bayiidi bàà Yone. Muntu ne muntu wàkabàtìijìibwa mu Dìnà dyà Yesù Kilistò, too ne mutùdi mpindyewu tulwa kupeta musumbà ewu kaaba aka. Byenzedi, nshapità wa 19. Nènku tùbangààyaaku kubala mpindyewu, nènku nyewù tupeta bayiidi bàà Yone:

Nènku byàkenzeka ne, . . .pàvwà Apòlò (yèyè ùvwa mwakwidyanganyi, mukùdimùne mucima awu) ùsanganyìibwa ku Kolìntò, Pòlò mumanè kupicila mu nseke mitùmbùke yà. . .Efèsò: ùdi ùsangana bayiidi kampànda, (bàvwa bayiidi bàà Yesù)

150 Bu nwènu ànu mwà kwikala bamòne nshapità udi mudyànjidile awu, bàvwa munkaci mwà kupicila mu cikondo cyà dicyònkomoka mu mùshindù wà bèèla mbilà bàcyònkomoka. Mbanganyì bàdì bamanyè ne aci ncilèlèlè? Nènku Akùlà ne Pìisikilà bàvwa balwè mu disangisha adi. Kàdi Pòlò ne Siilà bàvwa batuuciibwe ne beediibwe mfimbù, ne beediibwe mu bulokò. Mmwòmò anyi? Nènku bààkalwa kaaba aka, ne bààkasangana Akùlà ne Pìisikilà. Nènku bàvwa bènza ditàbuluja kuntwaku kùdi muyiishi kampànda wa ba-Baptistes, dìnà dyèndè Apòlò, uvwa ujaadikilangana ku Mifùndu ne “Yesù ùvwa Kilistò.” Mpindyewu Pòlò ùdi ùmusangana:

. . .Pòlò mumanè kupicila mu nseke mitùmbùke yà. . . Efèsò, . . .ùdi ùsangana bayiidi kampànda,

Yèyè wàkabàmbila ne: Nukàadi bapetè Nyumà Mwîmpè kacya nwítabuujà anyi? . . .

151 Mpindyewu, wèwè mulunda wanyì munanga Baptiste, aci cyòci kaciyikù cyùpula bi—bipànda byà teòlòji *wenu* awu to, panwàkambà ne “nwàkapeta Nyumà Mwîmpè panwàkiitabuujà” apu.

152 Kàdi Pòlò yèyè ùvwa muswè kukonka ba-Baptistes aba ne: “Nukàadikù bapetè Nyumà Mwîmpè *kacya* nwítabuujà anyi?” Mpindyewu tàngilàayi cyàkambàbo:

...Kàdi bôbò bàakamwambila ne: Katwèna bamanyè... ní Nyumà Mwîmpè útukù to.

Ne yêyè wàkabàmbila ne: Mmu cinyi... (mpindyewu, nwènu baswè kwangata nkôngamyakù wa cyena-Ngelikà kaaba aka, yêyè ngwanùleeja's, "Mmu mûshindù kaayi munwàkabàtîijîibwà?")... Mmu cinyi... munwàkabàtîijîibwà nwènu? Ne bôbò bàakamwambila yêyè ne: Kùdi Yone uvwa apa ewu. Yone ngwâkatùbàtiiza.

¹⁵³ Mpindyewu ndi muswèku kukonka: Bu ne wêwè uvwa mupetè dibàtiiza adi, uvwakù mwà kwikala musànkîshîibwe naadi anyi? Muntu umwèumwè wàkabweja Yesù mu musùlù, ne kubàtiizayè Yesù Kilistò awu, muntu umwèumwè awu ngwàkabàtiiza bôbò bantu abu. Adi's ndibàtiiza dîmpèku's: kaciyi dimyaminangana, kaciyi dipongolwelangana dyà mâyi to, kàdi diinyijangana dyà mu Yadènà wa kale wa bitoci awu mu mwaba wùm wèwùm wè wàkabàtîijîibwà Yesù awu. Anjî elàayi meeji ku bwalu abu.

¹⁵⁴ Pòlò wàkamba ne: "Nukààdikù bapetè Nyumà Mwîmpè kacya nwítabuuya anyi?" Bôbò... yêyè... .

Bàakamba ne: "Katwèna bamanyè... ní kùtukù Nyumà Mwîmpè kampànda to."

Yêyè kwamba ne: "Nwènu nwàkabàtîijîibwà bîshi?"

Bôbò ne: "S'tudi babàtîijîibwe."

"Nwàkabàtîijîibwà bîshi?"

"Kùdi Yone!"

¹⁵⁵ Mpindyewu tàngilàayi cyàkambà Pòlò. Tàngilàayi apa:

Ne yêyè wàkabàmbila ne: ...nwàkabàtîijîibw-...
Kùdi Yone... Ne bôbò... .

Ne dibà adi Pòlò wàkamba ne: Cyà bushùwà Yone wàkabàtiiza... mu dibàtiiz-... dyà kanyinganyinga, mwikàle wàmbila... bantu, ... bîwwa bikèngela bwà kwítabuujabò ewu uvwa ulwa paanyimà pèndè, mbwena kwamba ne, Yesù Kilistò.

¹⁵⁶ Nwamònu's, Yone wàkabàtiiza ànu bwà kanyinganyinga cyanàànà, kàdi dibàtiiza dyà mu mâyi mu Dîna dyà Yesù didi bwà dilekelediibwà dyà mpèkaatù. Difuta dyà cibawù kadivwa dyenjiibwe musangu awu to, mpèkaatù kayivwa mwà kulekelediibwà to. Mpindyewu... Civwa ànu dyandamuna dyà ku kondò kàà mwoyi, bu mùdi mu mikenji. Luukà 16.16, mmwambè ne: "Mikenji ne baprófetà byàkadikù too ne ku Yone, kùbangila apu Bukalenge mbùkaadi bùyishiibwà." Mpindyewu tàngilàayi. Nènku... Tàngilàayi.

Nènku Pòlò wàkabambil-... (mpindyewu tàngilàayi)... Nukààdi nwènu bapetè... .

157 Mvensà mwi5—mwi5:

Nènku *pàakumvwàbo cyôci eci, bààkabàtijiibwa*
(cyàkàbìdì) *mu dìnà dyà* . . . Yesù Kilistò.

158 Mmwômò anyi? Nènku bantu aba, bantu bàà mu Byenzedi 2 aba, s' bààkabàtijiibwa mu Dìnà dyà Yesù. Beena Yudà bààkabàtijiibwa mu Dìnà dyà Yesù. Bàà Bisàmbà byà bendè bààkabàtijiibwa mu Dìnà dyà Yesù. Ne muntu yònsò mu Bible mujimà wàkabàtijiibwa mu Dìnà dyà Yesù.

159 Mpindyewu petàayaaku mwaba wùm wèpelè wùkaadiku mukwàbò muntu mubàtijiibwe mungà mùshindù, kàdi mèmè nèngàalukilè buludi kaaba aka nnùleejè mwaba wùdì èkèleeziyà wa Kàtòlikè ùciitaba, ne wàmba ne nwènù nudi nucitùmikila. Kàbìdì mmwambè ne: “Nkufwànyine kwikala bàmwè beena Mishònyì basungìdiibwe bwalu bàdi ne ndambù wa malongesha a Kàtòlikè, bu mùdì bàtismò mu dìnà dyà ‘Taatù, Mwànà, ne Spiritù Munsantu’; ne èkèleeziyà munsantu wa Kàtòlikè ùdi ne bukenji bwà kushintulula dísù dikolè adi kucyùmusha ku Dìnà dyà Yesù, kucitùma ku dìnà dyà ‘Taatù, Mwànà, ne Spiritù Munsantu,’ ne èkèleeziyà wa Mishònyì ùciitaba.” Ewu yèyè kèna ùciitaba to, mèmè ndi nshààla ne Bible. Mèmè ndi ngiitabuujà Bible.

160 Wèwè udi wamba ne: “Mwanèètù Branham, wèwè utu utùmina bantu dîyi bwà kubàtijiibwabò cyàkàbìdì anyi?” Kakùyì mpatà to! Pòlò's mmucyènzè, kaaba aka.

161 Mpindyewu tàngilàayi, twàngatàayi Ngalàtiyà 1.8, bwà tujandulè cyàkambà Pòlò:

. . . nànsha twètù, anyi mwanjèlo mufume mu dyulu,
munùyiishè mukwàbò èvànjeeliyò . . . èdiibwè mulawu.

162 Ki bwalu mbwòbù abu's: “Twètù anyi mwanjèlo.” Nènku Pòlò, muntu umwòumwè awu, wàkatùmina bantu dîyi bwà kubàtijiibwabò cyàkàbìdì biinè bàvwà bapetè dibàtiiza dimpè ditàmbe kule ne kule dyùdì wèwè mupetè adi's, mwanèètù wanyì; bwalu Yone Mubàtiji ùvwa mwanààbò ne Yesù Sungasunga, wa mamwèndè mukwàbò; ùbàtiiza mwànà wa mamwèndè mukwàbò sungasunga mu musùlù wà Yadènè, pashiishe kukùdimukayè e kubàtiiza bayiidi bàà Yone abu. Kàdi Yesù kwambaYè ne: “Aci kacàyàkukùmbana to!” anyi Pòlò's ngwàkaCyàmba, ne kubàtùminayè dîyi bwà kubàtijiibwabò cyàkàbìdì mu Dìnà dyà Yesù Kilistò kumpalà kwà kushiishabò kupeta Nyumà Mwímpè; paanyimà pàà bamanè kwela mbilà ne batùmbishe Nzambì ne bapicile mu cikondo cyà dicyònkomoka, bapetè ditàbuluja dinène—dinène, ne bajaadikilàngàne ku Bible (ku tèlòlòjì wabò) ne Yesù ùvwa Kilistò. Mbanganyì bàdi bamanyè ne aci m' Mufùndu? Nshapità wa 18. Mmùdibi cyà bushùwà. Ki bwalu mbwòbù abu's. Pa nànkù kakwèna mpatà Apu to.

163 Mpindyewu ngànji nnùpèeshèku kaacyena-bwalu kakesè. Mpindyewu, yèyè kàvwakù mupàtuke mu dîyi ditùma adi

to, kàdi mu Luukà...Maatàayi, nshapità wa 16. Yesù, pàakatùulukàbo ku mukunà, Wákamba ne: “Bantu bàdi bàmba ne Ndi Nganyì Mémè Mwànà wa muntu?”

164 “Bàmwè bàdi bàmba ne Udi ‘Eliyà,’ ne bakwàbò bàdi bàmba ne Udi ‘bapròfetà,’ ne bakwàbò bàdi bàmba ne Udi ‘cikampànda, cikansanga.’”

165 Yèyè ne: “Kàdi nwènù nudi nwamba ne Nganyì?”

166 Peetèlò kwambayè ne: “Wèwè udi Kilstò awu, Mwànà wa Nzambì udi ne mwoyi.”

167 Tàngilàayi! “Udi mubènèshìibwe, Simonà Bàayoona (mwànà wa Yona), kî mmunyiinyi ne mashi bidì bikubuulwile Eci to.” Amen!

168 Nwamònu’s, bidì bikèngela Cìlwe ku dibuulula dya nyumà. Kacìvwakù munyiinyi ne mashi byàkambilà Abèlè ne ùvwa mupìile (Kaayinà, bwà ne ùvwa mupìile) to, kî mbyòbì byàkambilà Abèlè ne “Kaayinà ùvwa mupìile” to. Kàdi cìvwa ndibuulula divwà Abèlè mupetè ne: “Cìvwa mmashi!” Netùbwele mu lukonko alu mu tusunsa tukesè emu. Cìvwa mmashì, kacìvwa mbimuma to, bidì bitùmùshishe mu budimi bwà Edènà. “Cìvwa mmashi,” ne Abèlè, ku dibuulula dyà nyumà, bàakamubuulwila kùdì Nzambì ne cìvwa mmashi, nènku yèyè: “Ku diitabuuja,” mùdì Ebèlù 11.1 wàmba, “wàkalàmbula Nzambì mulàmbù mwìmpè kutàmba wà Kaayinà. Nènku, Nzambì wàkìitaba mulàmbù wèndè awu.” Ki bwalu mbwòbù abu’s. Nwamònu’s, wàkawùlàmbula ku diitabuuja, ku dibuulula.

169 Mpindyewu tàngilàayi: “Kî mmunyiinyi ne mashi bidì bikubuulwile eci to,” (buludi too ne ku Mukalenge Yesù) “kàdi n’Taatù Wanyì udi mu Dyulu udi mukubuulwile Eci. Nènku pa lubwebwe elu (dibuuludiibwa dyà Yesù Kilstò) . . . Pa lubwebwe elu Mémè nèngiibakilèpu Èkèleeziyà Wanyì, ne biibi byà ifèrnò kabyènakù mwà kuMutàmba bukolè to.” Ki cyàkambàYè ncyòcì acì. Dibuulul-. . .dyà nyumà. “Nènku Ndi ngamba ne wèwè udi Peetèlò, ne Mémè nènkupèèshè nsapì yà Bukalenge. Ne cyònsò. . .Bwalu wèwè udi mupetè kajila kàà nyumà kunzulula pankacì pàà pànwapa ne Dyulu. Munyiinyi ne mashi: kacya kùtukù muyè mu sèminère kampànda to, kacya kùtukù mukalongè kàlaasà to, kacya kùtukù mulongè dilongesha kampànda dyà—dyà—dyà tèlòlòjì to. Kàdi utu mweyèmène Nzambì, ne Nzambì ngudi mukubuulwileCi, ne kakùyì mpatà to yidi ànu m’Mifundu mitòoke tòò yidi yiCìtwàngaja cyònsò. Ndi ngamba ne wèwè udi Peetèlò, ncyà bushùwà, ne Mémè nènkupèèshè nsapì ayi; ne cyùdì wèwè uswika pa buloba, Mémè nèncìswikè mu Dyulu; cyùdì wèwè usùulula pa buloba, Mémè nèncìsùulùlè mu Dyulu.”

170 Ne Peetèlò ngwàkadi mwakudi mu Ditùkù dyà Mpenta, pàvwàbo bònsò ne bwòwà bwà kwakula apu, yèyè wàkaakula ne

díyì dikolè ne wàkamba ne: “Nwènú beena Yudaàyà ne nwènú bàdì basòmbèle mu Yelusàlemà, eci cimanyiibwè kunùdì ne tèèlejàayi Mèyì àanyì. Bantu aba kí mbakwàcike maalà munùdì nudicinkila amu to, pa kumòna ne tucidi ànu pa díbà citèemà wa ditùkù, kàdì eci ncyàkambàbo kùdì mupròfetà Yowèlà aci. ‘Nebyènzekè mu matùkù a ndekeelu,’ mùdì Nzambì wàmba, ‘Nèngiìcikijè Nyumà Wanyì pa mubidi wònsò. Bàna bèènú balela bàà balùme nè bàà bakàjì nèbàmbè bipròfetà. Ne pa basadidi Bàanyi balùme, basadidi bakàjì, Nèngiìcikijè Nyumà Wanyì. Ne Nèndeejè bimanyinu muulu mu maulu ne panshì pa buloba, ne makunji a mwìshì ne mabungì. Nebyènzekè kumpàlà kwà Ditùkù dinènè didì dikwàcisha bwòwà dyà Mukalenge kulwadì ne, ewu yònsò wasòka Dìna dyà Mukalenge awu neàsungidiibwè.” Ki bwalu mbwòbù abu’s. Kaa, ekèlekèle.

171 “Lekèlaayi nnwàmbilè mudilekèlèle bwà nkambwà Davìdì,” mwàkambàye, “mmufwè ne mujiikìibwe, ne lukità lwèndè lùdì munkàci mwètù too ne ku ditùkù edi. Ki bwà cinyì, bu mùvwàye mupròfetà, wàkamòna. . .wàkadyànjlila kuMumòna ku dyàbalùme Dyèndè: ‘Ne mèmè ncyàkunyungishiibwakù to. Kàbidì mubidi Wányì newikishè mu ditèkemena bwalu Yèyè kààkushiya musùukà Wányì mu ifèrnò to, anyi kààkwitaba bwà Wa Cijila Webè àmonè dibola nànsha.”

172 “Ne Davìdì mmufwè,” mwàkambàye, “ne mujiikìibwe, ne lukità lwèndè lùdì munkàci mwètù mu ditùkù edi. Kàdì bu mùvwàye mupròfetà, yèyè wàkadyànjlila kumòna dilwa dyà Mwakàne Awu, Udi Nzambì muvwijè Mukalenge ne Kilistò.” Kaa, ekèlekèle. Ki Mifundù yènú nyòyì ayi’s. Ki cintu ncyòci aci’s. Ki cyòci aci.

173 Mpindyewu tudi tusangana kaaba aka ne, díbà adi, mùshindù mujaalàme, ne mùshindù mulelèlè, ne mùshindù wùmwèpelè wùvwàku mulongolola. . .Nènku Peetèlò nguvwa ne nsapì ayi, ne mu ditùkù dyàkayiiishàye adi, bàakamba. . . Mpindyewu tàngilàayi, ki Èkèleeziyè wa kumpàla nyèyè ewu. Nwènú beena Kàtòlikè tèèlejàayi Eci. Nwènú ba-Campbellites tèèlejàayi Eci. Nwènú ba-Baptistes ne ba-Méthodistes tèèlejàayi Eci. Ne nwènú beena Mpenta tèèlejàayi Eci. Beena Église de Dieu, ba-Nazaréens, ba-Pèlerins de la Sainteté, tèèlejàayi Eci.

174 Peetèlò nguvwa ne nsapì ayi, ne yèyè nguvwa ne bukòokeshi, bwà cyanààná Yesù ùvwa mushimè. Kàdì pààbì kabyènakù mwà kwenzeka bwà Yèyè kushima nànsha, “bintu bibidì bìdì kabìyì bìshintuludiibwa, kabyèna mwà kwenzekakù to bwà Nzambì àshimè.” Yèyè nguvwa ne nsapì ayi. Yesù nguvwa mumupèèshe nsapì ayi. PàakabìikàYe ku lufù mu—mu ditùkù diisàtù mùshindù awu, Yèyè ùvwa ne nsapì yà lufù, ne yà ifèrnò, kàdì kàvwa ne nsapì yà Bukalenge nànsha. Peetèlò nguvwa naayi! Ncyà bushùwà menemene.

175 Kàdì mpindyewu tàngilà, Peetèlò, wèwè ngudi ne nsapì ayi milembeleja ku luseke lwèbè, ne ngwèwè awu munkàci

mwà kuyiisha. Lukonko lùdi lùlwa, bakùdimùne mucimà bàà kumpàlà bàà èkèleeziya mupyamùpyà abu. Èkèleeziyà wa beena Kilistò wa ku cibangidilu awu. Mpindyewu wèwè mwena Kàtòlikè, mpindyewu wèwè Baptiste, Méthodiste, Presbytérien, udi pa dilongesha dyà Èkèleeziyà Mupyamùpyà awu adi anyi? Jandùlàbi tǔng ní udipù.

...Balùmyànà *ne bàna bèètù*, citùdiku *twètù* mwà *kwenza ncinyi?*

...*Peetèlò wàkajuuka e kwambayè... Nyingàlalaayi, ...muntu ne muntu wa kunùdi...* (dimukà, wèwè mulùmyànà; mùshindu wùdi wela nsapi ayi pànwapa awu, s'ki wàyélà Kilistò mu Dyulu) ...*Nyingàlalaayi*, muntu ne muntu wa kunùdi, ne bàtijiibwàyi *mu dîna dyà Yesù Kilistò*... (ki munùdi nubwela mu Eci nàнку) ...*bwà dilekelediibwa dyà mpèkaatù yènù, nènku nwènù nenùpetè kupà kwà Nyumà Mwimpè.*

¹⁷⁶ Ki nsapi ayi kwenzayi ne “cyak” pànwapa, ne yôyi kwenza “cyak” Mwàmwa. Ki bwà cinyi byàkakèngela bwà bayiidi bàà Yone kulwabò ne kubàtijiiludiibwabò, cyàkàbidì, mu Dîna dyà Yesù Kilistò (kumpàlà kwà kumònabò mwà kubwela mu Dyulu), kupetabò Nyumà Mwimpè. Yèyè wàkashààla mukwàte ku Diyì Dyèndè. Pa nàнку mpindyewu kacyèna cìnùpèèsha cibwejàkàjì to, mmwómò anyi? Nwamònu anyi? Ncyà bushùwà ne, Maatàayi 28.19 yivwa mmyànzu, kacivwa Dîna to.

¹⁷⁷ Èyo, tucidi ne dîbà bùngì kaayi? Tudikù mwà kwikala ne tukwàbò tusunsa dikùmi ne tùtaanu bwà kwandamunakù lùkàsàlùkàsà ku ndambù mukwàbò wa nkonko anyi? Tudi mwà kwikala naatù anyi? Èyo, netùlwijakajè ne lùkàsà lwònsò. Ndi naayi yibidi kwìnshì eku, yimvwa njinga kwangata lùkàsàlùkàsà, yivwa yìpetanganà ne elu nùku, mèmè ne mùshindù. Pashiishe ndi mwà kwangata mikwàbò yà ku yôyi ayi mu dyàlumingu mu dindà.

57. Kaayinà ùvwa mwánà wa nyòka anyi? (Elu ndwà lwimpè.) Pùikalàbi nàнку, bwà cinyi Evà kààkiimita difù ànu too ne paanyimà pàà Adàmà mumanè kumumanya?

Lùmwèlùmwè alu... Lukonko lùdi lùlondà lùdi mùshindù wùmwèwùmwè awu:

58. Kùvwa nku mucì wètù wà—wà cyà bushùwà ewu kwàkadyà Evà cimuma anyi? Yèyè's wàkamòna ne civwa cimpè cyà kudyà.

¹⁷⁸ Èyo, mwanèètù wa balùme, mwanèètù wa bakàjì, nànsha ní ùvwa nganyi, twànjiibi kwalukila mu Genèsè bwà tùjandulè cintu kàmpànda kaaba aka. Tùye mu Genèsè 3.8, pawikalà muswè. Èyo, ne tèelejàaku ne ntèmà yònsò mpindyewu.

¹⁷⁹ Mpindyewu nèngàalujululè bwalu abu. Byònsò bìvwa bikezùke ne byà cijila, kakùvwakù mpèkaatù anyi dikooyika

nànsha. Mpindyewu nêngàngatè . . . lwbèbè . . . dyàmbedi lukonko lwà kumpàlà elu. Muci mu nsòmbelu . . . munkaci mwà budimi, munkaci mwà mucì. *Muci* awu wùvwa “mmukàjì.” Mpindyewu nènnùjaadikilèci ku Mifundu bu nwènu ànu mwà kwikala ne lutuùlù bwà ndambù wa tusunsa.

180 Netwánjì dyàmbedi kumòna yéyè ní ùvwa . . . ní wàkiimita difù kumpàlà kwà kumanyanganayè ne Adàmà anyì to, anyì kumpàlà kwà . . . Tèèlejàayi:

Ki kuumvwabò díyì dyà MUKALENGE Nzambi wènda wèndakana mu budimi amu, ne mu citaleela cyà ditùku, ki Adàmà ne mukàjèndè kusokomabò kule ne bwikadi bwà MUKALENGE Nzambi munkaci mwà micì yà mu budimi.

Nènku MUKALENGE . . . wàkabùkila Adàmà, ne wàkamba . . . Udi penyi?

Ki yéyè kwamba ne: Ngùmvù díyì dyèbè mu budimi, ne mèmè kuumvwa bwòwà, bwalu mwà butakà; . . . (mpindyewu, kàvwa mumanyè aci ditùkù divwà didyànjlè to; cintu kampàndà civwa cyenzèke, cintu kampàndà civwa cimubuulwile ne yéyè ùvwa butakà) nènku mèmè kusokoma.

Ki yéyè kwamba ne: Wàkwambidì ne udi butakà nganyi? Udi mudyè ku mucì, . . . anyi?

181 Kwikala mudyè ku mucì awu ki kwàkamufikisha ku dimanya ne ùvwa butakà anyi? Múnkaadi misangu yàbúngì mwambàmbe, (eci kí mbilèlè ngeela to, ncyèna ncyàmba bwà kwela bilèlè to) “Kàdi pìikalà kudyà kwà bimuma byà pommes nkwakafikishà bakàjì ku dimanya ne bàdi butakà, s’mbimpè túbàbànýinè cyàkàbidi bimuma byà pommes.” Nwamònu anyi? Kacivwa mbutakà to. Kacivwa mmucì, kí ncimuma cyà pomme cyàkadyàbo to, civwa ndisangila dyà mulùme ne mukàjì. Tàngilàayi:

. . . Udi mudyè ku mucì, kùmvwà mukutùmìne díyì ne kabivwa bikèngela bwà wéwè kudyà anyi?

Ki mulùme kwambayè ne: Mukàjì údi mumpèèshe, bwà kwikalayè naanyi awu, yéyè ngudi mumpèèshe . . . mucì, ne mèmè kudyà.

Ki MUKALENGE . . . kwambìlayè mukàjì ne: Eci cyùdi mwenzè eci ncinyi? Ki mukàjì kwambayè ne: Nyòka ngudi mungambishe, . . . (huh?) . . . Nyòka ngudi mungambishe, ne mèmè kudyà. (ntàntà mule kumpàlà kwà kwimitayè, nwamònu’s, difù dyà Adàmà)

182 Adàmà kumanyanganayè nendè, ki kwimitayè difù ne kulelayè—ne kulelayè Abèlè.

183 Kàdi ndi muswè nnùkonkèku, ànu ku mmwènenu wetù wa cyà bushùwà ewu. Mpindyewu bwà kunùjaadikila ne mukàjì

nguwwa mucì, mukàjì yònsò ewu mmucì wà bimuma. Mbanganyi bàdi bamanyè nankù? Wèwè kwèna cimuma cyà mamwèbè anyi? Cyà bushùwà, ki cyùdi. “Ne munkaci mwà mamuma, anyi munkaci mwà mucì, cimuma cidìye kàyi ùlenga aci.”

¹⁸⁴ Bu nwènu mwà kumòna, Yesù kàvwa Mucì wà Mwoyi anyi? Yèyè kààkalayakù mu Maataàyi Munsantu, anyi, Yone Munsantu, nshapità mwi6 ne: “Mémè ndi Dyàmpà dyà Mwoyi didi difùme kùdi Nzambì mu Dyulu” anyi?

¹⁸⁵ Muntu yèyè mudyè ku mukàjì...Kàdi tàngilàayi, ku dilediibwa dyà...kùdi mukàjì, twètù bònsò tudi tufwà; bwalu tudi ku bukoòkeshi bwà lufù (mmwòmò anyi?) ku dilediibwa dyà kùdi mukàjì. Ku dilediibwa dyà kùdi mulùme, twètù bònsò tudi ne mwoyi kashidi. Mukàjì mmucì wà lufù, mulùme mmucì wà mwoyi; bwalu mukàjì kèna nànsha mene ne mwoyi munda mwèndè to. Ncyà bushùwà menemene. Ci—civuba cyà mwoyi cidi cipàtukila munda mwà mulùme, menemene’s. Cibwela munda mwà mukàjì, ne mukàjì kèna cingà cintu to ànu cyamù cyà ditooyishila; ne mwànà kèna mutwàngàne nendè to, anu ku mùfù. Katobà kàà mashi a maamù nànsha kakesè kakeèna mu mwànà awu to; mulediibwe mu mashi a maamù, kàdi katobà nànsha kakesè kakeèna *mu* mwànà awu to. Ndà ùmonè... anyi ùbalè mukàndà wà ngàngàbukà, anyi ùkonkè ngàngàbukà webè awu, neùmonè. Kaenamù to, to, mukalenge, katobà kàawù nànsha kakesè. Yèyè ùdi ànu dīyì, kwàjikì. Ne mwoyi wùdi wùfùmina kùdi mulùme.

¹⁸⁶ Aci’s ncifwànyikijilu cilenga bwà kuleeja ne ku mukàjì, ku dilediibwa dyà mu bufùki, bikèngela bwà twètù bònsò kufwà, bwalu tudi bafwè ànu kwìnè kwònsò aku; ne ànu ku Mulùme Kilistò Yesù nkutùdi mwà kwikadila ne mwoyi. Nènku ki micì yibìdi yìvwà mu budimi bwà Edènà nyòyi ayi. Kanwènaayikù mwà kucimòna anyi?

¹⁸⁷ Nènku tàngilàayi! Nènku mu ditùkù adi kwàkatèkiibwa Mukèlùbà mulamè mucì ewu. Bwà ne nkwèpì kwàlwàbo kulabula ku Mucì wà Mwoyi awu, bafwànyine bònsò kwikala ne mwoyi kashidi. Mbanganyi bàdiku bamanyè nanku? Bàvwa bònsò bafwànyine kwikala ne mwoyi kashidi. Ne musangu wà kumpàlà wùvwàbokù bafwànyine kukùlabula... Mwanjèlò wàkamba ne: “NetùWùlamè.” Ki kutèèkabò Bàkèlùbà muntwamu ne myèlè yà mvità yà yilàkuka kapyà lwà ku esètè bwà kuWùlama. KuWàlujabò ku Esètè, ne bàlama Mucì awu ne myèlè yà mvità yà yilàkuka kapyà bwà kabàpeci mwà kubwela bwà kuWùpeta to (Mucì ewu).

¹⁸⁸ Kàdi pààkalwà Yesù, Wàkamba ne: “Mémè ndi Dyàmpà dyà Mwoyi, bwà muntu yèyè mudyè Dyàmpà edi kàyikù ùfwa to.” Ki Mucì wènu ngwòwò awu.

¹⁸⁹ Ki mukàjì wènu nyèyè awu, ki disangila dyènu dyà mulùme ne mukàjì didi ditwàla lufù ndyòdi adi. Ànu mùdibi bushùwà ne kùdi dijinga dyà disangila dyà mulùme ne mukàjì, kùdi

lufù lushiyakù. Ne ànu mùdìbì bushùwà ne kùdì dilediibwa dyà mu nyumà, kùdì Mwoyi wa Cyendèlèlèlè mushiyyaKù. Lufu lwàkalwila ku dilediibwa dyà kùdì mukàjì, ne Mwoyi mmulwilè ku dilediibwa dyà kùdì Mulùme. Amen! Ki bwalu mbwòbù abu's.

¹⁹⁰ Mpindyewu twàlukilàayi kùdì Kaayinà. Nudikù bafwànyine kungambila kùvwà nyumà awu ne lwonji alu bifùmìne anyi? Piikalàbì ne Kaayinà. . . tângilàayi, piikalàbì ne Kaayinà ùvwa mwànà wa Adàmà uvwa mwànà wa Nzambì awu, bubì abu bwàkafùmìna penyi? Cintu cyà kumpàla pààkalediibwàye, wàkakina, ùvwa mushipyanganyi, ùvwa ne mukàwù. Nènku mpindyewu angàtàayi ngiikàdilù wa tatwèndè awu, mbangilu mwìnè ku cibangidilu, Lusifèrè, ne yéyè ùkaavwa ku cibangidilu. . . wàkumvwila Mikàèlè mukàwu, cyàkabangà lutàtù mu kaabujimà aci. Mbanganyi bàdì bamanyè nànkù? Ne Kaayinà nguvwa ngiikàdilù wa tatwèndè, yéyè wàkumvwila mwanààbò mukàwu kàdì kumushebeyayè. Mukezùke awu. . . ngiikàdilù awu kàvwa mwà kupàtukila mu musùlù mukezùke awu to. Ùvwa mulwè. . . ùvwa ne cyà kupàtukila ànu mu musùlù munyangakaja ewu. Kàdì mònaayi Kaayinà, pènjiye anu ne wàlediibù.

¹⁹¹ Ne pashiishe Abèlè wàkalediibwa paanyimà pèndè, pashiishe kwimicilayè kùdì Adàmà, ne kumumanyayè—kumumanyayè ne yéyè kulela mwanèndè wa balùme Abèlè. Ne Abèlè ùvwa cifwànyikijilu cyà Kilistò; ne pàà—pààkashipiibwà Abèlè, Setè wàkangata kaaba kèndè; lufù, dijiikiibwa, ne dibìikà dyà ku lufù dyà Kilistò, mu cifwànyikijilu.

¹⁹² Kàdì, mpindyewu, Kaayinà ùvwa ùkuukwila; byenzedi byèndè byònsò byà musunya abi, ànu mùdì èkèleeziyà wa musunya leelù ewu emu: bàyaaya mu èkèleeziyà, bàdì bàkuukwila. Kaayinà ùvwa ùkuukwila; kàvwa mwena dyabùlù to; kàvwa communiste to. Kaayinà ùvwa mwena kwitabuujà; wàkaya kùdì Nzambì, wàkiibaka cyoshelu. Wàkenza cintu cyònsò cyà butèndeledi cyàkenzà Abèlè aci, kàdì kààkapeta dibuulula dyà nyumà dyà diswa dyà Nzambì to. Dìna dyà Mukalenge dibeneshiibwè's wè! Ki bwalu mbwòbù abu's. Nudi nuCimòna anyi? Kàvwa mupetè dibuulula dyà nyumà to, nènku ki lutàtù lùdì naalù èkèleeziyà leelù ewu ndwòlò alu. Ne Yesù wàkamba ne Yéyè neibakilè Èkèleeziyà Wendè pa dibuulula dyà nyumà adi. Nudi nuCyùmvwà anyi? Kaa, ekèlekèlè, mèsù enu's àdì mwà kutàbala mpindyewu. Nwamònu's, dibuulula dyà nyumà.

¹⁹³ Kaayinà kulwayè: kwibakayè cyoshelu, kukuukwilayè, kulwayè ne mulàmbù, kutwàye binù, kutùmbishayè Nzambì, kukuukwilayè Nzambì, kwenzayè byònsò byà butèndeledi byàkenzà Abèlè abi. Kàdì Nzambì wàkamubènga mwoshè ne munu mwìkù bwalu kààkapeta dibuulula dyà nyumà to!

¹⁹⁴ Londèshaayi njila umwèumwè wa Kaayinà awu: mmuyè buludì too ne ku bwâtù abu, muumùkile ku bwâtù mukabwelè buludì mu Izâlèèlà, muumùkile ku Izâlèèlà muyè kabwela buludì mu Yesù, ne muumùkile ku Yesù too ne ku ditùkù edi; ne mònaayi ní èkèleeziyà wa musunya, wa maalu bu mudiwù mafùndiibwe, mukàyàbàlè ne muumàkàne, wa mamanya a mu tùlaasà awu, ndi nswà kwamba bantu bàdi ne Mifùndu, bàdi bamanyè dilongesha dyònsò ne maatèlòjì, bàdi mwà kubyùmvwija's, balùmyànà wa yààyà, ànu mùshindù awu, kàdi kabàyi ne dibuulula dyà nyumà to! [Mwanètù Branham ùdi ùtuuta cishòndò—Muf.] Ncyà bushùwà. Aci's ndilongesha dyà Kaayinà.

¹⁹⁵ Bible mmwambè ne: “Dyàkabi dyàbo! bwalu bàakalonda dilongesha dyà Kaayinà, bànyeemena mu bilèmà byà Baalàmà, ne bàakabùtukilà mu ditomboka dyà Koolà.” Mukàndà wùm wèwùm wè awu, Yudà, wàkamba ne: “Bàvwa badyàn jila kulongolwela dipiila edi.” Cyà bushùwà, ki civwàbo balongolwela. Nwamònu anyi? Baalàmà ùvwa nganyi? Ùvwa mwèpiskòpò. Ùvwa kumutù kwà èkèleeziyà mujimà. Wàkamwènèka mwaba awu mwikàlè ànu mwitabi wa maalu mùvwàwu mafùndiibwe amu. Kulàmbulayè . . . Mutàngilaayi mùdiye mwimàne mwab'awu mu bantu bàà bamanyike bikolè, biimàne mwaba awu mu bantu bààbo bàà bamanyike bikolè abu. Ne bòbò kabàvwa beena dyabùlù to, bàvwa beena kwitabuuja.

¹⁹⁶ Cisàmbà cyà Moàbà aci—aci civwa cipàtùkile mu mwànà wa bakàjì wa Lotà. Lotà uvwa mulààle. . . Mwànà wa bakàjì wa Lotà wàkalààla ne tatwèndè awu, ne mwimite difù ne mulelè mwànà awu, ne mwànà awu ùvwa. . . ki kwàkajuukilà cisàmbà cyà Moàbà. Ne bòbò bàvwa dingumba dinène. Bantu banène, bàà tùyaayi tükamònè, ne bàvwa ne bânà bàà bamfùmù ne bamfùmù ne bantu bàà bamanyike bikolè. Bàvwa ne bèèpiskòpò ne baakàardinalè ne bikwàbò byònsò.

¹⁹⁷ Kàdi ki musùmbà wà bansantu babùnguluki bàà mu malaba bàlwalwà aba, kasùmbù kakwàbò, Izâlèèlà; musùmbà mukesè wà kale wùvwà kawùyi wà màngumba, kawùyi wà bàsungulujangana bilondèshile màngumba to. Ne bààkenza byònsò bivwàku pa karta bivwà ne cyà kwenjiibwa abi, bibi kàbidì. Kàdi civwaku ncyà ne, bàvwa ne dibuulula dyà nyumà, ne Nzambì ùvwa naabò mu Dikunji dyà Kapyà.

¹⁹⁸ Kaa, ndi—ndi mumanyè ne bàvwa ne bintu byà mu musunya, ne bantu baàkamba ne: “Musùmbà wà bantu bàà bènza bundù mùshindù awu, kabàyi ne cyà dyenza naabò to ànu kubiiipata.” Kàdi bòbò bàvwa ne dibuulula dyà nyumà, ne bàvwa ne Lubwebwe lutuuta, bàvwa ne nyòka wa cyamù cyà kabanda, bàvwa ne Dikunji dyà Kapyà diikàlè dyènda naabò. Alèluuyàh! Ndi mumanye ne nudi—nudi nwela meeji ne ndi musalùke, kàdi ncyèna musalùke to. Ndi ndyùm vwa ànu bimpè cyanàànà.

¹⁹⁹ Mònaayi! Pàndì ngeela meeji ne: “Nzambì umwèumwè awu, leelù ewu, udi ne mwoyi pàmwè neetù.” S'cicidi anu dibuulula

dyà nyuma dyà Dìyì. Ncyà bushùwà ne, ndyòdi. Ncyà bushùwà Cyendèlèèlè. Dìnà dyà Mukalenge dibeneshiibwè! Èyòwà's, mukalenge.

²⁰⁰ Ki yèyè uvwa mwimàne pààpa wàwa, mwitabi wa maalu mùdiwu mafùndìbwe amu; musùmbà wa ba-Baptistes ne ba-Presbytériens abu bàvwa biimàne pa kakùnà apu, ne bàvwa ne mwèpiskòpò wabò awu mwab'awu. Ne bàvwa ànu batèndeledi bàà menemene, ne ntèndeleeu wa mùshindù ànu wùm wèwùmwe awu, bàkuukwila Nzambì ànu wumwèwumwè awu. Bòbò ne: “Tàngilà musùmbà wà bùcyafù wàwa. Mòna's, kabèèna nànsha ne òngumba to. Bàdi ànu musùmbà wà bantsantu babùnguluki bàà mu malaba, benji bàà mutooyi's, beela mbilà.”

²⁰¹ Ncyà bushùwà anyì? Menemene's, ki cìvwàbo. Wèwè kuyi wítabuujà ne bàvwa bantsantu babùnguluki bàà mu malaba to, alùkila mu Genèsè ùjandulè pàakasabukàbo apu. Kàdi cishimà cyàkenjiibwa, ki Miliyàmà kwangatayè dikasa kàdi kupweka ku mwelelu wà màyi, wènda wimba; ùja maja mu Nyumà, ne Mòsà wimba mu Nyumà. Aci kacyi musùmbà wa batùdi tubiikila ne mbadìlekèlèlè. . . bantsantu babùnguluki bàà mu malaba to, ncyèna mumanyè ne ncinyi to; bìmba bàtùpika, bàtùmbisha. Ne dìbà dyònsò matùnga àvwa mabàkine, kàdi Nzambi ùvwa naabò. Bàvwa ne dibuulula dyà nyumà, bàvwa bènda bàlonda Dikunji dyà Kapyà adi.

²⁰² Ki Moàbà kwamba ne: “Mpindyewu, tàngilà kùneeku. Twètù netùbiikilè baakàrdinalè ne bèèpiskòpò bònsò, ne bakùlù bònsò, ne kubàfikisha kaaba aka. Netwènzè cintu kampànda pa bwalu abu, bwalu twètù tudi ditùngà dyà batèndeledi. Katwàkulekelakù dilàkà dyà mukana adi disambakanangana ne òngumba dyètù dilenga edi nànsha.”

²⁰³ Ki kuyabò naabò kuntwaku. Ki kwibakabò byoshelu dikùmi ne bìbìdi; ki menemene cìvwà Izàlèèlà naabi, byoshelu dikùmi ne bìbìdi. Bòbò kulàmbulapù milàmbù dikùmi ne yìbìdi, bimpàngà bya ngombe; ànu menemene bìvwà Izàlèèlà naabi abi, bìvwà Nzambi mulòmbe abi. Bòbò kutèekapù mìkòòkò dikùmi ne yìbìdi, cìleeja dilwa dyà Mukalenge Yesù Kilistò; mìkòòkò dikùmi ne yìbìdi mu myaba yònsò yìbìdi ayi.

²⁰⁴ Bantu bònsò bàà bamanyike bikolè abu, bèèpiskòpò ne bònsò, bimàne mu nyùngulukilu amu. Bààkateemesha mudilu pa mulàmbù awu. Bààkasambila, bààkeela byanza muulu kùdi Yèhowàh bamba ne: “Yèhowàh, tùtèlèjèku!” Cìvwàbo bàteeta kwenza aci ncinyi? Ki Baalàmà wabò wa kale awu kupàtukayè mùshindù ewu, ki Nyumà kumutùlukilaYè. Bushùwà's (kàdi yèyè wa musunya).

²⁰⁵ Nyumà ùdi mwà kutùlukila mwena lubombo, mùdi Bible mwambè. Mpindyewu, nukàadi bangumvwè ndongesha cyòci aci. “Mvùla ùtu ùlòkela bìmpè ne babì.” Kàdi bikèngela cìkumbanganè ne Dìyì, ki paùdi ucyùm vwa.

206 Pashiishe pààkenzàye nàнку, ne . . . pàvwà Nyumà, nànsha nàнку, pambidi pèndè wàmba Bulelèlà, kuteetayè bwà kwela Izalèlèlà mulawu, kàdi kubèshayè Izalèlèlà.

207 Mpindyewu, piikalà cidi Nzambì ùneemeka ng'èkèleeziyà mulenga, ne mwèpiskòpò mulenga, ne mpaasàtà mulenga wa dikèma, musùmbà wà bamanyi bàà mabàla, Yèyè's ùvwa mwena dibànzà dyà kwitaba mulàmbù awu, bwalu bilondèshile maalu mùvwàwu yèyè ùvwa mu bulelèlà ànu mùvwà Izaleela mu bulelèlà amu; kadi yèyè kàvwa ne dibuulula dyà nyumà dyà Dìyì ne diswa dyà Nzambì to. Ki bwalu mbwòbù abu's, ki dishiilangana leelù ewu ndyòdi adi.

208 Tàngilàayi Yesù. Bààkamba ne: “Muntu awu àyiilè kwàka. Tudi bamanyè ne Yèyè mmwena Sàmaalèyà. Mmupàle. Wèwè udi muswè kutùlongesha twètù anyi? Èè, wèwè's udi mulela mu masandi. Kùvwa cingà cintu to ànu mwàna mulela mu masandi wetù ewu. Tatwèbè nganyi? Wamba pèèbè mùdi Nzambì tatwèbè, s'udi mupendi wa Nzambì's! Mòna's, udi ne cyà kutwàmbila anyi? Twètù's tudi bayiishi, s'tudi bèèpiskòpò; kupicila ku baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baatatwèndè wa baakatwètù bàvwà bayiishi ne bèèpiskòpò. Tudi balediibwe ne bakolèshiiibwe mu èkèleeziyà. Tudi bapicile mu maasèminèrè a matàmbe kutùmbuka. Tudi bamanyè Dìyì ne Dìyì dyònsò ku dileetà ne ku dileetà. Uteeta pèèbè bwà kutùlongesha twètù? Mpenyi paùkaadiku wèwè ewu muyè mu kàlaasà? Edi dimanya udi mudipetele kwèpi?”

209 Yèyè ne: “Nudi bàà . . . tatwènù dyabùlù,” mwàkambà Yesù.

210 Bòbò kabàvwa ne bimanyinu ne maalu a kukèma munkaci mwàbò to. Kabàvwa ne dyondopa dyà kùdi Nzambì ne bikwàbò munkaci mwàbò to. Kabàvwa ne mabènesha munkaci mwàbò to. Kàdi kakùyì mpatà to Yesù nguvwa dibuulula dyà nyumà dyà Mifundu.

211 Bòbò ne: “Mòna's, s' bààkafùnda *bikampànda-bikansanga*.”

212 Ki Yesù kwamba ne: “Èyowà, ne bààkafùnda kabidi ne.” Kàdi Nzambì ùvwa ùshìndika muntu Wendè ku bimanyinu byèndè.

213 Peetèlò wàkamba cintu cìmwècìmwè aci, mu Byenzedi 2, wàkamba ne: “Nwènù bantu bàà mu Izalèlèlà; Yesù wa mu Nazalèetà, Muntu mwanyishiibwe kùdi Nzambì munkaci mwènù, ku bimanyinu ne maalu a kukèma byàkenzelà Nzambì kùdiYe munkaci mwènù, ne binùdi nwènù bònsò bamanyè abi.” (ki bwalu mbwòbù abu's) “Yèyè wàkafidiibwa kùdi . . . ku didyànjiil- . . . kùdi Nsangilu munène wa Tubàdi twà beena Yudà kuntu kwaka. Kàdi ku didyànjila-kumanya dyà Nzambì, Nzambì ùdyànjila kulongolola bwà Yèyè kufwà lufù elu. Nwènù kuMufidila ku byanza byà cikisu ne byà lwonji. Nwènù

kupoopela Mfùmù wa Mwoyi pa nkùrusè, Udi Nzambi mubiishe ku lufù awu. Ne twètù tudi bantèmù bàà bwalu abu.”

214 Yoyöyò, muyiishe kaayipu’s wè! Kàyi...kàvwakù nànsha mumanyè mwà kufunda dìnà dyèndè to, kàdi ùvwa mumanyè Nzambi. Bààkamba ne “bààkamanya ne yèyè ùvwakù ne Yesù.” Cyà bushùwà, ndibuulula dyà nyumà. Kaa, ekèlekèle. Mpindyewu, ki bwalu mbwòbù abu’s.

215 Kaayinà ùvwa ànu mu njila awu menemene, èkèleeziyà wa musunya awu ùdi mu njila umwèumwè awu leelù ewu. Èkèleeziyà wa Nyumà ùcidi ànu ne Dikunji dyà Kapyà adi, ùcidi ànu ne bimanyinu, ne maalu a kukèma, ùcidi ànu ne Kilistò umwèumwè awu; cidi cishindikà kuumukila ànu ku mwànà wa mukòòkò uvwa upingà ne lufù awu, ne mu budimi bwà Edènà, too ne ku Dilwa dyà cyàkàbidì dyà Mwànà wa mukòòkò. Kakùyì mpatà to, umwèumwè awu makèèlèlè, leelù, too ne kashidi.

216 Ne ndelànganyi yà Kaayinà ayi, batèndeledi ne bàà kapelu ne bamanyi bàà mabàla, ànu byàmwomùmwè; ànu byàmwomùmwè, ditùkù dyònsò ànu byàmwomùmwè. Badyudi ne bakèngesheshanganyi, mùvwa Kaayinà mwikàle kùdi Abèlè amu, ki mùdìbo leelù ewu, ne ki mùtùbo ne ki mwikalàbo misangu yònsò; bàà musunya, beena bupidyà. Ncyà bushùwà.

217 Mpindyewu Genèsè 3.8, ne ndi kàbidì mufunde 20 kaaba aka, ùmvwà ntàngila kùkaadi katanci:

Ki Adàmà kubìikilayè...Ki Adàmà kubìikilayè mukàjèndè...Evà; bwalu yèyè ùvwa mamwèndè wa bònsò bàdi ne mwoyi. (nwamònu’s, pàvwa mpaanyimà pàà dyambisha edi dimanè kwenzeka)

218 Kaayinà ùvwa...“Mpindyewu, anjì indilà!” Wèwè udi wamba ne: “Mmunyi mùvwà nyòka, nyòka wetù ewu?”

219 Kàdi, mwanèètù, tàngilà kùneeku, Bible kèna wàmba ne ùvwa nnyòka to; Bible mmwambè ne: “Yèyè ùvwa mutàmbe budimù ku nyama yònsò yà mu mpàta.” Kàvwa nyama wa udikoka panshi nànsha, ùvwa nyama. Ùvwa...Ne mwaba awu... .

220 Nènku ngánjì nnùpèèshèku ànu eci bu kaacimanyinu kakesè munkaci mwètù, panwikalà baswè. Ki pàdi maalu a mamanya mapetèle cibwejàkàjì cicolè mpòpù apu. Cintu cyà citàmbe kwikala pabwìpi ne muntu cìdìbo mwà kupeta, nnsòkòmuntù. Mbanganjì bàdi bamanyè nànkù awu? Kàdi kùdi cintu kampànda pankaci apu. Kabènakù mwà kwenza ne mifùbà yà nsòkòmuntù yìpetanganè ne mifùbà yà muntu to, pàaci’s ki cintu cidi citàmbe kwikala pabwìpi. Bàdi mwà kubànda nendè kuumukila ku civuba cyà ludimbà. Bàdi mwà kubànda nendè kuumukila ku civuba. Bàdi mwà kubànda nendè too ne ku nyama ne ku nyama yònsò ewu. Bàdi mwà kubànda nendè too ne ku ours. Angàtà ours ùmuuvùlè cisèba, s’mmufwanàngàne ànu ne mukàjì wa mukèsè ewu. Ànu cintu cimwècimwè aci’s. Angàtà

nyimà wendè ne bikwàbò byònsò, ùbìmanyikè mwaba awu, ùseemejè mukàji bu mùdi. . . wimanyikè mukàji mùshindù ewu. Cìdi ànu mwomùmwe ne—ne—ne ours. Dikàsà didi dipàtuka mùshindù wà mwomùmwe, ne cyanza cidi cipàtuka mùshindù ewu, ànu mùdi muntu amu. Kàdi nsòkòmuntù ùdi yèyè ùseemena kutàmba aci. Mmwambè kwikala nànkù, kàdi bòbò kabèèna mwà kucipeta to.

²²¹ Kaamùnsokòntù kakesè nkòkò aka, panwikalà baswè kukàmanya. Nudi bamanyè mwaba wùdiku anyi? Nkabàsokoka bòbò. Bàdi mwà kuumbula mifùbà yònsò yidìbo baswè kuumbula ayi. Bàdi mwà kuumbula. . . Basongi bàà mpìngù yà mabwe bàdi mwà kuumbula, ne maalu a mamanya, ne—ne mulondolodi wa maalu a bikondo ùdi mwà kupima bipiminu byà cikondo ne bipimu byà bòmbè bwà mushindà, kàdi kabàadyàkwangulakù mpasu to. Bwalu awu ùvwa nnyòka uvwa mufwànàngàne ne muntu kutàmba nì ncinyi cikwàbò cyònsò cìvwàku pa buloba, kàdi Nzambi wàkamwela mulawu ne kumukùlula panshì bwà kwikalayè ùdikòkela mu difù, ne mmwalùkile buludì ku nyòka kàyì ne difwànangana ne muntu nànsha dikesè to. Mpindyewu anjì dikoonnyàayi mu mitù, beena maalu a mamanya abu, ne bânjì bàngatè cyòci aci bwà katanci kakesè.

²²² Kàdi Bible ùdi wàmba patòòke ne: “Yèyè ùvwa ne budimù kutàmba nyama yònsò yà mu mpàtà.” Aci ncyà bushùwà. Yèyè nguvwa dinungu didi disanganyibwà pankaci pàà muntu ne nsokò adi, kàdi Nzambi wàkamwela mulawu ne kumwaluja ku didikòkela mu difù bwà—bwà bwalu bwàkenzàye abu. Wàkambisha mukàji ewu, ne mukàji wàkalela mwanèndè wa balùme wa kumpàla uvwa Kaayinà awu, mwikàle ne ngiikàdilù wa disonsodiibwa sungasunga dyà nyòka, dyabùlù, wàkabwela mu nyòka, wàkenza cyòci aci awu.

²²³ Ki pashiishe kwimitayè ne kulelayè, kwimitayè cyàkàbìdì paanyimà pàà bamanè kumwambisha. Mpindyewu tàngilàayi, mukàji wàkambisha, ùvwa ciibwipi ne. . . Èè, yèyè wàkenza bibi. Kàdi yèyè, ànu byètù byà cyà bushùwà ebi, ùvwa mwanyishibwe pààkiimitayè difù dyà kùdi bayendè adi apu, bwalu aci cìvwa cifwanyine kwikala misangu yàbùngì, yàbùngì pashiishe, ngondo yàbùngì ne matùkù àbùngì pashiishe; kawkwèna mùshindù wà kumanya aci to, katwèna bamanyè to, kàdi cyà bushùwà yèyè wàkalela ku difù dyà kùdi Adàmà.

²²⁴ Ne muntu kampànda mmwelè mene ne lukonko, wàmba ne: “Èè, mwànà wa balùme. . . wàkamba mùvwàye mwà kwikala mwà. . . Pààkalediibwà Kaayinà, yèyè wàkamba ne ‘wàkapetela mwànà kùdi Mukalenge.’” Kakùyì mpatà to, cyà bushùwà, àbi mmùvwàbi ne cyà kwikala. S’cìvwa mmukenji wà bufùki. Mmùshindù awu menemene wùdi leelù ewu. Paùdi ulediibwa, Nzambi kèna ùtùluka buludì ùkufùka nànsha. Wèwè udi mùtòlokù wà tatwèbè ne mamwèbè. Ne wèwè newikalè. . .

nekwikalè. . . bânà bèèbè balela abu's nebiikalè mitòlokù yèbè wèwè. Cidi ndivulangana díbà dyònsò, dyènda díya ànu nànkù, ànu mùdì micì yà mamiinu ne bikwàbò byà mùshindù awu abi; kàdi byalùkile ku cyà ku cibangidilu. Ndi ntèkemena ne aci cidi cicyùmvwija's.

225 Tudi ne díbà búngì munyi? Katùcyèna naadi to. Tèèlejàayi lwà lwímpè elu bwà yàlondà. . . yitwikalà mwà kwangata mu dyàlumingu: “Ku Nyumà umwe nkutùdi bònsò babàtìijìbwe mu Mubidi wùmwe. . .” (Tudi baswè kumanya aci.) “. . . Kilistò.” Pa díbà. . . Mpindyewu, ngeela meeji ne ndi nsangisha Mifundu ndambù, Mifundu mímpè pa cyòci aci [Mwanèètù Branham ùdi wàndamuna ku elu nùnkù mu Citùpà II, lukonko lwà 60—Muf.].

226 Lwímpè ndwólò elu, ànu bu. . . Nudikù mwà kuntwàla bwà kasunsa kakwàbò kàmwè anyi túbìdi, bwà kwandamuna ku elu nùnkù anyi? Lùdi mwà kudyàndamuna lwólò lwinè.

59. Paùdi—paùdi wamba ne “beena Iwonji kabààkwoshiibwa Cyendèlèlè” apu. . . (Èè, bwà mpindyewu kaayi ngàtàcishi Bantèmù bàà Yèhowàh, kí mmwómò anyi?) . . . **Paùdi wamba ne beena Iwonji kabààkwoshiibwa Cyendèlèlè apu, udi muswè kwamba mmu ifernò anyi mmu dijiba dyà kapyà? Mémè ndi mumanýè ne mbambè mu Bwàkabauulwibwà** (Amu mmu nshapità wa 20) **ne ifernò neèdiibwè mu dijiba dyà kapyà. Piikalàbo kabàyi bòoshiibwa Cyendèlèlè to, díbà adì cidi cibènzekelà ncinyi?**

227 Ànu mùndì mfùma ku dyamba, mwanèètù wa balùme anyi wa bakàjì, nànsha byòbi ne ùvwa nganyi; bàdi bàbùtuka, kakùciyi kàbìdì cintu nànsha cimwè cyà ku bòbò to. Bàvwa ne ntwàdijilu, nènku ki bòbò bàfikì ku ndekeelu abu; kabàcyèna kabìdì cintu nànsha cimwè to. Mmunyi mwikalà. . . nntàntà bule kaayi wikalabò mwà kwoshika, aci cidi ànu cicolè bwà kucyàmba. Kàdi, tàngilàayi, nekwikalè. . .

228 Bu nwènù ànu mwà kulama eci mu meeji, nwamònu's, ncipeepèlè ànu peepelee. Kùdi mùshindù ànu wùmwèpelè wà Mwoyi wà Cyendèlèlè, ngùdì wùfùminà kùdi Nzambi Yèyè mwinè awu. Ne Nzambi nkàayendè ngudi Mwoyi wà Cyendèlèlè. Nwènù ànu batàngìle mu nkòngamyakù emu, kèbaayi mwakù wà mu cyena-Ngelikà *Zoe*. *Zoe* mbwena kwamba ne “Mwoyi wà Cyendèlèlè.” *Mwoyi wà Cyendèlèlè* n’Nzambi.” Ne Yesù wàkamba ne: “Ndi mbàpèèsha Mwoyi wà Cyendèlèlè.” Kàdi nwènù batàngìle mu nkòngamyakù emu, mbambè ne: “*Zoe*.” Ki Mwoyi wà Cyendèlèlè wùmwèpelè wùdiku. Kakwèna mwaba nànsha wùmwè mu Bible wùdì Yekù wàmba ne nekwikalè ifernò wa Cyendèlèlè to, mmwambè ne nebòoshiibwè “kashidi ne kashidi.”

229 Mpindyewu, bwà kupeta mwakù *kashidi*, kèbaayi *aeon* awu. Nukààvwakù bamòne *apa*, mu Bible anyi? Mbanganyi bàkaadiku buumvwè bàmba ne: “Ne ma-aeons ne ma-ae- . . .”? Mbanganyi bàdi bamanyè ne *aeon* n’“cipòlò cyà cikondo”? Mòna's, cyà

bushùwà, muntu kanà yònsò ewu mmumanyè ne *aeon* n’“cipòòlò cyà cikondo.”

230 “Ne bôbò nebòòshiiwbè munda mwà ma-aeons,” abi mbipòòlò byà cikondo. “Nebèèdiibwè mu dijibwa dyà kapyà, ne nebòòshiiwbè munda mwà ma-aeons.” *Ma-aeons* mbwena kwamba ne “bipòòlò byà cikondo.” Bàdi mwà kwoshika munda mwà bidimu miliyô lukàmà byà dinyooka kàdi, ndekeelu wa byònsò, bàdi ne cyà kufika ku ndekeelu; bwà kubùtukabò, kashidi. Nwamònu’s, bwalu cyònsò cidi kaciyi cipwàngàne cidi dinyangakajiibwa dyà Cipwàngàne; nènku cívwa ne ntwàdijilu, pa nàнку cidi ne cyà kwikala ne ndekeelu.

231 Kàdi twètù bàdi biitàbùùje Mukalenge Yesù Kilistò tudi ne *Zoe*, “Mwoyi Sungasunga wà Nzambi” munda mwètù, nènku tudi ne Mwoyi wà Cyendèlèlèlè. Kí nnè tudi ne mwoyi bwà kashidi ne kashidi nànsha, ngènzàmpèkààtù ngudi ne mwoyi bwà kashidi ne kashidi, kàdi twètù tudi ne “Mwoyi wà Cyendèlèlèlè.”

232 Mwanèètù Cox, àbidi aa, ùvwa musòmbè mu kajila kàà kumbèlù kwànyì kumpàlà kwà twètù kwela...paanyimà pàà twètù bamanè kwelamù nsàkàlàbwà, ki kwangulayè kaacishààdilè cikesè, kafùbà kàà kale, kwambayè ne: “Mwanèètù Branham, kàkaadi kàà ntàntà bule kaayi?”

233 “Kaa,” mûngàm̀bì, “bilondèshìle dilondolola dyà maalu a bikondo, wèwè’s udi mufwànyine kwamba ne kàkaadi ne bidimu binunu dikùmi. Kaacinyama kakesè kàà mùshindù kampànda, kàà kale kàà mu mbù kàvwàku ne mwoyi mu cikondo kampànda, kanyama kakesè kàà mu mbù, kafwànyine kwikala kashààle ne mwoyi mu bikondo bikaadi bipite byàbya.”

234 Yèyè ne: “Anjì elàbi meeji mùdi mwoyi wà muntu mwìpi pa kuwùfwànyikija ne *awu* mwoyi.”

235 Mèmè ne: “Kaa, kàdi, mwanèètù, cintu aci cidi ne ndekeelu, kàdi Mwoyi wutùdi twètù naawù mu Kilistò kawènakù ne ndekeelu to. Aci cidi mwà kulààla *kashidi* yìbidi anyì yisàtù, kàdi kacyàkwikalakù ne Mwoyi wà Cyendèlèlèlè to, bwalu Mwoyi wà Cyendèlèlèlè wùdi wùfùmina ànu kùdi Nzambi nkààyendè.”

236 Wà Cyendèlèlèlè: “Ewu udi umvwa Mèyi Àanyi ne witabuuja Yèyè udi muNtùme, ùdi ne Mwoyi wà Cyendèlèlèlè ne KÀÀDYÀkúpìcilakù ku cilumbulwidi to kàdi wàmànyì kuumuka ku lufù wàyi ku Mwoyi.” Ki bwalu mbwòbù abu’s, wèwè udi upeta Mwoyi wà Cyendèlèlèlè pa kwikala mwena kwitabuuja. Mwena bupidyà ùdi ne mwoyi bwà kashidi. Wà Cyendèlèlèlè...mwena kwitabuuja ùdi ne Mwoyi wà Cyendèlèlèlè, ne kèna mwà kubùtuka to bwalu Wòwù awu ngwà Cyendèlèlèlè.

237 Kàdi mwena kwitabuuja, yèyè neàye...Mwena bupidyà neàpicilè mu maalu a pa buloba, neàpetè makènga, dyàkabi; bidìye yèyè ùbìkila ne nkupìcila kwà mu cikondo cyà

dicyònkomoka abi, “èyi’s wè, ndi mpicila mu cikondo cyà dicyònkomoka.” Bakàji, maalà, ne bikondo byà dicyònkomoka, ùdi wèla meeji ne neàtungunukè. Neáfwe, neàbwelè mu dijiba dyà kapyà ne soufre kàdi koosha, mùdi dyosha kacya dyàtungunuka kashidi ne kashidi, ne pàmwàpa munda mwà bidimu mùliyò lukàmà mwàkèngeshiibwà musùukà wèndè mu dijiba dyà kapyà ne soufre.

²³⁸ Ndi... Wèwè udi wamba ne: “Neciikalè ànu mùdi soufre wetù wa ciibidilu ewu anyi?” Ngeela meeji ne neikalè mubi misangu mùliyò kutàmba awu nànkù. Ngeela meeji ne kwèna mwà kumuumvwijila ku kapyà to, ku kapyà kèètù kàà cyà bushùwà aka. Kabingilà kàmwèpelè kàdibo bàfundile ne “ku kapyà,” mbwalu kapyà ki cintu cidì citàmba kulunguja citùdiku naaci. Kakùyì mpatà to kòkò kàdi kàlunguja ne kàbùtula kantu ne kantu, ki cidì kapyà kènza. Èè, dìbà adi, nekiikalè mwòmù amu, kàdi newikalè ne musùukà wikalà ne cyà kunyookiibwa ku mùshindù kampàndà wà . . .

²³⁹ Mpindyewu, bìkèngela nùtangilè mwakù awu *kapyà*, bwalu Nyumà Mwìmpè mmmwàngàciibwe bu “Nyumà Mwìmpè ne kapyà”; mbwalu kapyà kàà Nyumà Mwìmpè kàdi kòosha mpèkaatù kàmubùtula, nwamònu’s, ne kàkezula.

²⁴⁰ Kàdi *aka* kapyà kòkò, kàdi kàfùmina mu ifernò, mbambè ne “dijiba dyà kapyà.” Ne nànsha ciikàle cinyi, ndinyooka dyà ne dikèngeshiibwa. Muntu mubanji awu wàkabàndisha mèsù, mwikàle ùsanganyiibwa mu ifernò, kwambayè ne: “Tùmakù Lazàrò ne tuumàyì ku minu, bwà kutùndaabakù pa mishiku, bwalu ndimi yà kapyà eyi yìdi yìnkèngesha.” Kanwèdikù meeji ne kakwèna ifernò wa wòsha to, ne ifernò wetù wa cyà bushùwà ewu to, ùdikù. Piikalàku dyabùlù wa cyà bushùwà, ifernò wa cyà bushùwà ùdikù.

²⁴¹ Kàdi, nudi numòna’s, cyònsò cidì cinyangakaja cidì ne ndekeelu waci, bwalu ndekeelu wa byònsò cidì ne cyà kwalukila ku bukezùke ne cijila byà Nzambi abi. Ne Nzambi ngwa Cyendèlèlè; ne twètù biikàle ne Mwoyi wà Cyendèlèlè, Nzambi ùdi munda mwètù, ne katwènakù mwà kufwà to ànu mùdi Nzambi kàyì mwà kufwà amu. Ki bwalu mbwòbù abu’s.

²⁴² Mpindyewu, mufundù wùdi wùDyùmvwija nkààyaawù, nwamònu’s, ne wùdi wùcìvwija cijaalàme. Mpindyewu, twànjààyibi kumòna, mvwa ne... Ncyèna mumanyè ní... Eyowà:

“Cìikalà—cìikalà mwà kubènzekela ncinyi?”

²⁴³ Bàdi bàbùtuka, kakùciyi kabìdi cintu nànsha cìmwè cyà ku bòbò to: musùukà wùdi wùya, nyumà ùdi ùya, mwoyi wùdi wùya, mubidi wùdi wùya, meeji àdi àya, civùlukilu cidì cìya.

²⁴⁴ Nènku kakwàkwikala kabìdi nànsha meeji mene a bubì to, ànyì, a nànsha ne bùvwakù bwenzèke mwinè, mu Butumbi. Ncyà bushùwà, byònsò nebiikalè... Nudikù bafwànyine

kudifwànyikijila ne, pànwapa mpafwànyine kwikala bantu kaaba aka mu citùpà eci. . . ?

245 Bible kèna wàmباكù ne: “Nànsha mene meeji a beena lwonji neàbutukè” anyi? Meeji a byôbi abi mene neàbutukè.

246 Nèkwikalè muntu lwà *apa*, nèkwikalè Nzambi Munène wa Cijila Awu *apa*, ne mumanyè ne mwàmwa nàka mene mùdi ciinà ciikàle ne misùukà munkaci mwà kwoshika anyi? Mòna’s, aci kî nciwànyinekù kwikala Dyulu nànsha. Meeji miinè, civùlukilu ciinè, byônsò bìdì binyangakajìbwe abi, meeji mabì ônsò, byônsò abi nebìbutukè, ne byônsò byà bibì bìdì mwómò abi. Ne twètù netwikalè ànu bukezùke pa bukezùke, biikàle ne *Zoe*, Mwoyi wà Nzambi awu; too ne ku Cyendèlèlèlè, ne bikondo bipita, bipita, bipita, bipita; kaWàdyàkujikakù to, newikalèku Cyendèlèlèlè!

247 “Bààkabwela mu dinyooka *dyà kashidi*, kàdi baakàne bààkabwela mu Mwoyi wà Cyendèlèlèlè.” Nwacyùmùvù anyi? Dinyooka *dyà kashidi*, Mwoyi wà Cyendèlèlèlè, dishiilangana kaayi’s wè!

248 Mpindyewu, nwamònu’s, kacyèna. . . Mpindyewu, ndi mumanyè ne, bwènà nwènù, bankòngà bàànyì, ncyèna—ncyèna ne meeji a kuteeta kudìleeja bu cimanya-byônsò to. Mémè ngenza nànkù, . . .

249 Mpindyewu, ncidi ne nkonko mikwàbò mîmpè yìsàtù anyi yinaayi. Nènyàngatè mu dyàlumingu mu dindà, bu Mukalenge mwà kwanyisha.

250 Mpindyewu, tàngilàayi. Nwamònu’s, ebi bìdì bijuula nkonko. Mémè ndi muiyishi mukùlumpè. Ndi—ndi—ndi—ndi ne bidimu makùmi àbìdì ne bisambòmbò mu mudimu wà bwambi. Ne ndi—ndi ne kusàkidila kwàbùngì bwà cyôci eci, bwà mùndìku mwà kwamba cyôci eci, wanyì. . . Kacya ncitukù muteetè bwà kuteeta kuleeja nî ncinyì nî ncinyì mu nsòmbelu wanyì kaciyi cyanjì kubuuludiibwa dyàmbedi to. Ne ndi ne kusàkidila kwàbùngì mùdi Mwanjèlò wa Mukalenge. . . Bwalu ncitukù ne kàlaasà kalonga, ne dikùmbanyina to. Kàdi Mwanjèlò ewu wàkatùluka, ne ùdi dikwàcisha dyànyì ditùma kùdì Nzambi. Ne Kàtukù mwanjì kungambila cintu nànsha cimwè cidi kakùyì mpatà to kaciyi cinwàngàne ne cyôci aci kuumukila ku Genèsè too ne ku Bwàkabuulwibwà to, mu mùshindù wà ne. . . Mémè kufùnda lùkàsàlùkàsà pàakambàYè ne “Ne wèwè—ne wèwè newàngatè dipà dyà dyondopa dyà kùdì Nzambi.” Ki mémè kucifùnda ànu menemene mùshindù wàkacyàmbàYè awu.

251 Nènkù bidimu bitwè ku bisàtù paanyimà, mulongolodi wa ndongamu kukòkayè ntèmà yànyì—yànyì ku cyôci aci, wàmba ne: “Mwanèètù Branham, ukààvwakù mumòne cyôci aci anyi? Nciwàngàne menemene mu mùshindù wà ne Yèyè wàkawkambila ne ‘ndipà kampànda.’”

²⁵² Nwamònu's, kàakambakù ne “dipà adi” to. Ne dyònsò—dyònsò dyà mu Bible... dipà dyònsò dítu “dipà adi” pa kuumusha dyondopa dyà kùdì Nzambì, nènku dyòdì dítu “dipà kampànda.” Dìdì “mapà a dyondopa.” Ûdi mwà kwikala ne mishindù yàbúngì yà mapà a dyondopa, mishindù mishìilèshìilàngàne. Kàdi, dikwàbò dyònsò “ndipà dyà”: dipà “dyà” cipròfeta, dipà “dyà” *cikampànda*. Kàdi dyondopa dyà kùdì Nzambì dyòdì dìdì ku búngì ne: “mapà.” Kàdi kacya ncìvwakù mumòne aci to, Nyumà Mwímpè mmupwàngàne be. Kaa, Mukalenge àbeneshiibwè's wè!

²⁵³ Nudikù nuumvwa ne Nyumà Mwímpè umwèumwè wàkafùnda Bible awu awu, mufùndìibwe kùdì bantu nkàmà, bashìilàngàne ntàntà wa bidimu nkàmà... kàdi nànsha umwe wa kùdìbo kàakaseesukakù ewu kùdì mukwèndè to, yònsò wa kùdìbo ùvwa mukùmbànàngàne; ne kacya umwe kàvwakù muumvwè maalu a kùdì mukwàbò to.

²⁵⁴ Nènku Pòlò wàkaya, ne ùvwa ùsanganyiibwa mu Arabie, ne kàvwakù nànsha mukendàkàne ku Yelusàlèmà to munda mwà bidimu dikùmi ne binaayi, kàdi wàkaya ku Yelusàlèmà ne wàkaya... wàkuumuka ku... kàvwakù muyè ku Yelusàlèmà to. Kàdi mu Arabie amu, kuditwayè mu kuyiisha, kàyìkù nànsha mwanjì kumòna Peetèlò ne bakwàbò abu to munda mwà bidimu dikùmi ne binaayi. Kàdi pàakatwilanganàbo, bàvwa bàyiisha cintu ànu cimwècimwè aci: dibàtiiza dyà mu màyi mu Dìná dyà Yesù Kìlistò, ne dyondopa dyà kùdì Nzambì, ne bukòlè bwà Nzambì.

Kaa!

Ndi nsànkà be mùndì mwà kwamba ne ndi umwe wabò.

Umwe wabò, ndi umwe wabò,
Ndi nsànkà be mùndì mwà kwamba ne ndi umwe wabò; (Àlèluuyàh!)

Umwe wabò, ndi umwe wabò,
Ndi ànu nsànkà be mùndì mwà kwamba ne ndi umwe wabò.

Kùdì bantu pàmwè ne myaba yònsò,
Bàdì ne myoyi yònsò yilàkuka kapyà,
Ne Kapyà kàakamatà ku Mpenta aka,
Kàakabàkezulà ne kubàvwija bakezùke aku;
Kaa, ki kulàkukaKù mpindyewu mu mwoyi wànyi eku,

Kaa, butùmbi kùdì Dìná Dyèndè!
Ndi nsànkà be mùndì mwà kwamba ne ndi umwe wabò.

Bàvwa basangìle mu cibambalu cyà kuulu,
Bònsò munkacì mwà kusambila mu Dìná Dyèndè,

Bààkabàtijiibwa ne Nyumà Mwîmpè,
 Ne bukolè bwà mudimu bwàkalwa;
 Mpindyewu cyàkabènzèlàYe mu ditùkù adi aci
 Neàkwenzèlè wèwè cimwècimwè aci,
 Ndi nsànka be mûndì mwà kwamba ne ndi
 umwe wabò.

Ndi umwe wabò, ndi umwe wabò,
 Ndi nsànka be mûndì mwà kwamba ne ndi
 umwe wabò; (Àlèluuyàh!)
 Umwe wabò, umwe wabò,
 Ndi nsànka be mûndì mwà kwamba ne ndi
 umwe wabò.

255 Tèèlejàayi, ndi ne kaamukenji kakesè bwènù nwênù:

Lwàku, mwanètù wanyì, kèbanganà ne
 dibènesha edi
 Dyàkezulà mwoyi wèbè ku mpèkaatù,
 Dyàbangà kudidisha ngonga yà disànka
 Ne dyàlamà musùukà wèbè wùlàkuka kapyà;
 Kaa, ki kulàkukadi mpindyewu mu mwoyi
 wànyì eku,
 Kaa, butùmbi kùdì dìnà Dyèndè,
 Ndi nsànka be mûndì mwà kwamba ne ndi
 umwe wabò.

256 Kwênàku wèwè ne disànka mùdì umwe wabò anyi?
 Ncinyì aci? N’Nyuma udi ubuulula awu. Ndibuulula dyà kùdì
 Nzambì dyà ne: “Pa lubwebwe elu.” Bwànyì mèmè nànsha bu
 mwèposkòpò wa mutàmbidile . . .

257 Nsaserdòsè wa Kàtòlikè ùvwa musòmbe, àbìdì aa, mu nzùbù
 mwànyì. Ki yèyè ne: “Mukalenge Branham, ndi mulwè bwà
 kukwelakù lukonko.”

Mèmè ne: “Èyo, mukalenge.”

258 Yèyè ne: “Ndi mwab’ewu ne mukànda wà kùdì mwèpiskòpò,
 mukufùndila wèwè.”

Mèmè ne: “Èyo, mukalenge.”

259 Yèyè ne: “Mèyì àudì wamba, udikù mwà kulama cyanza
 cyèbè cyela muulu bwà kudìcipa ne dísù dikolè ne newámbe
 bulelèlà anyi?”

260 Mèmè ne: “Ncyàkucyènza nànsha.” Mèmè ne: “Bible
 mmwambè ne: ‘Kudìcipikù to nànsha kakesè, nì nku mauu nì
 nku buloba (bwalu bùdì citèekedi Cyèndè cyà makàsà). Èyowà
 yèbè yikalè to ne èyowà.’ Mwèpiskòkò yèyè muswè kuumvwa
 cìndì ne cyà kwamba aci, neàngiitabile ku dīyì dyànyì bwà cyòci
 aci. Yèyè kàyi muswè to, mèmè ncyèna ndìcipakù to.”

261 Nsaserdòsè mukèsè wa èkèleeziyà wa Mwoyi Munsantu ewu
 kuntweku, kwambayè ne: “Wèwè nguvwa mubàtiize Pauline
 Frazier mu matùkù a ngondo búngì *kampànda* anyi?”

262 Mêmè ne: “Mmêmè, mukalenge, mu Musùlù wà Ohio mwàmwa.”

263 Yèyè ne: “Uvwa mumubàtiize bìshi?”

264 Mêmè ne: “Mvwa mumubàtiize mu dimwinyija mwinshì mwà mâyi mu Dîná dyà Mukalenge Yesù Kìlistò.”

265 Kucifundayè. Yèyè ne: “Udi mumanyè’s, ki mùvwà èkèleeziyà wa Kàtòlikè ùbàtiiza kale wàwà.”

Mêmè ne: “Dîbà kaayi adi?”

Yèyè ne: “Mu cikondo cyà ku cibangidilu.”

Mêmè ne: “Cikondo kaayi cyà ku cibangidilu?”

Yèyè ne: “Èè, ku cibangidilu’s.”

Mêmè ne: “Cibangidilu kaayi?”

Yèyè ne: “Mu Bible.”

Mêmè ne: “Udi uswa kwamba ku cibangidil- . . . mu—mu bayiidi anyi?”

Yèyè ne: “Bushùwà’s.”

Mêmè ne: “Udi ubiikila beena Kàtòlikè, anyi, ba—ba . . . ? Udi wamba ne bayiidi bàvwà beena Kàtòlikè anyi?”

Yèyè ne: “Bushùwà’s, s’ki civwàbo.”

Mêmè ne: “Pàànyi’s mvwa ngeela meeji ne èkèleeziyà wa Kàtòlikè kàtu ùshintuluka to?”

Yèyè ne: “Kàtu ùshintuluka to.”

266 Mêmè ne: “Dîbà adi mbwà cinyi Peetèlò wàkamba ne: ‘Nyingàlalaayi, nùbatijiibwè mu Dîná dyà Yesù Kìlistò’? Kàdi nwènù nudi nwamba ne ùvwa . . . ne yèyè ùvwa paapà?”

267 “Èyowà’s.”

268 “Kàdi bwà cinyi nwènù nudi nubàtiiza mu dîná dyà ‘Taatu, Mwànà ne Spiritu Munsantu’? Pèndè yèyè ùvwa winyijangana, kàdi nwènù numyaminangana mâyi. Mpindyewu cidì cyenzèke ncinganyi?”

269 Yèyè ne: “Kàdi, udi umòna’s,” yèyè ne, “èkèleeziyà wa Kàtòlikè ùdi ne bukòokeshi bwà kwenza cyònsò cidibo baswè kwenza aci.” Huh.

270 Mêmè ne: “Kàdi wèwè kwamba mùdì bayiidi beena Kàtòlikè?”

271 Yèyè ne: “Èyowà’s.”

272 Mêmè ne: “Mukalenge, mêmè ndi ne Josèphe, ndi ne *Mukàndà wà Bafvile Dìtabuuja wà Fox*, ndi ne *Bikondo byà ku Cibangidilu* byà Pemberman, ndi ne *Baabùlònà Yìbìdì* yà Hislop, maalu-malonda a matàmbe kwikala a kale àdì pa buloba, ndeejààku mwòmò amu mwaba wùkaadiku èkèleeziyà wa Kàtòlikè mupèeshiibwe díyi ditùma anyi mubwelè

mu bulongolodi kampànda...bidimu nkàmà yisambòmbò paanyimà pàà lufù lwà mùpostòlò wa ndekeelu.”

“Kaa,” mwàkambàye, “twètù tudi twitaabuuja cìdì èkèleeziyà wàmba.”

Mémè ne: “Mémè ndi ngiitabuuja cìdì Bible wàmba.” Nwamònu anyi?

“Mòna’s,” mwàkambàye, “Nzambi’s ùdi mu èkèleeziyà Wendè.”

²⁷³ Mémè ne: “Nzambi ùdi mu Dìyi Dyèndè.” Ki mémè ne: “Bu...” Yèyè ne... Mémè ne: “Bible kèna wàmba ne Nzambi ùdi mu èkèleeziyà Wendè to, kàdi Bible ùdi wàmba ne Nzambi ùdi mu Dìyi Dyèndè. ‘Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi; ne dyàkasòmbela munkaci mwètù.’” Aci ncyà bushùwà. Mémè ne: “Nzambi ùdi mu Dìyi Dyèndè.”

²⁷⁴ Kupàtukayè e kuya kamba cyòci aci. Yèyè ne: “Èè, katwèna bafwànyine kukòkangana to,” yèyè ne, “bwalu wèwè nyawù witabuuja Bible, mémè ndi ngiitabuuja èkèleeziyà.”

²⁷⁵ Mémè ne: “Mémè ndi ngiitabuuja ne Bible ùdi Dìyi disonsola dyà Nzambi ne mu Yèyè kamwèna dibèngangana dyà mèyi nànsha òmwèpelè to. Ne Yèyè ngudi Dìyi dyà Nzambi, mpàngù Yèndè yà Cyèndèlèlè bwà bikondo byònsò bicilwalwà. Yèyè mmwambè ne: ‘Maulu ne buloba nebìjiminè kàdi Dìyi Dyànyì kadyàkujìmina to.’” Aci ncyà bushùwà. Mémè ndi ngiitabuuja Dìyi.”

²⁷⁶ Kupàtukayè e kuya kùdi Màndàmù Frazier. Kwambayè ne: “Màndàmù Frazier, udikù mwà kwela cyàlà pa dibèji apa wanyisha bwà mwanèèbè wa bakàji kwikalayè cidimba cyà èkèleeziyà wa Kàtòlikè anyi?”

²⁷⁷ Awu ne: “Mbipicìibwe ne mémè muyè nendè ku majambu.”

²⁷⁸ Yèyè ne: “Bundù bwèbè.” Yèyè ne: “S’bivwa bikèngelaku wèwè kwikala ne kusàkidila mùdi mwanèèbè wa bakàji upàtuka mu lukutukutu alu, ùbwela mu èkèleeziyà wa Kàtòlikè.”

²⁷⁹ Awu ne: “Ambàbi tǔng bu ne mwanèèbè wèwè wa bakàji nguvwa ulwa mu wanyì èkèleeziyà, wèwè uvwa mufwànyine kwamba bishi pa bwalu abu?”

²⁸⁰ “Kaa,” mwàkambàye, “aci’s ncishìilàngàne.”

²⁸¹ Awu ne: “To, kì ncishìilàngàne to.” Wàkamanya ne ùvwa mwaba kampànda pàakashiyanganàye ne mukàji mukèsè awu kuntwaku apu’s. Kumanyayè ne ùvwa muyè mwaba kampànda’s. Mukàji awu kwambayè ne: “Mpindyewu, ciibi cìmwècimwè cyùdi mubwelèlè aci cìdì bwàshì.”

²⁸² Nwamònu’s, mùshindù’s ki wòwù awu. Kabàkudyatàkàjìku ku makàsà to, kabyèna bìkèngela bwà wèwè kùdyatakajìibwa ku makàsà to. Pìikalàbi ne Nzambi mmutwè ku cyèbè, nganyì udi mwà kukùpùmbisha? Cyà bushùwà’s! Lutàtù lùdiku leelù ewu

lùdi ne, wêwè udi ne mufùbà wà cipumpù pamutù pàà mufùbà wà mwongo. Twà ku cyà Nzambi ne ku cidi cijaalàme!

²⁸³ Nyumà Mwîmpè umwèumwè wàkatùùlukila bàpostòlò abu ne mu bikondo byà kale wàwa awu, ùcidi ànu mu Èkèleeziyà Wendè leelù ewu, bônso bàdì Nzambi muDibuulùle kùdìbo abu. “Kì ng’ewu udi muswè, anyi ewu udi unyeema to, kàdi n’Nzambi udi uleeja luse.” Nzambi, ku disungula Dyèndè, ngudi utwàla bantu ne ùbàtábaja mèsù. Wèwè kwèna mufwànyine kuCimònakù to, wèwè udi mpofo, ne kùyikù mufwànyine kumòna to pàdì Nzambi kàyi mukukàngùle cyumvwilu. Bible mmwambè ne wèwè udi mpofo, ne kwèna mwà kumòna to. Kabyèna bikèngela bwà wèwè kuteeta to. Ne dilonga dyònsò dyà tùlaasà, ne dimanya ditwè dyà mu tùlaasà ngwengwengwe dyùdì mufwànyine kupeta adi, udi utàmba ànu kwenda kushàala mpofo dîbà dyònsò.

²⁸⁴ Mpindyewu, nwènù beena Église de Christ aba, nutu “nwakula pàdì Bible wàkula, ne nupùwa pàdiye ùpùwa,” kàdi nudi nwamba bìshi bwà bìmwè byà Cyôci eci? S’ nudi bapùwe pa Cyôci aci byà bibi be. Cyà bushùwà’s.

²⁸⁵ Nwamònu’s, bikèngela Bulelèlà bubuulula mu nyumà. Pashiishe Nzambi ùdì utùuluka ne ùDibuulula ne ùshindika ne Cidi Bulelèlà. Amen! Nudi baMunangè anyi? Ne mèmè pàanyi. Amen.

²⁸⁶ Èyo, nwènù ba-Méthodistes bônso nudikù baswè kulabulangana ku byanza ne ba-Baptistes mpindyewu anyi? Nwènù ba-Presbytériens?

²⁸⁷ “Mpindyewu,” mùdi wamba, “Mwanèètù Branham, wèwè udi ukòsa bwobumwè ne ba-Baptistes ne ba-Presbytériens badi kabàyi bàbàtiiz- . . . ?”

²⁸⁸ To, mukalenge, ncyèna ngenza nàнку to. Ndi mbàngata bu bânà bèètù. Kakùyì mpatà to! Bwànyì mèmè nànsha wèwè kùyì mene mubàtìijìibwe to, nànsha wèwè mubàtìijìibwe mu dînà dyà “Rose wa Shalònà, Mbata wa mu Cibanda, ne Mùtootò wà mu Dindà,” aci kacivwakù cifwànyine kwikala ne . . . aci’s ncifwànyine kwikala cîmpè ànu mùdì “Taatù, Mwànà, Nyumà Mwîmpè amu.” Bìdì ànu myànzù yìsàtù cyanàànà. Yèyè’s ùvwa Rose wa Shalònà. NcìvwàYe anyi? Mbata wa mu Cibanda, Mùtootò wà mu Dindà, byònsò abi. Bushùwà, mbìvwàYe. Bìdì ànu byà mwomùmwè eci anyi eci. Kàdi bwalu bùdì nùнку: mùshindù mujaalàme bilondèshile Mifundù ngwà mu Dînà dyà Yesù Kìlistò. Wèwè muswè mùshindù wà bilondèshile Mifundù, ki wòwù awu menemene, Ki mùshindù mujaalàme ngwòwù awu.

²⁸⁹ Mpindyewu, wèwè mubàtìijìibwe mu dînà dyà “Taatù, Mwànà, ne Nyumà Mwîmpè,” udyùmva ne bìdì ànu bìmpè, amen. Cyôci dyandamuna dîmpè dyà kùdì Nzambi bwà kondò kàà mwoyi katòoke kùdì Nzambi, amen. Ndà ànu kumpàla, wamònu’s.

290 Kàdi bwànyì mèmè, bwà ku lwànyì luseke, byôbì bikèngela ùnkonkè ne: “Mwanèètù Branham, bivwa bikèngela mbatiijibwè cyàkàbidì anyì?” Ndi mufwànyine kwamba ne: “Èyowà,” bwà ku lwànyì luseke.

291 Mukàjì mukesè awu mmulwè kaaba aka ditùkù adi, wàmba ne: “Mukalenge mmumbiikile bwà mèmè kwikala muiishi.” Mèmè ncivwa mwiitùje aci to, ànu mùmvwà ncìyì mwà kwitabuuja ne—ne yèyè ùvwa mwà kutùpika kusambuka ngondo. Ki yèyè. . .

292 Mèmè kwamba ne: “Èè, abi mbìmpè be, mwanèètù wa bakàjì.” Mèmè ne: “Utu musèdiibwe anyì?”

“Èyowà.”

“S’udi ne bânà bàbidì’s?”

“Èyowà.”

Mèmè ne: “Ncinyì cìdì. . .? Bàyeebè ùkaadi musùngidiibwe anyì?”

“To”.

Mèmè ne: “Newènzè nendè cinyì?”

“Nèmmushiyè kumbèlu.”

293 Mèmè ne: “Aci’s ki cìshì cyà kwela ku ndòbo citàmbe bwìmpè cikaadiku dyabùlù mupetè kacya. Wèwè nyawù udi mudyànjlè kwikala mukàjì mulenga kwìsù, kàdi udifinda apa upàtuka uya mu budimi bwà bwambi, s’newikalè cìshì cyà kwela ku ndòbo cyà dìbà dyònsò ne cintu cyà diludikila mikete bwà dyabùlù. Ne bàyeebè awu, kumbèlu, nsongàalùme wa citende, wèwè umushiya ne bânà bàbidì abu; s’neàbangè kwenda ne mukwàbò mukàjì, ne bânà abu’s nebiikalè ne mungà papa àbidì àdi panshi aa.” Mèmè ne: “Cya kumpàla, Nzambi Yèyè mubiikile muntu mukajì, Yèyè’s wàbèngyanganyi ne Dìyì Dyèndè.” Mèmè ne: “Mpindyewu, wèwè muswè kucyènza, bidi ànu bìmpè.” Mèmè ne: “Mpindyewu, dijingulula, udi wamba ne Mukalenge mmukupèèshe dijingulula. Udi muswè kuya, pa cibumbà cyà ku cyambilu, bwà kuditeeta anyì?”

294 Kwambayè ne: “Èyowà.” Ne nwènù’s nudi numòna cìdì cyenzèke aci.

295 Nwamònu’s, ndisaluka. Bìdì bikèngela cìfikè ku Dìyì. Cyôci kaciyi mu Dìyì to, dìbà adi kí ncilelèlè to. Masaluka èbè nànsha miikàle a bìshi, kí ncilelèlè to. Amen! Aci cidi cyùmvwika cìmpè. Amen!

296 Èyo:

Netwèndelè mu Bukênkè, Bukênkè bulenga be,
Bùlwa mwaba wùdì mamata a lumuma a luse
àbàlakana;

Kenkèshàku mu nyùngulukilu wetù mwònsò
muunyà ne butùku,

Yesù, Bukênkè bwà bàà pa buloba.

Nwènù bònsò bansantu bàà Bukênkè ambàayi
patòòke ne:

Yesù, Bukênkè bwà bàà pa buloba;

Dìbà adi ngonga yà mu Dyulu neyidilè,

Yesù, Bukênkè bwà bàà pa buloba.

Netwèndelè mu bukênkè, bukênkè bulenga be,
Bùlwa mwaba wùdì mamata a lumuma . . .

Kenkèshàku mu nyùngulukilu wetù mwònsò
muunyà ne butùku,

Yesù, Bukênkè bwà . . .

²⁹⁷ Mpindyewu ndi muswè bwà muntu ne muntu àkudimukèku
ne àlabulanganè ku cyanza, nseke yinaayi, ne bantu bònsò
mpindyewu, patùdì twimba cyòci eci cyàkàbìdì apa:

Netwèndelè mu Bukênkè, Bukênkè bulenga be,
(Amen!)

Bùlwa mwaba wùdì mamata a lumuma a luse
àbàlakana;

Kenkèshàku mu nyùngulukilu wetù mwònsò
muunyà ne butùku,

Yesù, Bukênkè bwà . . .

²⁹⁸ Nudi banangè ba-Méthodistes anyi? Ambàayi ne: “Amen.”
[Disangisha didi dyàmba ne: “Amen.”—Muf.] Ba-Baptistes? Ba-
Presbytériens? Beena Kàtòlikè? Beena . . . kaa, nudi babànanangè
bònsò anyi? Ambàayi ne “Amen.” [“Amen.”]

Netwèndelè mu Bukênkè, buleng- . . .

Biikàle nulabulangana ku byanza, patùdì tuya apu.

Kaa, bùlwa mwaba wùdì mamata a lumuma a
luse àbàlakana;

Kenkèshàku mu nyùngulukilu wetù mwònsò
muunyà ne butùku,

Yesù, Bukênkè bwà . . .

²⁹⁹ Kumpàlà kwà twètù kwimba musambu wètù wà
ditangalajangana naawù awu . . . Mpindyewu, bìdì mwà
kwenzeka ne ngùikalè cyàkàbìdì apa mu dyàlumingu.
Mpindyewu, paanyimà pàà aci ncyàkwalukilakù kàbìdì to
ànu paanyimà pàà Noël. Nwamònu’s, bwalu nêngiikalè mwà
kuya ku Michigan, kuumuka ku Michigan kuya ku Colorado,
kuumuka ku Colorado kuya kwàka ku Idaho, kuumuka ku
Idaho kubwela mu Californie, nènku netwàlukilè. Ne bìdì mwà
kwenzeka (ndi muswè bwà nwànsambidilaayikù) nêngiikalè
mu Waterloo, mu Iowa, kubangila ku ngondo wa kumpàla

mu matùkù makùmi àbìdì ne ànaayi too ne ku ngondo mwibìdì mu matùkù àbìdì. Nwamònu's, cipalu cinènè cyà manàyi aci kuntwaku, ndi mfùma ku dipeta dibìikila kùkaadi katanci, nènku binkèngela kubangila ku mpindyewu too ne ku dyàlumingu bwà kusambila. Nwamònu's, ku Waterloo aku, mu Iowa, kùdì pabwìpi mpindyewu aku.

³⁰⁰ Kàdì mpindyewu, vùlukàayi, tèèlejàayi tudyombà twà mwanèètù atu pa dibà citèèma, mu diisambòmbò mu dindà. Netùmubiikilè ne netùmumanyishè. Ne neciikadilè ku WLRP, ngimbilù wa tungimbà tûnaayi wa Neville pa dibà citèèma, mu diisambòmbò mu dinda. Netwikalè. . . Mémè—mémè ncìyi mupetè mùshindù wà kuyàngata to, Mwanèètù Neville neàjikijè nkonko ayi. Mmwómò anyi, Mwanèètù Neville, bwà mu dyàlumingu mu dindà? [Mwanèètù Neville ùdì ùtùdika mu tuseku wamba ne: “Dìyi ditùma dikolè!”—Muf.] Èè, tàngilà, wèwè mupetè lutàtù, mémè nènkutwè mpàndà. Yèyè neàtangilè. Èyo.

³⁰¹ Èyo:

Angàtà Dìna dyà Yesù wèndè naadì,
Wèwè mwànà wa tunyinganyinga ne dikènga;
Nedikupè disànkà ne busàmbi,
Kaa, ndà naaDì kwònsò kùyaaya.

Dìna dyà mushinga, Éyi dyà bupòle be!
Ditèkemena dyà buloba ne disànkà dyà Dyulu;
Dìna dyà mushinga, (Dìna dyà mushinga!) Éyi
dyà bupòle be! (Dyà bupòle be!)
Ditèkemena dyà buloba ne disànkà dyà Dyulu.

³⁰² Mpindyewu, wèwè muswè kumanya Baptiste udi witabuuja dyela dyà mbilà, ki mùshindù wà dyela dyà mbilà wùndì mémè ngiitabuuja ngwòwù awu. Maamù mukùlákàji awu musòmbè ànu mwaba awu, ki Nyumà kulwa pambidi pèndè. Kubangayè kwela mbilà mikolè, kàyi mwà kukàndamana to, kwalukilayè cyànyimà ne kuupukilayè mwanèndè wa bakàji awu. Ki mùshindù wùndì mémè muswè kucimòna ngwòwò awu. Amen. Aci's ncìmpè be, cyà cyena-kale, cyà mu ndòndò wa mwoyi. Kaa, ekèlekèle, munsantu wa kale—wa kale, mutwè mukèlè, mubobesha, mudìlongòlòle bwà kwalukila ku Butùmbi. Kacya ànu wìndila dibìikila, nudi numòna's, mwikàle ànu ùpicila mu cikondo cilenga cyà dikèma.

Èyo, Mwanèètù Neville mpindyewu, cyònsò cidìye muswè kwenza aci.



NKONKO NÈ MANDAMUNA PA EBÈLÙ CITÙPÀ I LUA57-0925

(Questions and Answers on Hebrews Part I)

DILONDANGANA DYÀ BULOMBODI, BULONGÀME NÈ DILONGESHA BYÀ ÈKÈLEEZIYÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dilòlò, mu matùkù 25 a ngondo wa citèemà, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabuujima kàadi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org